



लड़ेमायना महिला

क्रांतिकारी आदिवासी महिला संगठन – दण्डकारण्य ता मुख-पत्र
अंक-1 मार्च 2021 सहयोग राशि-15 रुपए

**गढ़चिरोली क्रांतिकारी आंदोलन ता आदर्श जन नेत्री
कामरेड जैनी आरके (सृजना) अमर रहें!**

ताना आदर्शकुन पोरो तेहची मुन्ने दायकाल!

इद पत्रिका ते...

| | |
|--------------------------------------|--------|
| जीवनीगः का. प्रमीला (मीना) | 05 |
| का. लखमे (रोशनी) | 05 |
| का. मेस्सी (सीमा) | 06 |
| का. कामेश्वरी (रिंकी) | 07 |
| का. कमला (रामको) | 08 |
| का. लीलाबाई (जमुना) | 08 |
| का. रुकनी (निर्मला) | 09 |
| महिला शहीदरा फोटोंग | 10 |
| जन संघर्षकु लोप्पा महिला ना भागीदारी | 14 |
| कोहकामेट्टा महिलांग पोरा पुलिस हिंसा | 21 |
| किसान आंदोलन ते महिलांग ना भूमिका | 22 |
| आंगनबाड़ी कार्यकर्तांग ना हड़ताल | 25 |
| अंतर्राष्ट्रीय महिल दिवस | 26 |
| सावित्रीबाई फूले - महिला शिक्षा | 29 |
| पेरिस कम्यून लोप्पा 'आधा आकाश' | 31 |
| हाथरस कांड | 35 |
| कंचन नदु हामुर आयो, हत्या! | 37 |
| पांडे ना झूठा आत्मसमर्पण ओसो हत्या | 38 |
| शाहीनबाग आंदोलन उंदी नेल्लता नमूना | 39 |
| पर्चा: शुभ्रांशु चौधरी | 41 |
| दमन ओसो प्रतिरोध | 42 |
| मडकाम हिडमें ना गिरफ्तारी | 44 |
| कहानी: धिक्कार | 45 |
| पाटांगः कामरेड सृजना ना सुरत ते | 49, 50 |
| जेल बंदी लोरा रिहाई मैदे अपील | 53 |



उत्तर गढ़चिरोली डिविजन, एटापल्ली तहसील, पेंड्री पुलिस थाना लोप्पा वायना नारु सीनबट्टी हेरे 2 मई, 2020 ते सी-60 कमांडो बलकुना संगे हिम्मत ते लड़ेमासोरे गढ़चिरोली आंदोलन ता आदर्श जननेताल ओसो साहसिक योद्धा कामरेड सृजना तना जीवा ता कुर्बानी हित्ता. शहादत ता समय ते कामरेड सृजना रीजनल स्तर ता सदस्या मंजी उत्तर गढ़चिरोली डिविजनल कमेटी ते काम कीसोरे मत्ता.

कॉमरेड सृजना दंडकारण्य ते खासकर, गढ़चिरोली वर्गसंघर्ष तल

विकास आत्ता उंदी अनमोल ओसो अनुभव मंदना कामरेड आंदु. हत्ता 32 सालकुना लोप्पा गढचिरोली (दंडकारण्य एसजडसी ता पश्चिम सब जोनल ब्यूरो) क्रांतिकारी आंदोलन तुन मुन्ने ओयना काजे तना अनमोल योगदान हित्ता. गढचिरोली आंदोलन ता निर्माण, उतार-चढाव ओसो अगा ता आंदोलन ता हर मल्का ते ताना महत्वपूर्ण भूमिका मंता. गढचिरोली तेने आयवालेवा क्रांतिकारी जरूरत किन हूडसी अद माड-उत्तर बस्तर ओसो मध्यप्रदेश ता टांडा एरिया ते वेने तना योगदान हित्ता. ताना शहादत किन 'लडेमायना महिला' तला ओडच कीसी श्रद्धाजंली हीयामंता. क्रांतिकारी इतिहास संगे जुडेमात्ता ताना लंबा क्रांतिकारी पिस्वल तल प्रेरणा एतसोरे करियनीकी 'लडेमायना महिला' पत्रिका ता पाठकलोरु कुन कॉमरेड सृजना ना जीवनी एवसी कीसोरे मंतोम. ताना आदर्श कुन मुन्ने ओयनीकी आह्वान कीयामंतोम.

कॉमरेड जैनी आरके ना पिस्वल ता शुरुआत

कॉमरेड जैनी आरके गढचिरोली जिला, भाम्रागढ तहसील, गोपनार नाटे उंदी मध्यम किसान लोते 50 साल मुन्ने पुटता. यायाल सुकरीबाई ओसो बाबाल चैतू आरके तमा मियाड ना पोरोय जैनी तासतोर. तानकिन वरोर दादल ओसो उंदी हेलो मंता. सबे आदिवासी पिल्लांग लेहकाने कामरेड जैनी वेने सुडला पहर तल लोता बूता ओसो कमाई काम ता संगेने जंगल ते दोरकना चीजकु पेहकना ते तम यायो-बाबो किन संग मंदू.

अद कालम ते नाटेना लोप्पा आदिवासी मुखियालोरा दबाव ओसो लूटी रोमवालेवा ताकसोरे मत्ता. कबीलाई पितृसत्ता महिलांग किन दबा कीसी तासिंदू. इद्रम ता परिस्थिति ते 1980 ते गढचिरोली जिला ते क्रांतिकारी आंदोलन शुरु आता. 1984 एवना भाम्रागढ ओसो जारवंडी इलाकांग एवना आंदोलन विस्तार आता. फरवरी 1984 एवना भाम्रागढ दलम बने मासी भाम्रागढ ओसो गट्टा इलाकांग ते क्रांतिकारी आंदोलन तुन विस्तार कीयना कोशिश शुरु आत्ता.

जंगल इलाकांगकुने आदिवासीरा पोरो वन, राजस्व ओसो आबकारी विभागकुना लूटी, शोषण, जुल्म ता पोरो, सामंतवादी-दलाल नौकरशाही पूंजीवादी ओसो साम्राज्यवादी शोषण, लूटी ता पोरो गुरिल्ला दलमकु, जनता ना नडमा प्रचार कीसोरे, ओरकुन जागरूक कीसोरे, संगठित कीयना मैदे राजनीतिक सामरिक ओसो सांगठनिक कोशिश कुन शुरु कित्ता. 'जंगल पोरो आदिवासीर कुने अधिकार मंदना', 'पूहतानोरकुने नेली' इव नारांग सरने जनता संगठित आयना लेहका ओरा चेतना बेरसी कित्तोर.

पोल्लूंग-पाटांग संगे कित्ता राजनीतिक प्रचार अनि, जंगल-विभाग ओसो तुमिर आकी ठेकेदारलोरा पोरो कित्ता संघर्ष कुना कारण ते गुरिल्ला दलमकु, जनता किन जीवा लेहका बनेमात्तांग. आदिवासी मुखियालोरा दबाव-लूटी ना बारे ते जनता गुरिल्ला दलम संगे चर्चा किंदूर. कबिलाई

पितृसत्ता ता दबाव बारे ते महिलांग चर्चा किंदूंग. अद लूटी ओसो दबाव तल मुक्ति दोरकना इंजो अविना विचार मंदू. अद्रमता राजनीतिक माहौल ता प्रभाव कॉमरेड जैनी ओसो ताना परिवार पोरो वेने अरता.

आदिवासी कबिलाई पितृसत्ता पोरो चिन्कका कित्ता विद्रोह

बस्के स्थानीय गुरिल्ला दलमकु समस्यांगकुना खिलाफ जनता किन संगठित ओसो संघर्ष कियनाल तैयार कित्तयो अस्केडल इलाका ता लयास्कु-लयोरकु गुरिल्ला दलम ते भर्ती आयना शुरु आता. अद्रमे जैनी वेने दलम ते भर्ती आयनीकी तैयार आत्ता. तना यायो-बाबाल आदिवासी रीति-रिवाज हिसाब ते मामा ना मर्मी ना बाटा जबर्दस्ती मर्मी कीसीत्तोर मति, कॉमरेड जैनी अद मर्मी तुन विरोध कीसी कबिलाई पितृसत्ता पोरो विद्रोह ता झंडा तेहची अप्रैल, 1988 ते भाम्रागढ गुरिल्ला दलम ते भर्ती आत्ता. पेरके अद चिन्कका पोरोय ते जनता लोप्पो जीवा लेहका बनेमात्ता. इद्रम आजादी ओसो स्वाभिमान ता विचार मंदना आदिवासी लयास्कुना मैदे कॉमरेड चिन्कका संघर्ष ता हरी तोहना विय्युक्का बनेमात्ता.

क्रांतिकारी हरे कॉमरेड सृजना

कॉमरेड जैनी चिन्कका पोरोय ते, पेरके सृजना पोरोय ते क्रांतिकारी जरूरत हिसाब ते विकसित आसोरे गुरिल्ला दलम ता सदस्या तल पोयसी रीजनल कमेटी सदस्या एवनाल बघोनो जिम्मेदारिग कुन पोयसी उंदी विश्वास मंदना ओसो साहसिक नेताल लेहका विकास आत्ता. तना क्रांतिकारी पिस्वल इद्रम मंता - अप्रैल, 1988 ते भाम्रागढ दलम ते भर्ती आता. जुलाई, 1988 ते बदली आसी पेरिमिलि दलम ते हत्ता. अदे दलम ते मंदनास्के तानकु पार्टी सदस्यता हियले मंता. जनवरी, 1991 ते ताना मर्मी आता. ताना पेरके अगस्त 1991 ते बदली आसी टिप्रागढ दलम ते हत्ता. मार्च, 1995 तल नवंबर, 1996 एवनाल दंडकारण्य ते बनेमात्ता पहली प्लाटून ते काम कीत्ता. दिसंबर, 1996 ते तानकुन एरिया कमेटी सदस्या स्तर ते पदोन्नति कियले मंता. पेरके बदली आसी एटापल्ली दलम ते हत्ता. डिप्टी कमांडर ता जिम्मेदारी पोयसी जनवरी 1997 तल 1998 एवनाल अदू एटापल्ली दलम ते काम कीत्ता. 1998 ते अदू, अद दलम ता कमांडर बनेमात्ता. 2004 ते तानकुन डिविजनल कमेटी ते एतित्तादू मंता. 2004 तल 2007 एवनाल एरिया कमेटी ता सचिव जिम्मेदारी पोयसी डीवीसीएम लेहका एटापल्ली दलम ता ओसो दिसंबर 2009 ते टिप्रागढ दलम ता जिम्मेदारी पोयत्ता. 2009 ते तानकिन पश्चिम रीजनल कमेटी ते पोयत्तादू मंता. 2010 तल अक्टूबर 2014 एवनाल अदू टिप्रागढ एरिया ता जिम्मेदारी पोयसी काम कित्ता. 2010 ता नडमा तल 2012 एवनाल अदू टिप्रागढ ते काम कीयना 15 वीं पीएल ता पीपीसी सचिव ता जिम्मेदारी पोयत्ता. मार्च, 2013 तल अक्टूबर, 2015 एवनाल रीजनल कमेटी हिसाब ते अदू

पश्चिम ब्यूरो ता यूनिफाइड कमांड ता सदस्या मंजी तना योगदान हित्ता. 2014 तल मई, 2020 एवनाल अदू कसनसूर एरिया ता जिम्मेदारी एतित्ता. अप्रैल, 2016 तल जनवरी 2017 एवना कसनसूर एसी सचिव ता जिम्मेदारी वेने पोयसी काम कित्ता. 2017 ते कसनसूर ओसो चामुर्शी रेंडू एरियांग ना जिम्मेदारी पोयसी काम कित्ता. 2018 ते रेंडू एरिया कुन उंदी एरिया कमेटी लेहका निर्माण कित्तास्के, कामरेड सृजना अद एरिया कमेटी तुन नेतृत्व कित्ता. अक्टूबर, 2019 तल शहीद आयना जोम कसनसूर एसी सचिव ता जिम्मेदारी एतिसी काम कित्ता.

अविश्रांत, सुदृढ़, विश्वास मंदना ओसो सक्षम ऑर्गनाइजर

कॉमरेड सृजना दिसंबर, 1996 ते एरिया कमेटी सदस्या बनेमात्तागडल शहीद आयना जोम कई क्षेत्रकुने जनता किन गोलबंद कीसी ओरकुन जनसंगठन ता निर्माणकुने ओसो पार्टी निर्माणकुने संगठित कित्ता. बचोनो संघर्षकुन नेतृत्व कित्ता.

तुमिरआकी कोय्यना ओसो वेदुर नडकाना मजदूरी कुन बेरसी कीयना मांग तुन पोयसी हर साल ते जनता किन संगठित कीसी संघर्ष किन ताकी कित्ता. जनविरोधी मुखियालोरु पोरो ताकता बचोको संघर्षकुन नेतृत्व कित्ता.

कार्पेट सेक्यूरिटी नडमा जनता किन जमा कीसोरे, क्रांतिकारी राजनीति वेहची ओरकुन जनसंगठनकुने, जनमिलिशिया, पार्टी सेलकु, जीपीसींग, जनताना सरकारकुने संगठित कित्ता. दुश्मन ता हमलांग ते ध्वस्त आता निर्माणकुन पुनरनिर्माण कीयना मैदे अदू दोगवा लेवा हमेशा कोशिश कित्ताद मंता. भीषण दमन ता नडमा निर्माण, पुनरनिर्माण कीयना, अविना बैठक कुन ताकी कीयना, समन्वय कीयना, ओरकिन काम कीया वेहाना इव सबे वेने नरगे चुनौती मंदना कामकु आंदू इद चुनौती तुन मानेमासी जिद्द पोयसी तना जिम्मेदारी तुन पूरा कीत्ता सक्षम ऑर्गनाइजर आंदू. कॉमरेड सृजना बचोरो मुल किन पार्टी ते, पीएलजीए ते भर्ती कित्ता. ओसो बचोनो मुल किन पूर्णकालीन कार्यकर्ता बनेकित्ता. नवजवानलोरु किन गैर-किसान निर्माणकुने वेने संगठित कित्ता.

15 वीं पीएल ता पीपीसी सचिव मत्तास्के तना पीएल तुन राजनीतिक, सैनिक ओसो सांगठनिक रूप ते विकसित कीयना मैदे कोशिश कित्ता.

महिला क्षेत्र ते तनवा अनमोल योगदान

महिला क्षेत्र ओसो क्रांतिकारी आदिवासी महिला संगठन ते वेने अदू महत्वपूर्ण योगदान हित्ता. जोन ते महिला आंदोलन ओसो निर्माण कुन मजबूत कीयना, पार्टी ओसो पीएलजीए ते महिलांग ना भागीदारी बेरसी कीयना ओसो महिला कामरेड्स कुना विकास पोरो ध्यान हीयना मैदे एसजडसी कुन जरूरी सलाह, सूचना हीयना, महिलांग ना समस्यांग कुन अध्ययन कीयना ओसो महिला पत्रिका 'संघर्षरत महिला' कुन ताकी कीयना लक्ष्य ते गठन कित्ता महिला सब कमेटी ते इचुन जेल सदस्या मत्ता. डिविजन ओसो

सब जोनल ब्यूरो ते ताकी कित्ता बचोनो विशेष महिला बैठक कुने अदू सक्रिय हिसाब ते शामिल आत्ता. 2017 ते रेंडू सब जोनल ब्यूरो दायरा ते ताकी कित्ता विशेष महिला बैठक ते शामिल आसी महिलांग ना समस्यांग कुन गहराई ते चर्चा कीयनागा शामिल आत्ता ओसो इचोने आयो, अध्यक्ष वर्ग सदस्या मंजी वेने अद बैठक कुन ताकी कीयना लोपा वेने ताना योगदान मंता.

हामुर किन वेने हारे कित्ता उंदी साहसिक गुरिल्ला योद्धा

कॉमरेड सृजना ना पूरा क्रांतिकारी पिस्वल रोमवालेवा ताकना दुश्मन ता हमलांग नडमा, अविन सामना कीसोरे, प्रतिरोध कीसोरेने ताकताद मंता. ताना क्रांतिकारी पिस्वल ता 32 सालकुना लोप्पा बहुत कमे साल दुश्मन ना हमला लेवा ओसो मुठभेड लेवा ताकि मंदार. 1989 ते गट्टा रेंज ता आलवाडा नार हेरे अदू दुश्मन ता पहली मुठभेड तुन सामना कित्ता. पेरके तुमिरकोडी, गट्टानेली, कोवेडोहा, सिंदेसूर, गूरेकस्सा, तामडा, चंदनापल्ली, गजमेडी, बोटेड्झरी, अंबेझरी, हेटडडकस्सा, छोटा जलिया, नेंडुवाही, रेकानार, बूर्गी, कुंडुम इव नाहकुना इलाका लोप्पा लगभग 30 मुठभेडकुने दुश्मन बलकुना संगे साहस ता संगे लडेमात्ता. 2 मई, 2020 ते वेने सीनबट्टी ते अदू सामना कित्ता आखिरी मुठभेड ते वेने दलम किन बचे कीसोरे आत्मबलिदान ता भावना संगे लडेमासोरे तना जीवा ता कुर्बानी हित्ता.

दुश्मन क्रांतिकारी आंदोलन पोरो ताकी कीयना दमन किन प्रतिरोध कीयना मैदे पार्टी नेतृत्व ते कई प्रतिरोध कार्रवाईंग ओसो कार्यनीतिक प्रत्याक्रमण हमलांग ते कॉमरेड सृजना प्रत्यक्ष ओसो परोक्ष रूप ते शामिल आता. सदस्या मंजी, सेक्शन डिप्टी, सेक्शन कमांडर ओसो पलटन ता डिप्टी कमांडर मंजी अदू सैनिक कार्रवाईंग ते तना योगदान हित्ता. भीमनकोज्जी, रडमपल्ली, कोपिनकट्टा, गोड्सूर ओसो गट्टा एंबुशकुने ओसो 16 टन विस्फोटक पदार्थ तुन जब्त कित्ता हत्तिगुट्टा घटना ते वेने ताना भागिदारी मंता. ओसो मुखबिरलोरु कुन कंट्रोल कीयना, इचवूर मुल किन खत्म कीयना ते वेने कामरेड सृजना ना भूमिका मंता.

बचोको मिलटरी कैंपकुने शामिल आसि अदू तना सैनिक क्षमता तुन पेरसी कीत्ता. बचोको मिलटरी कैंपकुने अदू पहली स्थान हासिल कित्ता.

वेल्लाये मुठभेड कुन सामना कीतके वेने कामरेड सृजना जनता नगा दायना तुक बेस्के वेने पेरके मुन्ने आतद हिल्ले. कार्पेट सेक्यूरिटी ओसो सुकली नेटवर्क ता नडमा वेने अदू जनता तुन संगठित कीसोरे मत्ता.

पार्टी नीतिंग कुन दृढ़ता संगे अमल कीत्ता कार्यकर्ता

पार्टी ता राजनीतिक-सैनिक दिशा ओसो पार्टी नीतिंग पोरो कामरेड सृजना किन स्पष्ट समझदारी मंदू, जन आंदोलन, स्थानीय निर्माणकु, पार्टी, पीएलजीए, पार्टी श्रेणींग कुन पार्टी नीतिंग ना हिसाब ते बराबर अमल कीया वेहसोरे ताकि कीयनीकी कोशिश कीदू. गेरिल्ला पिस्वल ओसो संघर्ष शैली तुन खुद अमल कीसोरे, कैंडर किन वेने अविन

अमल कीया वेहसोरे ताकी कीयनीकी हमेशा कोशिश किंदू, बोना आई व्यवहार पार्टी नीतिंग तुक उल्टा मत्तेके तान बदली कीयना इंजी तना सुझाव वेहिन्दू, समस्या ता गंभीरता हूडसी आलोचना वेने कींदू,

बस्के सूरजागढ़ मेट्टा तुन काराना अनुमति हीयना इंजो उच्च स्तरीय कामरेड्स निर्णय एतित्तास्के कॉमरेड सृजना अदिन विरोध कित्ता. कॉमरेड सृजना ना संगे बाकी इचवुर मुल डीवीसी, एसजडसी कामरेड्स ना राय तुन मानेमासी पेरके अद निर्णय तुन उच्च कमेटी वापस एतित्ता.

2010 ते उत्तर गढ़चिरोली डिविजनल कमेटी ता सचिव मत्तोर दिवाकर ना जनविरोधी, पार्टी विरोधी गतिविधिग ओसो दुश्मन संगे ओना संबंध कुन पर्दाफाश कीयना लोपा कॉमरेड सृजना ना महत्वपूर्ण भूमिका मत्ता.

जनता ना नडमा अंतर्विरोध तुन देहतना मैदे ताकी कीयना जनअदालत कुने दंडूम पोयनास्के सही वर्गदिशा कुन पोयसी दंडूम पोयना काजे एसी कामरेड्स किन एजुकेशन हिंदू.

जनदिशा-वर्गदिशा तुन बराबर पालन कीसोरे, पार्टी नीतिंग कुन कच्चित अमल कीयना लोपा मजबूती ते मंदना कॉमरेड सृजना लेहकाता पार्टी कैडरकु मत्तेके, क्रांतिकारी आंदोलन मुन्नेटकु दायना विश्वास मंदान्ता.

पार्टी ता अधिवेशन ओसो प्लीनमकुने ताना भागीदारी

1993 तल पोयसी 2019 एवना गढ़चिरोली डिविजन (पेरके उत्तर गढ़चिरोली डिविजन ओसो पश्चिम सब जोन) ते ताकी कित्ता सबे डिविजन स्तर ता अधिवेशनकु ओसो प्लीनमकुने अदू प्रतिनिधि हिसाब ते शामिल आता. 90 दशक ते अधिवेशनकु ओसो प्लीनमकुने शामिल आसी अदू डिविजन आंदोलन ता समस्यांग कुन विश्लेषण कीयना, हल कीयना ओसो जरूरी मत्ता निर्णय एताना तौर-तरीका तुन करियत्ता. 2000 तल डिविजन आंदोलन सामना कीयना समस्यांग कुन परिष्कार कीयना लोप्पो अस्सल भूमिका निभा कीत्ता. 1995 ते ताकता डीके अधिवेशन ते, 2003 ते ताकता डीके प्लीनम ते, 2006 ते ताकता डीके अधिवेशन ओसो 2011 ते ताकता डीके प्लीनम ते अदू प्रतिनिधि हिसाब ते शामिल आता. अद्रम अदू डीके आंदोलन सामना कीयना समस्यांग ओसो अविना परिष्कारकुन समझे मात्ता. अद्रमे तना राजनीतिक ओसो सांगठनिक स्तर किन बेरसी कीयना मैदे कोशिश कित्ता. अव अधिवेशनकु लोप्पा ओसो प्लीनमकुना लोप्पा चर्चा कीयनास्के स्पष्ट रूप ते तना विचार किन वेहिन्दू, इद्रम अविना लोप्पो एतित्ता सही निर्णयकुने ताना भागीदारी मंता.

आदर्श कम्युनिस्ट

कामरेड सृजना कम्युनिस्ट जीवन शैली-माओइस्ट कार्यशैली कुन पोयसी ताकाना आदर्श नेताल मत्ता. 1989 ते उंदी सेंट्रल मिलिटरी कैंप ताकता. अगा जरूरत चीजकु तत्तना मैदे गुरिल्ला बलकु पक्काय मेहनत कित्ता. 12-15

घटांग ताकना, बोजा कांजिसी तत्तना कींदूर. अद कैंप तुन सफल कीयना काजे नरका-पियल मेहनत कीत्ता नवजवान कामरेड्स ना लोप्पा कामरेड सृजना वेने शामिल मत्ता. उंदी वडका कैंप ताकी कीयना काजे गट्टिंग मेहनत कीसोरे अद मिलिटरी कैंप ते वेने सक्रिय रूप ते शामिल आंदू, अद मिलिटरी कैंप ते कलियता कामरेड्स नेंडू वेने अस्के ता नवजवान मेहनती हुषार ता चिन्नक्का तुन सुरता किन्तोर. पेरके वेने ताना स्तर ओसो उम्र बेरस्तेके वेने ताना मेहनती स्वभाव ते उचुन वेने बदलाव वात्ता हिल्ले. अदू हमेशा ताना बंदूक तने साफ किंदू, समिष्टि काम ते शामिल आंदू, बचोको कैंपकुन सफलता ते ताकी कीयना लोप्पा ताना महत्वपूर्ण भूमिका मत्ता. अदू सीधा-सादा, अनुशासन ते मंदना, सबेतोर किन जीवा कीसी हूडाना कामरेड आंदू, आर्थिक अनुशासन तुन बराबर पालन किंदू, जनता ओसो कैडरकुना संगे अदू जीवंत संबंध ते जुडेमासी मत्ता. अदेन काजे जनता ना समस्यांग, दुख-सुख ओसो लड़ाई लोप्पा ओरा क्षमता बारे ते तानकु बेस जानकारी मंदू, जनता, कैडर खासकर महिलांग तमा जीवा ते मंदना पोल्लूंग किन पेरके-मुन्ने आयवालेवा ताना संगे वेहिंदूंग. अद्रम आसी अव सबेतवु किन जीवा लेहका सृजनक्का बनेमात्ता.

हत्ता दस सालकु तिना नडी नोयना, मिंडा नोयना, मोरकुल नोयना ओसो शारीरिक कमजोरी मत्तेके वेने अदू बस्के वेने विशेष सुविधा ताल्कतादू हिल्ले.

कामरेड सृजना 32 साल तल भीषण दमन तुन सामना कीसोरे दृढ़ता, हिम्मत ओसो बातय स्वार्थ लेवा क्रांति काजे महत्वपूर्ण योगदान हित्ता. जीवा मंदनाजोम जनता ना सेवा किन्तान इंजी, पार्टी सदस्यता हीयनास्के बेद किरिया कीसी मत्तयो, अद किरिया तुन तना पिस्वल ते मजबूती ते निल्लि कीसोरे आखिरी ते जनता मैदे तना जीवा ता कुर्बानी हित्ता. इद्रम सृजना क्रांतिकारी इतिहास ते प्रेरणा हीयना उदाहरण बनेमात्ता.

नेंडू कामरेड सृजना भौतिक रूप ते मावा नडमा हिल्ले. मति सृजना लेहका कामरेड्स किन तैयार कीयना भौतिक परिस्थिति नेंडु वेने मंता. नेंडु वेने कबिलाई पितृसत्ता ता शोषण ओसो उत्पीडन ता शिकार आयना महिलांग मैदे कामरेड सृजना ना क्रांतिकारी पिस्वल हमेशा प्रेरणा हियार. कामरेड सृजना ना आदर्श पिस्वल ना बारे ते जनता, पार्टी लोप्पा विस्तार ते प्रचार कियकाल. समाज ते ओसो क्रांतिकारी आंदोलन ते मत्ता पितृसत्ता विरोध ते संघर्ष कीयाकाल. नेटा कठिन परिस्थिति तल बाहर पेसना मैदे हिम्मत ते, दृढ़ता ते मंजि दोगवालेवा, रोमवालेवा कोशिश कीसोरे क्रांतिकारी आंदोलन किन मुन्ने ओयाकाल. दुश्मन ता दमन तुन हरा कीयाकाल. साम्राज्यवाद, दलाल नौकरशाही पूंजीवादी ओसो सामंतवाद किन हरा कीसी नवजनवादी भारत किन निर्माण कीयाकाल. अदे कामरेड सृजना ओसो ताना लेहका हजारों क्रांतिकारीलोर किन निट्टम ता श्रद्धाजंली आयर.

कामरेड सृजना अमर रहें!

तेलंगाना ता संघर्ष विरासत तुन पोरो तेहची

पोयत्ता कामरेड प्रमीला (मीना) किन लाल सलाम!

12 अक्टूबर, 2018 ते एओबी जोन, मलकानगिरी जिला, कटाफ एरिया ते पुलिस बलकु मलकानगिरी डिविजनल कमेटी सदस्या कामरेड प्रमीला (शारदा, जिलानी, मीना) किन हौकता.



तेलंगाना राज्य, तत्कालीन वारंगल (अब जनगांव) जिला, बच्चन्नापेटा मंडल, पोचन्नापेटा नाटे निम्न मध्यम वर्गीय परिवार ते 41 साल मुन्ने कामरेड प्रमीला पुटता. 1996 ता शुरु ते पेशेवर क्रांतिकारी बनेमासी का. प्रमीला गेरिल्ला पिस्वल ते

गोंजी वाटता.

मुन्ने चेयाल पेरके नेक्कोंडा ताना पेरके कंबाट पीएल ते अदू काम कित्ता. 1998 ते अरेस्ट आत्ता. दुश्मन बचोन रेहतना—कोट्टना कितेके वेने पार्टी ता उंदी पोल्लू वेने दुश्मन किन वेहता हिल्ले. पार्टी गोपनीयता किन बचे कित्ता. 8 महीना पेरके जेल तल छुटेमासी ओसो आंदोलन ते शामिल आत्ता. पेरके एटूर नागरम दलम ते काम कित्ता. अद दलम ते काम कीयनास्कें तना विचार ता कामरेड संगे मर्मी आता.

2001 ते विशेष महिला दलम ता कमांडर ओसो ऑर्गनाइजर जिम्मेदारी तानकु हियले मत्ता. महिलांग ना समस्यांग कुन पोयसी अविस्कून उंदी कट्ट कीसी आंदोलन कुन कामरेड प्रमीला नेतृत्व कित्ता. बेहरा संख्या ते महिलांग किन संगठन कुने, आंदोलन कुने शामिल कित्ता. गुरिल्ला दलम ते वेने महिलांग किन भर्ती कीसी पार्टी मैदे उंदी बेस ता अनुभव किन हासिल कित्ता. 2003 ते अद महादेवपूर एलओएस ता कमांडर बनेमात्ता.

2003 ते कामेड प्रमीला ना बच्चेदानी ते बोट्टांग पुटसी 2005 ते इलाज तुक बाहर हंजी ओसो अरेस्ट आता. दुश्मन मारपीट कीसी दसियों रकम ता केस तासी ओसो वरंगल जेल ते वाटतोर. जेल ते दूसरा—दूसरा कामरेडस संगे कलियसी अदू बचोनो संघर्ष कुने शामिल आता. 4 महीना पेरके तानकु जमानत दोरकता. इचुक दियांग पेरके ओसो गुरिल्ला पिस्वल ते मत्सी वात्ता. 2008 ते एओबी ते बदली आसी हत्ता. ओसो शहीद आयनाजोम अगाने तना योगदान हित्ता. मलकानगिरी ओसो विशाखा जिलांग ने अदू काम कित्ता. एरिया कमेटी सदस्या, एरिया कमेटी

सचिव, डीवीसी सदस्या ओसो डीवीसी सचिवालय सदस्या आसी अदू अगा ता व्यापक जनता लोप्पा काम कित्ता.

सैनिक क्षेत्र ते वेने कामरेड प्रमीला ता अनमोल योगदान मंता. कई मुठभेडकुने अदू हिम्मत ओसो साहस ता संगे दुश्मन संगे आमने—सामने लडेमात्ता. कई मुठभेडकुने कमांडर ता आदेश तुन पालन कीसोरे अड्वान्स आसोरे घायल आतोर कुन दुश्मन घेराव तल बाहर पेसी कित्ता. इचुन एंबुश ओसो रेडकुने वेने ताना भागीदारी मत्ता. इद्रम ताना 23 साल ता लंबा क्रांतिकारी पिस्वल ते कामरेड प्रमीला तेलंगाना ओसो एओबी ता क्रांतिकारी आंदोलनकुने महत्वपूर्ण योगदान हित्ता. कामरेड प्रमीला ता दृढसंकल्प ओसो प्रतिबद्धता ओसो आदू निल्पी कित्ता आदर्श तल सबेतोर करियाकाल!

कामरेड प्रमीला अमर रहें!

बस्तर भूमि ता मियाड़, पीएलजीए वीरांगना

कामरेड लखमे (रोशनी) अमर रहें!

12 नवंबर, 2018

ते दक्षिण बस्तर डिविजन, पामेड एरिया, एमपुरम – जारापल्ली नाहकु नडमा पीएलजीए ओसो सरकारी किराया सशस्त्र बलकुना नडमा ढाई घंटा ताकता उंदी मुठभेड ते इरवुर पुलिसतोर कुन हौकिसी 5 मुल किन घायल कित्तोर. इद घटना ते पुलिसतोनकु हरा कीयना दृढसंकल्प ता संगे लडेमासोरे बस्तर भूमि ता मियाड़, पीएलजीए ता वीरांगना ओसो बटालियन-1 ता कंपनी पार्टी कमेटी सदस्या कामरेड रोशनी शहीद आता.

दक्षिण बस्तर डिविजन, किष्टारम एरिया ता एंटापाडु नाटे 35 साल मुन्ने कामरेड रोशनी पुट्टी बेरस्ता. अदू हिडमे ओसो बंदो लखमाल ना चौथी ओसो सबेतोर किन सुडला



मियाड आंदू बाल संगठन ओसो केएएमएस ते ताना योगदान मत्ता. लोते 3-4 साल केएएमएस ते सक्रिय रूप ते काम कीसोरे क्रांतिकारी आंदोलन ते महिलांग कुन एकजुट कीयना लोपा ताना महत्वपूर्ण योगदान मंता. 2001 ते अदू पेशेवर क्रांतिकारी बनेमात्ता. उंदी साल किष्टारम एरिया ते काम कित्ता पेरके अदू टीडी (तकनीकी विभाग) ते बदली आसी हत्ता. अगा 4 साल काम कित्ता. टीडी ते काम कीयनास्के अगाने काम कीयना वर्रोर कामरेड किन विचार कीसी मर्मी आता. इचून दिया पेरके टीडी तल बदली आसी किष्टारम एरिया ते हत्ता. अगा केएएमएस ऑर्गनाइजर मंजी काम कित्ता. संगठन ते महिलांग कुन कट्ट कीयना ओसो लड़ाई ते अविना भागीदारी बेरसी कीयना मैदे अदू वेल्लाय कोशिश कित्ता.

पितृसत्ता उंदी आयवा सरकारी जुल्म, लूट, दमन, अत्याचार, सलवाजुडूम ओसो ग्रीनहंट विरोध ते महिलांग कुन आंदोलन ते जोड़े कीयना मैदे नरका-पियल मेहनत कित्ता. केएएमएस ता एरिया अध्यक्षा ता जिम्मेदारी वेने पोयसी काम कित्ता. 2010 ते कंपनी-2 ते बदली आत्ता. अगा वेल्लाय मेहनत कीसोरे अदू सैनिक कुशलता तुन हासिल कित्ता. अद्रम मेहनत कीसी सेक्शन कमांडर बनेमात्ता. कंपनी-2 ते काम कीयना महिला कामरेड्स कुन विकसित कीयना ते, तमाके-तमा सुडला हूडाना बुद्धि तल अविन बाहर पेसी कीयना मैदे कोशिश कीसोरे अविना आत्मविश्वास तुन बेरसी कीयनीकी कामरेड रोशनी कोशिश कित्ता. कंपनी-2 ताकी कित्ता बचोनो सैनिक कार्रवाईग ते अदू हिम्मत, साहस ओसो आत्मबलिदानी भावना संगे शामिल आता.

क्रांतिकारी आंदोलन ता जरूरत हिसाब ते 2015 ते ताना बदली बटालियन-1 ते आता. अगा तानकिन मुन्ने सेक्शन कमांडर ता जिम्मेदारी हियले मंता. उप ब्रांच सचिव ता जिम्मेदारी वेने पोयित्ता. ताना कामकाज, लड़ाकु क्षमता, दृढ़संकल्प ओसो सैनिक अनुभव तुन ध्यान ते तासी नवंबर, 2017 ते तानकुन सीवाईपीसी सदस्यता हित्तादू मंता. पेरके अदू पीएल डिप्टी ता जिम्मेदारी तुन निभा कित्ता.

ताना लंबा क्रांतिकारी पिस्वल लोप्पा बचोनो सैनिक कार्यवाहींग ते शामिल आता. ताकिलोड नाटे सीआरपीएफ पोरो कित्ता कार्रवाईग ते शामिल आता. डौला थाना पोरो कित्ता सरप्राइज अटैक ते, बदराकाली, नूकानपल्ली, कोरसील, सोलनार, नेरलीघाट, बंडारपल्ली, बेज्जी-कोत्ताचेरूवू बुरकापाल, तोंडेम, एलाडमडुगु, तिप्पुरम, गाजुलगुट्टा एंबुशकु ओसो हमलांग ते साहस संगे लड़ेमासोरे कामरेड रोशनी बेस ता भूमिका निभा कित्ता. इद आयवा वेने बचोनो सुडला-सुडला कार्रवाईग ते वेने ताना भागीदारी मंता. बचोनो युद्ध कार्रवाईग ते सेक्शन ओसो पीएल तुन नेतृत्व

कित्ता. ताना आखिरी लड़ाई ते कुरकी ते दूटा पडसी गंभीर घायल आतेके वेने कामरेड रोशनी हिम्मत हारे मायवालेवा तना संगे ता पीएलजीए योद्धालोरु किन अडवांस आयना काजे कॉशन हीसोरे मत्ता. इद्रम सैनिक हिसाब ते विकास आत्ता उंदी बेस ता महिला योद्धा कुन दंडकारण्य क्रांतिकारी आंदोलन पोहता.

कामरेड रोशनी ना आदर्श कुन मुन्ने ओयाकाल. अदे तानकु ओसो हजारों शहीदलोरु किन सही ता श्रद्धांजली आयार.

कामरेड रोशनी अमर रहें!

क्रांतिकारी जननेताल ओसो लालयोद्धा कामरेड

मेस्सी वेडदा (जरीना, सीमा) अमर रहें!

छत्तीसगढ़ राज्य, धमतरी जिला ता रावस एरिया कट्टीगांव जंगल ते 18 जून, 2019 ते सरकारी किराया सशस्त्र बलकुना हमला ते मैनपुर डिविजनल कमेटी सदस्या कामरेड सीमा शहीद आता. दंडकारण्य ते पुट्टी-बेरसी लगभग तीन दशक तल क्रांति ते तना योगदान हीयना कामरेड सीमा ओडिशा राज्य कमेटी ता नेतृत्व ते मैनपुर डिविजन आंदोलन ते 8 साल काम कीसी अगाने शहीद आता.



कामरेड मेस्सी उत्तर गढ़चिरोली डिविजन, कसनसूर एरिया, बुर्गी नाटे उंदी आदिवासी मध्यम किसान परिवार ते 50 साल मुन्ने पुट्टता. 1990 दशक ते क्रांतिकारी आदिवासी महिला संगठन ता सदस्या बनेमासी महिलांग ना अधिकारकुना मैदे लड़ेमात्ता. 1992 ते वह केएएमएस ता जिला कमेटी कार्यकारणी ता सदस्या चुनेमासी मत्ता. केएएमएस ते सक्रिय काम कीसोरे कबिलाई ओसो सामंती पितृसत्ता ता विरोध ते अदू संघर्ष कित्ता. 1993 ते पूर्णकालीन कार्यकर्ता लेहका गुरिल्ला दलम ते भर्ती आता. प्लाटून-1 ते काम कित्ता. 1997 ते संगे मत्ता वर्रोर कामरेड ना संगे मर्मी आता. 1998 ते माड डिविजन ते बदली आसी मत्ता. अगा कामरेड सीमा ना नियुक्त विशेष महिला दलम ते आता. 2000 ते अदू विशेष महिला दलम ता कमांडर ता जिम्मेदारी पोयित्ता. महिलांग किन क्रांतिकारी आंदोलन ते कट कीयनीकी विशेष हिसाब ते कोशिश कित्ता. बीनागुंडा ओसो गोडसूर हेरे ओसो मानपुर-बांदे रोड पोरो पुलिसबलकुना पोरो

कित्ता हमलांग ते पहलकदमी ओसो धीरा संगे दुश्मन संगे लडेमात्ता.

2006 ते अदू डिविजनल कमेटी सदस्या स्तर ते चुनेमात्ता. एलजीएस ता प्रभारी मंजी काम कित्ता. माड डिविजन ते जनताना सरकारकुना गठन ते कामरेड जरीना महत्वपूर्ण भूमिका तुन निभा कीत्ता.

लगभग 16 सालकु दंडकारण्य ता आंदोलन ते काम कीसि जून, 2010 ते मैनपुर डिविजन ते बदली आसी हत्ता.

अगा सीतानदी एरिया ते काम कित्ता. 2012 ते सीतानदी दलम ता कमांडर जिम्मेदारी पोयत्ता. 2013 ते नगरी एरिया कमेटी सचिव ता जिम्मेदारी पोयसी काम कित्ता. 2015 ते अदू मैनपुर डिविजनल कमेटी ता सदस्या बनेमासी मत्ता. मैनपुर डिविजन ते 8 सालकुना लोप्पा कामरेड सीमा पुलिस बलकुना संगे 17 मुठभेडकुने कलित्ता. लगातार ताकना दुश्मन ता गस्ती नडमाये अदू तना जिम्मेदारी तुन पूरा कित्ता.

उंदी अनपढ आदिवासी परिवार ते पुट्टी-बेरस्ता कामरेड सीमा पार्टी ते भर्ती आसी पढाई-लिखाई करियत्ता. एमएलएम सिद्धांत किन समझेमात्ता. जन आंदोलन ओसो जनयुद्ध ते जनता किन गोलबंद कीसोरे 30 सालकु गढचिरोली, माड ओसो मैनपुर आंदोलन ते काम कीसोरे अदू हमेशा-हमेशा मैदे जनता ना जीवा ते उदित्ता. उंदी अनुभवी महिला नेत्री ओसो लालयोद्धा जनता मैदे तना जीवा ता कुर्बानी हित्ता.

कामरेड सीमा अमर रहें!

सर्वहारा वर्ग ता जीवा ता नेताल

कामरेड कामेश्वरी (स्वरूपा, रिंकी) अमर रहें!



8 मई, 2019 ते ओडिशा राज्य, कोरापुट जिला, नंदपुर ब्लॉक, बडेल ग्राम पंचायत ता किटुवाकंठी नाटे हेरे डेरा वाटि मत्ता गुरिल्ला दलम तुन सरने घेराव कीसी ओडिशा राज्य ता स्पेशल ऑपरेशन्स गुप ओसो डिस्ट्रिक्ट वालंटरी फोर्स हमला कित्ता. इद हमला ते एओबी आंदोलन ता कोरापुट डीवीसी सदस्या कामरेड कामेश्वरी तना संगे ओसो 4 मुल कामरेड्स शहीद आतोर.

कामरेड कामेश्वरी आंध्रप्रदेश राज्य पूर्व गोदावरी जिला ता अमलापुरम ताल्लुका ते मुम्भडिवरम नाटे लगभग 45 साल मुन्ने पुट्टी बेरस्ता. पेरके ताना परिवार श्रीकाकुलम जिला ते तमा अक्को ना नारु बुडिति ते वासी अगाने पिस्सतोर. इंटरमीडिएट एवना पढेमात्ता पेरके कामरेड कामेश्वरी ना मर्मी ताना मामा (यायो ना तम्मूर) ना संगे कीसीत्तोर. तान किन उंदी पिल्ला वेने पुट्टा. मर्मी ता पेरके कामरेड कामेश्वरी आंध्रप्रदेश ता सडक ओसो परिवहन (आरटीसी) विभाग ते कंडक्टर ता नौकरी दोरकी कित्ता.

कामरेड कामेश्वरी नौकरी ता संगे-संगे क्रांतिकारी ट्रेड यूनियन ता कामकाज ते शामिल आता. अद समय ते अद क्षेत्र ता आरटीसी यूनियन तुन नेतृत्व कीसोरे मत्ता कामरेड श्रीनू ना संगे कामेश्वरी किन परिचय आत्ता. कामरेड श्रीनू तल प्रेरणा एतिसी कामरेड कामेश्वरी वेने सक्रिय कार्यकर्ता बनेमात्ता. मति तना लोन बिताल ताना कामकाज तुन विरोध कित्तोर. कामरेड कामेश्वरी ना क्रांतिकारी कामकाज ता कारण ते इरवुरा नडमा झगडा शुरू आत्ता. कोयतोना दबाव ते दबेमासी मन्नोन इंजो, कामरेड कामेश्वरी तलाक हित्ता. ताना पेरके अद तना कामकाज ते ओसो सक्रिय हिसाब ते काम कीयना शुरू कित्ता. पेरके कामेश्वरी ट्रेड यूनियन ता नेतृत्व ता जिम्मेदारी पोयत्ता. उंदी सक्षम नेतृत्व लेहका अदू विकास आत्ता. ट्रेड यूनियन ते ज्यादा हूडतेके कोयताराये ताकिन्ता. अद्रम ते उंदी महिला अद क्षेत्र ते नेताल लेहका विकास आयना मामूली पोल्लू आयो.

अद्रमतास्के कामरेड कामेश्वरी ता सुडला हेलो कामरेड श्वेता वेने पेशेवर क्रांतिकारी बनेमासी गुरिल्ला दलम ते कोज्जी तास्ता. मति, इचुन महीना पेरके पुलिसतोर कीत्ता उंदि हमला ते कामरेड श्वेता शहीद आता. इद घटना तल कामरेड कामेश्वरी पक्काय नाराज आत्ता. मति क्रांति मैदे ताना प्रतिबद्धता ओसो बेरस्ता. अद वेने पेशेवर क्रांतिकारी बनेमात्ता. इचुन समय ता पेरके ताना मर्मी कामरेड श्रीनू ना संगे आता. सितंबर 2009 ते अदू गुरिल्ला पिस्वल ते कोज्जी तास्ता. मुन्ने अदू ओडिशा राज्य ते काम कित्ता. इचुन महीनांग पेरके पुलिस ता उंदी हमला ते कामरेड श्रीनू शहीद आतोर. इद घटना तल कामरेड कामेश्वरी ना जीवा तुक ओसो उंदि बेरा बेहरा धक्का दलगताप आत्ता. मति अदू आंदोलन ते गट्टिंग नितिसी मत्ता. फरवरी, 2012 एवना अदू नियमगिरी इलाका ते काम कीत्ता. वेदांता कंपनी ता विरोध ते लडेमासी नियमगिरी मेट्टांग कुन बचे कीयना ते कामरेड स्वरूपा ता योगदान वेने मंता.

पेरके बदली आसि एओबी ते अत्ता. 2015 ते अदू कोरापुट डिविजनल कमेटी सदस्या बनेमात्ता. नंदपुर क्षेत्र ता आदिवासी ओसो दलित जनता लोप्पा अदू काम कित्ता. माली, देवमाली ओसो कोडंगमाली विस्थापन आंदोलन कुने

जनता किन एकता कीयना लोपा ताना पक्काय मेहनत मंता. इदे क्रम ते अदू शहीद आता.

कामरेड कामेश्वरी अमर रहें!

गढ़चिरोली ता संघर्षरत जनता ना जीवा ता

नेताल कामरेड कमला नरोटी (रामको) अमर रहें!

दक्षिण गढ़चिरोली डिविजन ता सदस्या कामरेड रामको किन 27 अप्रैल, 2019 ते भाम्रागढ़ ताल्लुका गुंडूरवाही नाटे हेरे सी-60 कमांडो तोर उंदी झूठी मुठभेड़ कीसी हौकतोर.



कामरेड कमला नरोटी 46 साल मुन्ने उत्तर गढ़चिरोली जिला, एटापल्ली तहसील, कसनसूर एरिया ता कोयनदूड़ नाटे उंदी धनी आदिवासी किसान परिवार ते पुट्टता. अदू पांडे ओसो मनकू नरोटी ना माडा मियाड़

आंदू. बाबल ना क्रांतिकारी गतिविधिग तल प्रभावित आसी कामरेड रामको वेने सुडला उमर तल क्रांति मैदे गिर्दा आत्ता. ताना बाबल अरेस्ट आता पेरके अदू तना नाटे जनता किन नेतृत्व कित्ता. 2001 ते तमा नाटे निर्माण आता महिला सेल ता सचिव ता जिम्मेदारी पोयत्ता. 2003 ते अदू जीपीसी सदस्या बनेमात्ता. 2004 ते अदू पूर्णकालीन कार्यकर्ता हिसाब ते गुरिल्ला दलम ते भर्ती आत्ता. दक्षिण गढ़चिरोली डिविजन ते गट्टा ओसो भाम्रागढ़ एरिया ते ताना सबे योगदान मंता. मुन्ने अदू कसनसूर गुरिल्ला दलम ते काम कित्ता. लगभग सालमेंड अगा काम कित्ता पेरके 2005 ते गट्टा दलम ते बदली आत्ता. 2006 ते अदे दलम ता कमांडर संगे कामरेड रामको ना मर्मी आता. 2007 ते कामरेड रामको किन एरिया कमेटी ते एतित्तोर. 2010 ते अदू कमांडर ता जिम्मेदारी एतित्ता. 2015 ते अदू एसी सचिव ता जिम्मेदारी एतित्ता. अदे साल दिसंबर ते जरगता डिविजन प्लीनम ते तान डीवीसी सदस्या लेहका चुना कीत्तोर.

गढ़चिरोली ते 2014 ते पेसा ओसो ग्रामसभा गठन कीयना शुरू आता. तेना अस्सल स्वभाव तुन कामरेड रामको जनता मुन्ने पर्दाफाश कित्ता. क्रांतिकारी हरी तल जनता किन लेसी कीयना मैदे लूटी सरकार इद्रम ता झूठी सुधारवादी कार्यक्रम किन तत्तामंता इंजी जनता किन समझे कित्ता. पेसा ओसो ग्रामसभा ता हरी ते आयो, जनताना सरकारकुना हरी ते मुन्ने दायना इंजी जनता

किन आह्वान कित्ता.

गढ़चिरोली ते शुरू तिना आंदोलन भीषण दमन तुन मुकाबला कीसोरे मुन्नेटकु दायामंता. अद दमन ते एरु लोप्पा किके मत्ताप जनता संगे कयली-मेयली मंजोरे पुलिस ओसो अर्द्धसैनिक बलकुना कैंपकु नडमाये अदू जनता किन एकता कीसी जन आंदोलन किन नेतृत्व कित्ता. जनसंगठनकु, जनताना सरकारकु ओसो पार्टी कमेटीग निर्माण कित्ता. गट्टा ओसो कसनसूर क्षेत्रकुना जनता ना नडमा मत्ता सूरजागढ़, दमनकोड़ी मेट्टांग लोप्पा मंदना लोहा तुन कारसी ओयला राज्य सरकार लॉयड ओसो मित्तल लेहकातोर दलाल पूंजीपतिर किन अनुमति हित्ता. इद खदान ता विरोध ते अगा ता जनता किन एकता कीसी संघर्ष ता हरी ते मुन्ने ओयना ते ताना योगदान मंता. पितृसत्ता ता विरोध ते अदू हमेशा संघर्ष कियानादू.

डिविजन आंदोलन ते महत्वपूर्ण भूमिका निभा कीयना कामरेड रामको शहीद आत्ताद दक्षिण गढ़चिरोली ता आंदोलन किन उंदी बेहरा नुकसान आंदू. मति इद क्रांतिकारी आंदोलन कमला नरोटी लेहका ता उंदी साधारण आदिवासी पिल्ला किन रामको पोरोय ता उंदी ऐतिहासिक योद्धा बने कित्ता. अदे क्रांतिकारी आंदोलन रामको लेहका ता हजारों शहीदीरा हरदे करोडों क्रांतिकारी योद्धालोरु किन पुट्टी कियर.

कामरेड रामको अमर रहें!

जनता ना जीवता जन नेताल

कामरेड लीलाबाई मरकाम (जमुना) अमर रहें!

कामरेड लीलाबाई (जमुना, सगुना, सागेन) 19 मार्च, 2019 ते तांडा क्षेत्र ता जंगल ते दुश्मन कित्ता उंदी हमला ते शहीद आता.

बालाघाट जिला, बैहर तहसील, माटे नाटे मध्यम वर्गीय आदिवासी परिवार ते कामरेड जमुना पुट्टी बेरस्ता. यायल रजलीबाई ओसो बाबल गेंदू



मरकाम ना सात पिल्लांग-पेकोरा लोप्पा जमुना छटवी मियाड़ आंदू. साम्राज्यवादी - सामंतवादी शोषण ओसो रीति-रिवाज, पितृसत्ता बोजा ते महिलांग ना जिंदगी दबेमासी मंता. इद भारत देश ता हर क्षेत्र ओसो हर समाज

ते मंदना परिस्थिति आंदू. आदिवासी समाज ते वेने अद्रमतये परिस्थिति मंता. सुडला पहर ते मर्मी कीयना रिवाज महिलांग किन गुलामी ते दोहची तासीन्ता. इद रिवाज ते जमुना किन वेने दोहची तासतोर. अदे समय ते क्रांतिकारी आंदोलन तेके ताना गिरदा बेरस्ता. 1992 तल 1996 एवना प्रचार दलम ते जिम्मेदारी निभा कित्ता पेरके नियमित हिसाब ते दलम ते 1996 ते शामिल आता. पितृसत्ता ओसो महिला विरोधी विचारकुना विरोध ते अदू हमेशा सतर्क ते नितिशी मंदान्दू ओसो इद्रम ता विचारकुना विरोध ते मजबूती ते लडेमान्दू अदू बालाघाट जिला ता परसवाडा, मलाजखंड ओसो तांडा दलम ते सदस्य लेहका ताना योगदान हित्ता. पार्टी ता आदेश हिसाब ते अदू बालाघाट, राजनांदगांव, गोंदिया ओसो गढ़चिरोली जिला ते हंजी वेने तना योगदान हित्ता. 2004 ते अदू एरिया कमेटी ता सदस्य बनेमात्ता. इगा ता जनता किन संगठित कीयना ते ताना बेहरा योगदान मंता. महिलांग ना लोप्पा क्रांतिकारी चेतना कुन बेरसी कीयना कारण ते महिला दिवस मानेमायना तल पोयतेके अलग-अलग क्रांतिकारी कार्यक्रमकु, आंदोलनकुने अदू जनता किन बेस संगठित कीयनादू.

टांडा क्षेत्र ते जनचेतना ओसो जनयुद्ध तुन विकास कीसोरे जनसत्ता ता मोल्का लेहका क्रांतिकारी जन कमेटींग बना कीसी मत्तोर. जनता तमा कालकु पोरो नित्तना हूडसी सरकार ना जीवा सांगता. जनता ना विकास काम पोरो हमला कीयना शुरू कित्ता. कामरेड जमुना किन टारगेट कीसी पुलिसतोर बचोनो बेरा हमला कित्तोर. हर हमला तुक जनता संगे कलियसी पीएलजीए जवाब हित्तादू मंता. जमुना जनता किन राजनीतिक, आर्थिक, सामाजिक हिसाब ता संगे-संगे सांस्कृतिक विषयकुना पोरो वेने सचेत किन्दू आदिवासी संस्कृति पोरो ब्राह्मणीय हिंदुत्व फासीवादी हमलांग ता विरोध ते आदिवासी अस्मिता किन बचे कीयना मैदे उंदी संगठने बने कित्तादे आयो, ताना संगेने हिंदू धर्म ओड़ियना तुन विरोध कीयना मैदे जनता किन गोलबंद कीसोरे आदिवासी संस्कृति तुन राका कित्ता.

तेंदूपत्ता कोय्यना ता कूली रेट ओसो वेदुर कटाई ता कूली रेट बेरसी कीयना मैदे हर साल जनसंघर्ष कुन जमुना ताकी कित्ता. जंगल ते दोरकना चीजकुना संगे-संगे टांडा क्षेत्र ते खनिज संपत्ति वेने भरपूर मंता. टुंडागढ़ ओसो बंसतपुर ते खदान कारना काजे सरकार कोशिश कित्ता. ताना विरोध ते जमुना ना नेतृत्व ते जनता लगातार तेनकुन विरोध कित्तोर. तानगडल इंजे एवना टांडा क्षेत्र ता जनता विस्थापित आयनागडल बचेमात्ता. महिलांग ना विकास कुन ध्यान हीसी पार्टी डिविजन स्तर ते महिला सब कमेटी बनेकित्ता. अस्के वेने जमुना अद कमेटी ता महत्वपूर्ण सदस्या बनेमात्ता. उंदी साधारण सदस्य तल पोयसी डिविजन स्तर ता नेतृत्व एवना तना क्रांतिकारी सफर तुन

पूरा कीयना मैदे बचोनो उतार-चढाव वात्ता, कठिन परिस्थितिंग वात्ता. मति अदू बस्के वेने हिके-हके आत्तादू हिल्ले. पार्टी दिशा ओसो सिद्धांत पोरो तानकु दृढ़ विश्वास मत्ता. अदू शोभा ता मैदे ओसो पोरो तोहना काजे आयवा लेवा लक्ष्य किन पूरा कीयना मैदे मुन्ने डाका वाटसोरे भारत क्रांतिकारी इतिहास ते अनमोल योगदान तुन निलपी कित्ता. सांगठनिक कुशलता संगे सैनिक कार्रवाईंग ते वेने जमुना ता योगदान मरंगा परवोम. नारंगी एंबुश ओसो इद्रम ता बीसियों सैनिक कार्रवाईंग ते शामिल आसी उंदी बहादुर योद्धा लेहका बनेमात्ता. जमुना लेहका जननेताल लूटी सरकार तुक, खनिज संपत्ति किन लूटी कीयना साम्राज्यवादी ओसो दलाल नौकरशाही पूंजीपतिरा लूट तुक अड्डम नित्ता मंतोर इंजी सरकार बचोनो संयुक्त दमन अभियान ताकी कित्ता. अद्रमताये उंदी अभियान 19 मार्च, 2019 ते ताकता अद हमला ते कामरेड जमुना दुश्मन संगे लडेमासोरे शहीद आता.

कामरेड जमुना अमर रहें!

कामरेड कोवासी रुकनी (निर्मला)

ओडिशा राज्य कमेटी लोप्पा बीजीएन डिविजनल कमेटी ता सदस्या ओसो घुंसरा एरिया कमेटी ता सचिव कामरेड रुकनी (42 साल) 9 सितंबर, 2020 ते शहीद आता. ओडिशा राज्य, कंदमाल जिला, बीजीएन डिविजन घुंसरा एरिया सिरा नाटे हेरे पुलिसतोर कित्ता हमला ते अदू तना जीवा ता कुर्बानी हित्ता.

नवजनवादी क्रांति किन सफल कीयना लक्ष्य पोयसी ओडिशा राज्य ते तना नेतूर पोहता कामरेड रुकनी बस्तर भूमि ता मियाड आंदू. दक्षिण बस्तर डिविजन पामेड एरिया, कोंजेर नाटे कामरेड रुकनी पुटता. 1998 ते पेशेवर क्रांतिकारी लेहका गेरिल्ला पिस्वल ते गोंजी तासता. लगभग 22 साल तना लंबा क्रांतिकारी पिस्वल ते अदू कई क्षेत्रकुना लोप्पो तना योगदान हित्ता. इंजे इतेके ताना जीवनी मायगा वात्ता हिल्ले. वायना अंक ते ताना जीवनी तुन प्रकाशित कीयाकोम.



कामरेड रुकनी अमर रहें!

अमर शहीद वीरांगनास्कुन श्रद्धाजंली!

हिंदी ते 'संघर्षरत महिला' ता हत्ता अंक ता प्रकाशन मार्च, 2018 ते आसी मत्ता. ताना लोष्णा 2017 आखिरी एवना शहीद आत्ता महिला कामरेड्स कुना जीवनींग छापे कीसी मत्तोम. अस्के तल इंजे एवनाल इद तीन सालकुना लोष्णा जनयुद्ध तुन मुन्ने ओसोर दंडकारण्य ता बचोनो वीर मियास्कु तमा अनुमोल जीवा ता कुर्बानी हित्तांग. पत्रिका ता पन्नांग कुन ध्यान ते तासीसी सिर्फ आरसी, डीवीसी स्तर ता कामरेड्स ना जीवनींग इद अंक ते छापे कीसोर मंतोम. इद तीन सालकुना लोष्णा शहीद आत्ता दंडकारण्य ता वीरांगनास्कु-एसी स्तर, पार्टी ओसो पीएलजीए सदस्यीर कुना फोटो मायगा मत्ता अचोन छापे कीसोरे मंतोम. इद मावा कोशिश ते बातय गलती मत्तेके, माफी ताक्कामंतोम.

- संपादक मंडल



कामरेड ओयम सुक्की (क्राति)
आई टीम सदस्या
शहादत: 5 जनवरी, 2018



कामरेड कुंजाम सन्नी
नागारम एलओएस सदस्या
शहादत: 17 फरवरी, 2018



कामरेड सोडी पांडे (रामे)
सीआरसी कंपनी-2, सेक्शन कमांडर
शहादत: 2 मार्च, 2018



कामरेड कुहडम कोसी
सीआरसी कंपनी-2, पीपीसीएम
शहादत: 2 मार्च, 2018



कामरेड कुम्मा (संगीता)
खम्म एलओएस -एसीएम
शहादत: 2 मार्च, 2018



कामरेड तेलम रामे (रला)
सीआरसी कंपनी-2, पीएम
शहादत: 2 मार्च, 2018



कामरेड हेमला पायकी (ललिता)
गार्ड टीम- पार्टी सदस्या
शहादत: 2 मार्च, 2018



कामरेड उंडम जोगी (ललिता)
सीआरसी कंपनी-2, पीएम
शहादत: 2 मार्च, 2018



कामरेड माडवी शांति (सोनी)
गार्ड - पार्टी सदस्या
शहादत: 2 मार्च, 2018



जुनकी दोषाटे (पाली)
कंपनी-4 की सेक्शन कमांडर
शहादत: 25 मार्च, 2018



कामरेड मुसाकि उंगी (आरती)
सीआरसी कंपनी-3, पीपीसीएम
शहादत: 25 मार्च, 2018



कामरेड पोट्टाम कोसी
सीआरसी कंपनी-3, पीपीसीएम
शहादत: 25 मार्च, 2018



कामरेड पाइके (रणिता)
सीआरसी कंपनी-3, पीपीसीएम
शहादत: 25 मार्च, 2018



कामरेड मुचाकी लक्के
गार्ड, पीएलजीए सदस्या
शहादत: 25 मार्च, 2018



महरी वडे (लता)
अहेरी एरिया कमेटी सचिव
शहादत: 22 अप्रैल 2018



मंगली पद्दा (शांता)
अहिरी एरिया कमांडर
शहादत: 22 अप्रैल 2018



जन्नी मटामी (लिमि)
एरिया कमेटी सदस्या
शहादत: 22 अप्रैल 2018



शामको झूरे (जमुना)
पीएल-7 की उप कमांडर
शहादत: 22 अप्रैल 2018



शांति गावडे (ललिता)
पीएल-14 की उप कमांडर
शहादत: 22 अप्रैल 2018



जन्नी तलंडी (चंद्रकला)
अहेरी एरिया कमेटी सदस्य
शहादत: 22 अप्रैल 2018

| | | | | |
|---|---|---|--|---|
|  |  |  |  |  |
| पाली माहका (राधा) अहेरी एरिया कमेटी सदस्या शहादत: 22 अप्रैल 2018 | पोटामी सुक्की (रेश्मा) पीएल-14 की सदस्या शहादत: 22 अप्रैल 2018 | पूो कोडापे (सुनीता) अहेरी दस्ते की सदस्या शहादत: 22 अप्रैल 2018 | बन्नी गावडे (जयशिला) अहेरी दस्ते की सदस्या शहादत: 22 अप्रैल 2018 | तुलसी धुर्वा (रुकमति) पीएल-14 की सदस्या शहादत: 17 फरवरी, 2018 |
|  |  |  |  |  |
| वेडदे कोवासी (रजनी) पीएल-14 की सदस्या शहादत: 22 अप्रैल 2018 | मूको परसा (रेश्मा) पीएल-14 की सदस्या शहादत: 22 अप्रैल 2018 | बाली लेकामी (जानकी) पीएल-7 की सदस्या शहादत: 22 अप्रैल 2018 | बाली मडावी (अनिता) पेरिमिल दस्ते की सदस्या शहादत: 22 अप्रैल 2018 | मैनी मडावी (मंदा) अहेरी दस्ते की सदस्या शहादत: 22 अप्रैल 2018 |
|  |  |  |  |  |
| पूनेम बुज्जी (क्रांति) पीएल-7 की सदस्या शहादत: 22 अप्रैल 2018 | कामरेड सोनी पीएल 14 की सदस्या शहादत: 22 अप्रैल 2018 | वेलादी कमली पीएल-11 की सदस्या शहादत: 27 अप्रैल, 2018 | वेट्टी अनिता मद्देड एलजीएस की सदस्या शहादत: 27 अप्रैल, 2018 | मडकाम कोसी मद्देड एलजीएस की सदस्या शहादत: 27 अप्रैल, 2018 |
|  |  |  |  |  |
| उईका मासे मद्देड एलजीएस की सदस्या शहादत: 27 अप्रैल, 2018 | ओयामी कमली मद्देड एलजीएस की सदस्या शहादत: 27 अप्रैल, 2018 | आलम कमला पलटन-17 की सदस्या शहादत: 27 अप्रैल, 2018 | कामरेड शीला सप्लाई दस्ते की सदस्या शहादत: 13 मई, 2018 | कामरेड राधा पार्टी सदस्या शहादत: 13 मई, 2018 |
|  |  |  |  |  |
| कामरेड मडकाम विज्जे सीआरसी कंपनी-2 की सदस्या शहादत: 21 मई 2018 | कामरेड हिडमे किष्कारम एरिया - पार्टी सदस्या शहादत: 11 जुलाई, 2018 | कामरेड कारम कमला (झरिना) मानपुर एसीएम शहादत: 18 जुलाई, 2018 | कामरेड जैनी मश्चिम बस्तर-कॉएएमएस-एसीएम शहादत: 19 जुलाई, 2018 | कामरेड मिच्चा सुगुना पीएल-13 की सदस्या शहादत: 19 जुलाई, 2018 |

| | | | | |
|---|---|---|--|---|
|  |  |  |  |  |
| कामरेड माडवी बुदरी पीएल-13 की सदस्या शहादत: 19 जुलाई, 2018 | कामरेड ओडी भीमे पीएल-13 की सदस्या शहादत: 19 जुलाई, 2018 | कामरेड माडवी शांति भैरमागढ़ डाक्टर टीम सदस्या शहादत: 19 जुलाई, 2018 | कामरेड रुकनी भैरमागढ़ एसीएम शहादत: 16 अगस्त, 2018 | कामरेड सोनारी नेलनार एरिया की सदस्या शहादत: 2 सितंबर, 2018 |
|  |  |  |  |  |
| कामरेड रामशिला काडेंग एरिया की सदस्या शहादत: सितंबर, 2018 | कामरेड हपका बूधी (ज्योति) पीएल-31 की सेक्शन कमांडर शहादत: 22 नवंबर, 2018 | पोडियम राजे दक्षिण बस्तर सीएनएम-एसीएम शहादत: 26 नवंबर, 2018 | कामरेड माडवी सोमडी गार्ड - पार्टी सदस्या शहादत: 26 नवंबर, 2018 | माडवी शांति आई टीम की सदस्या-पीएम शहादत: 26 नवंबर, 2018 |
|  |  |  |  |  |
| कामरेड शांता (बबिता) कंपनी-4 की डॉक्टर शहादत: दिसंबर, 2018 | कामरेड वंजम आयते बटालियन की पार्टी सदस्य शहादत: 26 मार्च, 2019 | कामरेड मोड़ियामी सुदरी बटालियन की पार्टी सदस्य शहादत: 26 मार्च, 2019 | कामरेड शिल्पा सीएनएम कमांडर-एसीएम शहादत: 27 अप्रैल, 2019 | कामरेड हेमला मासे (मुन्नी) गोब्रा एलओएस की सदस्या शहादत: 6 जुलाई, 2019 |
|  |  |  |  |  |
| कामरेड अड़मे कोवासी (अनिता) गार्ड शहादत: 6 जुलाई, 2019 | कामरेड मासे पोडियामी (दुर्गा) गोब्रा एलओएस की सदस्या शहादत: 6 जुलाई, 2019 | कामरेड कुहराम भीमे बटालियन-पीपीसीएम शहादत: 9 जुलाई, 2019 | कामरेड सनी (नंदे) एमएमसी, गार्ड शहादत: 9 जुलाई, 2019 | कामरेड बंडी (मंगली) मलेंगेर एरिया - पार्टी सदस्या शहादत: 14 जुलाई, 2019 |
|  |  |  |  |  |
| कामरेड सोड़ी गंगी पीएल-4 की पार्टी सदस्या शहादत: 28 जुलाई, 2019 | कामरेड रूपी नरोटी (सुशीला) कंपनी-10 की डॉक्टर शहादत: 29 जुलाई, 2019 | कामरेड प्रमीला दर्रेकसा एसीएम शहादत: 3 अगस्त, 2019 | कामरेड मडकम जोगी (सीमा) दर्रेकसा दस्ते की पार्टी सदस्या शहादत: 3 अगस्त, 2019 | कामरेड मीना दर्रेकसा दस्ते की सदस्या शहादत: 3 अगस्त, 2019 |



कामरेड सोडी सोमी (शिल्पा)
एमएमसी, पीएल-1 की सदस्या
शहादत: 3 अगस्त, 2019



कारम लक्के (ललिता)
एमएमसी, पीएल-1 की सदस्या
शहादत: 3 अगस्त, 2019



कामरेड मड़काम भीमे
बटालियन सदस्या
शहादत: 9 सितंबर, 2019



कामरेड सोमली कुंजाम (समिला)
कंपनी-4 की सदस्या
शहादत: 15 सितंबर, 2019



कामरेड बंडी (जुगनी)
एमएमसी, बोडला एसी, पीएम
शहादत: 29 सितंबर, 2019



कामरेड मासे
8वीं पीएल की पार्टी सदस्या
शहादत: सन् 2019



कामरेड सगुना
पीएल-16 की पार्टी सदस्या
शहादत: 7 अक्टूबर, 2019



कामरेड सनबती पोटावी (प्रमीला)
उत्तर बस्तर डिविजन
शहादत: 9 अप्रैल, 2020



कामरेड रनाय पोटावी
सप्लाई टीम की कमांडर
शहादत: 20 अप्रैल, 2020



कामरेड आयते रब्बा (प्रमीला)
औंधी-मोहला संयुक्त एसी
शहादत: 8 मई, 2020



कामरेड मोती सलाम (सबिता)
औंधी-मोहला संयुक्त एसी
शहादत: 8 मई, 2020



कामरेड मासे (चांदिनी)
ओडिशा, गार्ड, पीएम
शहादत: 5 जुलाई, 2020



कामरेड ओडी सोमिडी (क्रांति)
कलहंडी दस्ते की कमांडर
शहादत: 23 जुलाई, 2020



कामरेड कलुम मंगी (ललिता)
तेलंगाना में कार्यरत थी
शहादत: सितंबर, 2020



कामरेड कुंजम रामबति (कविता)
ओडिशा, गार्ड, पीएम
शहादत: 9 सितंबर, 2020



कामरेड गीता
ओडिशा में कार्यरत
शहादत: 9 सितंबर, 2020



कामरेड शुल्की पद्मा (सुमन)
टिप्रागढ़ एसीएम
शहादत: 18 अक्टूबर, 2020



कामरेड रज्जो किरका (समिता)
टिप्रागढ़ एसी - पार्टी सदस्या
शहादत: 18 अक्टूबर, 2020



कामरेड मासे बाडसे (चंदा)
टिप्रागढ़ एसी - पार्टी सदस्या
शहादत: 18 अक्टूबर, 2020



कामरेड मनोती गावडे (कुमली)
कोरची दस्ते की पार्टी सदस्या
शहादत: 18 अक्टूबर, 2020



कामरेड पूनेम पोटिये (शारदा)
एमएमसी, पीएल-2 की पीएम
शहादत: 6 नवंबर, 2020



कामरेड भीमे पोटियाम (ज्योति)
कंपनी-5 की पार्टी सदस्या
शहादत: 23 नवंबर, 2020



कामरेड कमला आत्रम (सुजाता)
उत्तर गढ़चिरोली, गार्ड, पीएम
शहादत: 29 मार्च, 2021



कामरेड योगिता पद्दा (अस्मिता)
उत्तर गढ़चिरोली, गार्ड, पीएम
शहादत: 29 मार्च, 2021

जन संघर्षकुना लोपा महिलांग ना भागीदारी!

दंडकारण्य ता भूमि ते मंदना अपार प्राकृतिक संपदा कुन लूटी कीयना मैदे कॉरपोरेट घरानांग ना कोशिश दिया-दिया तुक बेरसोरे दायामंता. तेना लोप्पा इगा ता संसाधनकुन ओयना लक्ष्य तल कई खदानकु, बांध परियोजनांग, संयंत्रकु मैदे समझौतांग कित्तोर. इव परियोजनांग किन अमल कीयना मैदे कॉरपोरेट संस्थांग ओसो सरकारकु पक्काय कोशिश कीसोरे मंतांग. इद लूट तुक इगा ताकाना क्रांतिकारी आंदोलन अड्डम नितित्ता. अदेन मैदे इगा ताकाना क्रांतिकारी आंदोलन ओसो इद आंदोलन तल विकास आसोरे, विस्तार आयना जनताना सरकारकुन (जनसत्ता) ध्वस्त कीयना लक्ष्य संगे देशी-विदेशी कॉरपोरेट घरानांग ना देख-रेख ते इगा दिया-दिया तुक दमन बेरसामंता. तेना काजेने दंडकारण्य ते 1 लाख 70 हजार तल ज्यादा संख्या ते सरकारी सशस्त्र बलकु तैनात कियले मंता. कॉरपोरेट सिक्यूरिटी ता लोप्पा नाहकु-नाहकुने पुलिस कैंपकु निर्माण आसोर मंता. मति दमन बेस्के वेने जन-प्रतिरोध किन बेरसी किंता. इद ऐतिहासिक सच्चाई तुन साबित कीसोरे, वर्तमान समय ते इगा दमन ता विरोध ते जनसंघर्ष ता ऊसा तुन हूडा मंताल. इव जनसंघर्ष ते महिलांग ना महत्वपूर्ण भागीदारी मंता. सरकारी दमन ते, विस्थापन ते लेवेके बाकी समस्यांग ना कारण ते महिलांग ना पिस्वल ओसो तिप्पल ते अरसोरे मंता. इगा दमन ते बचोनो महिलांग कुन पोयसी हौकतोर. बचोनो महिलांगकुन अत्याचार कित्तोर. बचोनो महिलांग अरेस्ट आसी, झूठा केस ते जेल ते मंतांग. पुलिसतोर बचोनो महिलांग किन रेहतामंतोर, मुंडाड कीसोरे डरा-धमका कीयमंतोर. बचोनो महिलांग तना कोयतोन, पिल्ला-पेकोर किन पोहतांग. बचोनो महिलांग ना लोतुन किस वाटी निर् कीसीत्तोर. महिलांग मेहनत कीसि गड्ढता पैसा, फसल, वनोपज किन, पोसे कीयना जानवर गोडकु, मेका-पददी, कोरूकु ओसो दूसरा कई रकम ता चीजकुन पुलिसतोर लूटी कीसोर मंतोर. इद दमन ता कारण ते महिलांग ना पिस्वल सहेमाया परवा आसोरे मंता. नाटे-नाटे वाटाना पुलिस कैंपकु महिलांग ना पिस्वल तुक सुरक्षा लेवा कीया मंता. ताना कारण ते अपूना जंगल ते, अपूना ओडकु-वेडांगकुने, आखिरी ते अपूना लोते वेने अविस्कुना पिस्वल सुरक्षा लेवाप आयामंता. अविस्कुन हर मिनट खतरा ते मत्तप आयमंता. इद्रम ता परिस्थिति ते महिलांग ना पिस्वल इनम आसोरे मंता.

विस्थापन वेने महिलांग ना पिस्वल कुन ओसो पक्काय प्रभावित कीसोर मंता. इगा ता जनता ना अनुभव लोपा बच्चोको उदाहरणकु मंता. इगा ता बैलाडीला खदान कुना कारण ते लगभग 50 साल मुन्ने 22 हजार तल ज्यादा मानय किन विस्थापन कीत्तोर. मुआवजा ओसो नौकरींग ना सपना तोहची लेवेके जबर्दस्ती ओरकुन विस्थापित कीत्तोर.

सरकारकुना आश्वासन चुच्चय झूठ साबित आसोरे, इगातल विस्थापित जनता ओसो ओरा पिल्ला-पेकोर शहरकुने मजदूरी लेवेके सुडला-सुडला काम कीसोरे पिस्सामंतोर. बचोनो महिलांग मेंदुल वम्मीसी पिस्सामंतांग. अविना पिस्वल किन हिकाड ते दोबसित्तोर.

इद्रम ता बचोनो अनुभवकुनाल इगा ता जनता लोप्पा संघर्ष पोरो विश्वास बेरसतादू मंता. इंजे वेने ओरा मुन्ने रेंडू हरींग मंता - उंदी बातल इतेके ओरू इद दमन तुन केमेक मंजी सहेमायना, तला ओडच कीसी मंदाना, परिस्थितिंग संगे समझौता आसी पिस्सना, अपूना अस्तित्व-अस्मिता ओसो आत्मसम्मान वम्मसी गुलामी तुन स्वीकार कीयना. ओसो दूसरा हरी बातल इतेके अपूना जल-जंगल-जमीन कुन बचेकीयनीकी, तमवा ओसो तमा पिल्ला-पेकोरा भविष्य किन बचे कीयनीकी संघर्ष कीयना. इगाता मेजारिटी जनता आत्मसम्मान तुन पोहची गुलामी तुन स्वीकार कीयनीकी तैयार हिल्लोर. इद स्वाभाविक वेने आंदू. इद्रम ता गुलामी किन मानेमायला तैयार हिल्ला कारण ते 110 सालकु मुन्ने ताकतवर ब्रिटिश साम्राज्यवादी विरोध ते महान भूमकाल लडाई ताकता. इद महान विरासत मत्ता जनता ना मुन्ने लगभग 50 साल निण्डता नवजनवादी क्रांति ता अनमोल अनुभव वेने मंता. इद क्रांति ता चेतना ओसो राजनीति पोयसी मंदना जनता गुलामी आयो, गुलामी तुन उसकीसी पोहतना संघर्ष ता हरी तुन चुने कित्तोर. महिलांग इद गुलामी तल ज्यादा प्रभावित आयनुंग. अदेन अविस्कुना भागीदारी इद संघर्षकुने ओसो सक्रिय आत्ता. इचून आंदोलन किन महिलांगे नेतृत्व कीयामंतांग. सुडला पिल्लांग तल पोयसी सियान आता डोकरी यायो वेने इवु आंदोलनकुने मुन्ने ताकामंता. पाल उंडना पिल्ला किन संका ते एतिसी, दूसरा कैदे संघर्ष ता लाल झंडा किन पोयसी मुन्ने हंजोर, इव महिलांग इद देश ता वायना कालम मैदे बेस ता आश्वासन हीसोरे मंतांग.

कोया ते उंदी कहावत मंता 'मुत्ते ना पोल्लू मुला ते' ताना अर्थ बातल इतेके मुत्ते ना पोल्लू किन पोयत्तना आयो इंजी, मति इद्रम ता समाज तल वात्ता महिलांग नेंडू बंदूक पोयत्ता सरकारी सशस्त्र बलकुना मुन्ने नितिसी जोरदार मेट्टांग-गुट्टांग गुड्जनाल "पुलिस कैंपकु वापस दायना" नारांग हीसोरे मंता. जल-जंगल-जमीन पोरो तमा हक-अधिकार किन वेहचोरे भाषण हीसोरे मंता. 'इद ग्राम सभा ता अनुमति लेवा बद्रम खदान कारकिर?' इंजो मंत्रि, जिला कलेक्टरकुन संविधान ता सुरता कीसोरे मंतांग. बाता गलती तुक मावा मानय किन पोयदामितीर इंजो पुलिस ता बेहरा अधिकारीर कुन सवाल कीसोरे कानूनी पढाई तुन कारहता मंता. लूटी सरकार लागो इंजोरे 'मावा नाटे मावा राज' इंजी बेहरा लेंग तेहची घोषणा कीयामंतांग.

हत्ता रेंड सालकु तिना महिलांग ना जबर्दस्त भागीदारी ते दंडकारण्य ते कई जनसंघर्षकु ताकतादू मंता. अद्रमताये इचून संघर्षकुन इगा हूडाकाल.

पिट्टोड़ मेट्टा बचा कीयना आंदोलन

बैलाडीला ता मेट्टांग लोप्पा मंदाना 13 नंबर ता पिट्टोड़ मेट्टा (नंदराज मेट्टा) तुन छत्तीसगढ़ सरकार अडानी समूह किन लोहा काराना काजे ठेका हित्ता. तेना विरोध ते बस्तर संभाग ता दक्षिण इलाकांग ते मंदना 200 तुक ज्यादा नाहकुना जनता उंदी एकता आसी संघर्ष शुरू कित्तोर. 2 मार्च, 2019 ते 20 हजार तल ज्यादा संख्या ते आदिवासीर ओसो गैर आदिवासी जनता किरंदूल ते जोरदार प्रदर्शन कितोर. पेरके 25 हजार तल ज्यादा संख्या ते जनता बैलाडीला ते रैली टेंडतोर. इद आंदोलन ते महिलांग



ना महत्वपूर्ण भागीदारी मंता. महिलांग सुडला-सुडला पिल्लांग किन एतिसी बचोन तिप्पल मत्तेके वेने पक्काय जेक तल ताकीसी किरंदुल एवतांग. 7 जून तल 13 जून एवना पूरा हाटूममेंड अगा आंदोलनकारीर धरना कित्तोर.

स्लरी पाईप लाइन ता विरोध में

एनएमडीसी बस्तर ते बचेली तल नगरनार एवना 138 किलोमीटर ता स्लरी पाईप लाइन ताराना योजना संगे काम कीयामंता. इद परियोजना ता अंतर्गत वायना कालम ते किरंदुल तल बचेली एवना जोड़ेकीयना ओसो



नगरनार तल विशाखापट्टनम एवना पाईप लाइन विस्तार कीयना योजना वेने मंता.

बचोनो नाहकुना लोप्पा इद योजना तुन विरोध कीसोरे मंतोर. नाटेनोर आंदोलन कीसोरे मंतोर. 4 जून, 2019 ते जिला प्रशासन, पुलिस प्रशासन ओसो एनएमडीसी ता अधिकारीर डिलमिली इलाका ता मावलीभाटा ओसो पत्थलीगढ़वा नाहकुना सर्वे कीयना मैदे हत्तोर अस्के जनता जोरदार विरोध प्रदर्शन कित्तोर. होंग आत्ता नाटेनोर तमा कैदे मर्स ओसो बड़गा पोयसी तेना विरोध कित्तोर. इद आंदोलन ते महिलांग ज्यादा संख्या ते शामिल आतांग. अव 'हल्लटू कानून पढ़ेमासी वायकीर' इंजो वेहतांग.

पोटाली पुलिस कैंप विरोध ते

दरभा डिविजन ता पोटाली नाटे जनता गट्टिंग विरोध कित्तोके वेने सरकार 11 नवंबर, 2019 ते पूना पुलिस कैंप तासता. तेना विरोध कीसोरे 12 नवंबर ते जनता, मर्सकु, विल-काडी ओसो बड़गा लेहकातांग तमा पारंपरिक हथियार पोयसी नालूंग वड़का तल कैंप कुन



घेराव कित्तोर. पुलिस बलकु लाठी चार्ज कित्तोर. हवाई फैंरिंग कित्तोर. ताना कारण ते लगभग 150 जन घायल वेने आतोर. इचोन आतेके वेने जनता 4 दियांग लगातार आंदोलन कित्तोर. पुलिस बलकु लाठींग, गोलींग संगे रैड पुट्टी कित्तोके वेने महिलांग इद आंदोलन ते गट्टिंग नितित्तांग.

कड़ियामेट्टा कैंप ओसो आमदाई खदान ता विरोध ते

जनवरी, 2020 ते पूर्व बस्तर डिविजन, जगदलपुर जिला, लोहंडीगुड़ा ब्लॉक, मारडूम थाना अंतर्गत पल्ली-बारसूर रोड ते एरपुंड ग्राम पंचायत लोप्पा बोदेली ओसो कड़ियामेट्टा नाहकुना जनता बचोन विरोध कित्तोके वेने 9 जनवरी ते बोदेली ते ओसो 12 जनवरी ते कड़ियामेट्टा ते जबर्दस्ती



पुलिस कैंपकु तासतोर. तेना विरोध ते 9 जनवरी, 2020 तल 13 फरवरी, 2020 एवनाल इतेके 35 दियांग एवनल आंदोलन जारी मत्ता. इद संघर्ष ते लगभग 25 हजार मुल जनता शामिल आतोर. इद जुझारू संघर्ष ते महिलांग ना भूमिका जबर्दस्त मत्ता. महिलांग हिम्मत ते मंजी पेरके गुचवा लेवा जुझारू संघर्ष कित्तांग.

इद कैंप ते मत्तोर गद्दारीरा (मुन्ने माओवादी पार्टी लोपा काम कीसि सरेंडर आत्तोर) पोरो बंडा मोयना, गाली-गलौज कीयना, पुलिस अधिकारीर संगे सवाल-जवाब कीयना ते महिलांग ना महत्वपूर्ण भूमिका मंता. आंदोलन ते शामिल कोयतोर कुन अरेस्ट कीसी ओयनीकी पुलिसतोर कोशिश कित्तास्के ओरकुन अड्डम आसी ओया हिवोंग. कोयतोर किन तमा घेराव ते तासीसी पुलिसतोर कैंदे अरवा लेवा बचे कित्तांग. आंदोलन ताकानास्के सांस्कृतिक कार्यक्रम कुने महिलांग सक्रिय भागीदारी निभा कित्तांग. 35 दियांग एवनाल जारी इद आंदोलन कोविड-19 बीमारी ता कारण ते इचुन महीना रोमता. मति, जनता इतेके लगातार इव कैंपकुन विरोध कीयामंतोर.

इद विरोध ओसो उंदी बेरा आंदोलन लेहका मिडन्दता. जरगता बातल इतेके 12 नवंबर, 2020 ते कडियामेट्टा नारू पोरो पुलिसतोर हमला किसि 4 मुल किन अरेस्ट कित्तोर. अस्के नाटे नगे 8 मुल मत्तोर. ताना लोप्पा 4 जन महिलांग मत्ता. ओर आठ मुल वेने अरेस्ट कीयना तुन विरोध कीसोरे पुलिसतोर पेरके-पेरके हंजी थाना ता फेंसिंग तोडफोड कीसी लोप्पा नंगतोर.



नरकुम 6 बजे तिना पियल 1 बजे एवना ओरू 8 मुल करविना पोटा ते मावा नाटेनोरू किन विड्याटू इंजी आंदोलन कित्तोर. इद घटना आसपास नाटेनोरू केंजी पुलिस कैंप मुन्ने जमा आयला आतोर. पुलिसतोर अरेस्ट कित्तोर किन गाडींग ने उददी कीसी दूसरा थाना ते ओयना काजे कोशिश कीयना अस्के नाटेनोरू होंग अरके तेदितोर. उंदी महिला बेहरा बंडा पोयसी गाडी पोरो उकता. वरोर मानय पुलिसतोर गाडी तुन मर्स ते काहतोर. ताना पेरके मंगरीबाई कश्यप इंदना महिला किन पुलिसतोर बेहोश आयनल पिटाई कित्तोर. इद हूडसी नाटेनोरू होंग ते उरवे विसी लेहका तेदित्तोर. वरोर मानय वेरोन पुलिस किन पोयतोर, रेंड महिलांग ओना कैंदाले बडगा उन्दिसी ओन पुलिसतोनकु पक्काय पिटाई कित्तांग. पुलिस कैंदे देब्बा तिंचि बेहोश आत्ता मंगरीबाई वेने सुरता अरतास्के तेदिसी ओसो अद वेने लाठी संगे ओन पुलिसतोन कुन

पिटाई कीया संग आता. पेरके ओर पुलिस केयसोरे कैंप ते वितित्तोर. आखिरी ते पुलिसतोर लाटिंग ओसो हथियारकुना मदद ते जनता किन जतखत कीसी अरेस्ट कीत्तोर किन गाडींग ने दूसरा थाना ते ओत्तोर. ताना पेरके वेने कैंप मुन्ने जमा आत्ता 700 मुल जनता आंदोलन किन जारी तासतोर. इंजे इद आंदोलन सिर्फ नालविर किन रिहाई कीयना मांग तुके सीमित आयो, इद दमन तुक अस्सल कारण इव पुलिस कैंपकु इंजी पुलिस कैंपकु वापस ओयना, पुलिस गश्ती बंद कीयना, मारपीट, गाली-गलौच, महिला पोरो अत्याचार सहे मायोम इंजी मांग पोयसी जनता तेदित्तोर. पेरके इद आंदोलन बंदीरा रिहाई ओसो पुलिस कैंपकु हटा कीयना मांग तुके सीमित आत्तद हिल्ले. छोटे डोंगर ते मंदना आमदाई मेट्टा ते मंदना 35.3 मिलियन टन ता कच्च खदान मंता. इद खदान शुरू आतेके 24 तुक ज्यादा नाहकु प्रभावित आयर. तेन जायसवाल नेको लिमिटेड कंपनी किन लीज ते हियलेमंता. 2010 तल खदान शुरू कीयना कोशिश जारी मंता. मति जनसंघर्ष तेन कुन हरी

हित्तादू हिल्ले. मति अस्के तल खदान खोले कीयना कोशिश लगातार ताका मंता. बेस्के नाटेनोरा रिहाई काजे इद आंदोलन शुरू आत्तयो, अस्के नेको जयस्वाल कंपनी मशीनकु तासी खदान कारना काम शुरू कीयना मैदे तैयारी कीयामंता. अदेन काजे आंदोलनकारीर ओसो उंदी बेरा आमदाई खदान ओसो कैंपकु रद्द कीयना मांग तेहतोर.

16 हजार 500 आदिवासीर विल-काडी, गोड्डेल, बडगा लेहका ता तमा परंपारिक हथियार पोयसी राशन-बर्तन-वर्की पोयसी 'चलो नारायणपुर' नारा हीसोरे आंदोलनकारीर पेसतोर. तेना लोप्पा महिलांग बेहरा संख्या ते शामिल आत्तांग. हजारों महिलांग केसमुल पिला किन संका ते एतिसी तला ते नूका, गंजी-बर्तन, वर्की तोच्चीसी कैंदे बैनर, प्ले कार्ड पोयसी लडाई लेवा पिस्वल हिल्ले इंजी इद आंदोलन ते शामिल आतांग. आंदोलनकारीर 9 किलोमीटर पैदल ताकसोरे धौडाई एवतोर, पुलिस-प्रशासनिक अधिकारीर ओरकुन मुन्ने दाया हिवोर. अदेन मैदे जनता अगाने आंदोलन जारी तासतोर. आंदोलन कीयनोरा संख्या बेरसोरे 35 हजार तुक वेंडता. ओरू तमा मांग किन पोयसी सांगी कीयना पीनी ते वेने 5 दियांग किस आरसोर नुत्ये वेने सडक पोरो मंजी आंदोलन तुन ताकी कित्तोर. तेना लोप्पा महिलांग वेने मंतांग. पाल उंडना पिल्लांग किन पोयसी बचोन तिप्पल तुन सामना कीत्ता. मति तमा मांग मैदे जिद संगे गट्टिंग नित्तिता.

आंदोलनकारीरा जिद्द किन हूडसी आखिरी ते प्रशासन तल 6 दिसंबर ते पियल नारायणपुर कलेक्टर अभिजीत सिंह ओसो पुलिस अधीक्षक मोहित गर्ग आंदोलनकारीरा मांग केंजनीकी वातोर. 15 दिया ता समय ताल्कतोर.

15 दियांग पेरके ओसो इद आंदोलन शुरू आता. 22 दिसंबर ते आमदाई ते 3000 मुल जमा आतोर. अगातल नारायणपुर तुन घेराव कीयना निर्णय एती मंजी आंदोलनकारीर ताकाना शुरू कीत्तोर. मुंड दियांग सड़क ते ताकीसी डोंगर, डौला ओसो झाराघाटी किन वेंडतोर. मति वेडमाकोट ओसो फरसगांव थाना ता पुलिसतोर ओरकुन मुन्ने दाया हिवोर. आंदोलनकारीर अगाने धरना-प्रदर्शन शुरू कीत्तोर. इद आंदोलन 6 जनवरी, 2021 एवनाल ताकता. आंदोलनकारीरा संख्या लगातार बेरसोरे आखिरी ते 40 हजार तुक एवता. 6 जनवरी ते इद आंदोलन इचुन दिया रोमसी ओसो शुरू आता. इंजे वेने जारी मंता.

पुलिसकैपकु, सड़क, खदान ओसो दमन विरोध ते

पश्चिम बस्तर डिविजन ता गंगालूर क्षेत्र ते पूंबाड़ ओसो बुरगिल नाहकुने पूना पुलिस कैपकु तासना निर्णय तुन, गंगालूर तल बैलाडीला एवना सड़क निर्माण कीयना निर्णय तुन, बैलाडीला मेट्टा तल साम्राज्यवादीर खनिज संपत्ति तुन बातय अड्डम लेवा लूटी कीसी ओयना तुन, फर्जी मुठभेड़कु, अवैध गिरफ्तारींग ओसो महिलांग पोर्रो ताकाना दमन ओसो अत्याचारकुन विरोध कीसोरे 17 जून, 2020 ते गंगालूर क्षेत्र ता 8 ग्राम पंचायतकुना जनता बीजापुर ते जबर्दस्त आंदोलन कीत्तोर. तेना लोप्पा लगभग 3500 मुल महिलांग ओसो पुरुष शामिल आतोर. सबे तोर वेने एरिया ते पुलिस फोर्स मत्तांकु ओरा पिस्वल बेले जत-खत आया मंता इंदनाद वेहतोर. ओड़कु-वेडांग ता काम, जंगल चीजकु परकना काम, वेटा वेलियना, आदिवासी संस्कृति-रीति-रिवाज, मर्मी, तिहार-पंडुम प्रभावित आसोरे मंता. इद आंदोलन तुन विरोध कीयना काजे जिला एसपी ता नेतृत्व ते रोड़ पोर्रो डीआरजी ओसो सीआरपीएफ फोर्स किन तैनात कीत्तोर. आंदोलनकारीरा पोर्रो लाठी चार्ज कीत्तोर. अगा 19 महिलांग ओसो 2 जन पुरुष घायल आतोर. ईले तिप्पल कीसोरे पुलिस तोर बेचोन अड्डम आतके वेने वेंडसोरे महिलांग हिम्मत ओसो साहस ता संगे कलेक्टर ऑफिस तगा हंजी ज्ञापन सौंपे कीत्तांग.

तरालमेट्टा खदान ओसो पुलिस कैप ता विरोध ते

अडानी ओसो एस्सार कंपनीतोर गुमियापाल ओसो वेंगुर नडमा मंदाना तरालमेट्टा खदान किन काराना तुन ओसो गुमियापाल ते पूना पुलिस कैप तासना तुन विरोध कीसोरे जनता आंदोलन कीयामंतोर. इद खदान ना कारण ते सुकमा जिला ता बचोनो नाहकु ना जनता विस्थापित आयनूर. अदेन मैदे प्रभावित नाहकु ना संयुक्त पंचायत

समिति ता नेतृत्व ते 10 सितंबर, 2020 ते रैली प्रदर्शन कीत्तोर. लगभग 5 हजार महिलांग ओसो पुरुष तमा पारंपरिक हथियारकु पोयसी इद रैली ते शामिल आतोर.

पुलिस जुल्म सहेमायोम!

कांकेर जिला, परलकोट क्षेत्र ते 15 सितंबर, 2020 ते वेटिया पुलिस कैप ता पुलिसतोर ओडा ओयनोर मुवुर जन किन पक्काय पिटाई कीत्तोर. ओसो एलाड़-मियाड़ ना इज्जत टेंडना लेहका ता लागवा-लागवा गाली-गलौंच कीत्तोर. अदेन काजे जनता होंग अरके तेदिसी पुलिस बलकुना इद लागवा कबड़ तुन विरोध कीसोरे थाना ते हंजी जोरदार विरोध प्रदर्शन कीत्तोर. इद प्रदर्शन ते 100 महिलांग ओसो पुरुष शामिल आतोर. पुलिसतोर प्रदर्शन कीयना नाटेनोर किन बंदूक ता रैड पुट्टी कीसी पूडसीत्तोर. मति जनता ना होंग किन ओरु दबे कीया परवोर आतोर. दूसरी बेरा 1000 महिलांग ओसो पुरुष वेटिया थाना तुन घेराव कीत्तोर. अपराधी पुलिस बलकुन नौकरी तल बर्खास्त कीयना मांग पोयसी जनता जोरदार विरोध प्रदर्शन कीत्तोर. जनता ना होंग तुन हूडसी थानेदार जनता ना मुन्ने रेंड कैड जोड़पीसी माफी ताल्कतोर. ओसो ओरु पुलिस बलकुना पोर्रो तुरंत कार्रवाईंग कीयकोम इंजी आश्वासन हित्तोर. इद पूरा आंदोलन ते महिलांग ना भूमिका बेस मत्ता.

आकाबेडा पुलिस कैप ना विरोध ते

माड़ भूमि ता कुतुल क्षेत्र ते आकाबेडा नाटे दिसंबर, 2018 ते पुलिस कैप तासतोर. अगातल इगा ता जनता तेना विरोध कीसोर मंता. इद विषय तुन पोयवा लेवाए



ओसो इदे इलाका ता कच्चापाल, गारपा ओसो मोंहदी नाहकुने पूना पुलिस कैपकु तासना कोशिशकु शुरू आत्ता. इव सबे हूडसी 5 अक्टूबर, 2020 ते जनता ना विरोध जबर्दस्त जनसंघर्ष लेहका मिडन्दता. करीबन 4000 मुल आकाबेडा कैप तुन घेराव कीत्तोर. इद आंदोलन ते आधा हिस्सा महिलांग मत्तांग.

टेट्टेम कैंप ता विरोध ते ओसो आंदोलन

दंतेवाड़ा जिला, कटेकल्याण ब्लॉक अंतर्गत टेट्टेम नाटे पुलिस कैंप वाटना विरोध ते 6 सितंबर, 2020 ते आसपास ता दस नाहकुनोर जनता आंदोलन कित्तोर. मति शासन-प्रशासन कैंप वाटना तना निर्णय तुन वापस एतोर. अस्कें जनता 10 अक्टूबर, 2020 ते ओसो आंदोलन कित्तोर. 12 नाटे ना 10000 तुक ज्यादा जनता तमा पारंपरिक हथियार पोयसी टेट्टेम तगा कैंप वाटाना तुन विरोध कीसोरे जबर्दस्त प्रदर्शन कित्तोर. ओसो माकुन स्कूल, आंगनबाड़ी, अस्पताल, एरू, बिजली हीमूटू मति पुलिस कैंपकु माकुन ओप्पो इंजी आंदोलनकारीर वेहतोर. इद आंदोलन ते वेने महिलांग जोरशोर से शामिल आत्तांग.

नहाड़ी कैंप ता विरोध ते

दंतेवाड़ा जिला ते नहाड़ी नाटे कैंप वाटना खबर केंजी जनता होंग आतोर. तेना विरोध ते 10-12 पंचायतकुना सैकड़ों जनता 10 अक्टूबर, 2020 ते काकड़ी नाटे हेरे उंदी मैदान ते जमाआसी आंदोलन शुरू कित्तोर. झर-झर



वायना मुसूर वेने इद आंदोलन तुन रोमी कीया परवो. 30-40 टेंट वाटिसी आंदोलनकारीर 15 दियांग तमा संघर्ष तुन जारी तासतोर. महिलांग वेने तमा लोता-बूता-काम विड्डीसी इद आंदोलन ते शामिल आसी तमा सामाजिक जिम्मेदारी तुन पूरा कित्तांग.

इचुने आयो, जनता अरनपुर कैंप ओसो तमा क्षेत्र ता नडमा गिट्टी-मुरुम ते बनेमात्ता सडक किन ध्वस्त कित्तोर. 40 जागा ते सडक तुन काहतोर. ओसो अरनपुर कैंप मुन्ने हंजी प्रदर्शन कित्तोर.

आखिर ते कलेक्टर कैंप वाटोम इंजी आश्वासन हित्तोर. जइक मैदे आई मति, जनता तमा शानदार संघर्ष तल जीड़तोर.

बोधघाट परियोजना विरोध ते

बस्तर, बीजापुर, नारायणपुर ओसो दंतेवाड़ा अंदी इलाकांग ते इंद्रावती कुयेर पोरो बोधघाट परियोजना ता निर्माण काजे सरकारकु 1971 तिंची कोशिश कीयामंतांग. इद परियोजना ता कारण ते 55 नाहकु पूरा एरू ते मुड्दियर. तेना विरोध ते जनता मुन्ने तल जुझारू संघर्ष

कीयामंता. इद संघर्ष तल बोधघाट निर्माण ता योजना रोमतादू मंता. मति तेन शुरू कीयना मैदे सरकारकु लगातार कोशिश कीयामंतांग. इंजे भूपेश बघेल सरकार कीयना कोशिशकुना विरोध ते अक्टूबर, 2020 ते ओसो संघर्ष शुरू कित्तोर. विस्थापन ता कारण ते महिलांग ना पिस्वल नेक्का इनम आयर. इद पोल्लू किन बेस समझेमासी महिलांग इद आंदोलन ते जोरशोर ते शामिल आसोरे मंतांग.

धनोरा पुलिस कैंप विरोध ते

नारायणपुर जिला ता धनोरा पुलिस थाना विरोध ते जनता विरोध प्रदर्शन कित्तोर. जरगता बातल इतेके 4 अक्टूबर, 2020 नरकोमे डीआरजी गुंडालोर ईकनाटेनोर आदिवासी लेयोर मनकू कुमोटी किन लोन पोरो हमला कीसी ओरू गुडियसी मत्ता जागा तल पोयसी ओत्तोर. ओयनास्कें लोतगा मंदना महिलांग पक्काय लड़ेमासी हूडतांग. मति अविस्कन डरा-धमका कीसोरे डीआरजी गुंडालोर



मनकू किन जबर्दस्ती ओत्तोर. तेना विरोध ते 21 अक्टूबर, 2020 ते 3000 मुल बैनरकु ओसो प्लेकार्ड पोयसी तमा पारंपरिक हथियारकुना संगे 5 किलोमीटर रैली टेंडतोर. पेरके धनोरा पुलिस कैंप तुन घेराव कित्तोर. माकुन बारू तिप्पल कीयामंमोर इंजी महिलांग, पुलिस बलकुना पोरो होंग आसोरे सवाल पोरो सवाल ताल्कतांग. 5 घंटांग आंदोलन कित्ता पेरके तहसीलदार वासी मनकू किन जेल ते तासतोम इंजो वेहतोर. ताना पेरके आंदोलनकारीर ओना पोरो झूठा केस वाटी जेल ओयना विरोध ते संघर्ष कित्तोर. इदे समय ते आंदोलनकारीर पुलिस थाना वापस ओयना ओसो पूना कैंप वाटना निर्णय तुन बंद कीयना इंजो मांग किन जोरशोर ते तेहतोर.

मोंहदी नाटे पथलगढी आंदोलन

जल-जंगल-जमीन पोरो अधिकार मैदे तमा अस्तित्व ओसो अस्मिता कुन बचे कीयना मैदे जनता नारायणपुर जिला कुतुल एरिया ता मोंहदी नाटे उंदी एकता आसि तेदित्तोर. माड़ क्षेत्र ता 170 नाटे ना लगभग 15 हजार जनता 11 नवंबर, 2020 ते मोंहदी नाटे जमा आतोर. ताना



लोप्पा 5500 महिलांग मंतांग. आंदोलनकारीर 11 तल 13 नवंबर एवनाल मूंड दियांग कई कार्यक्रमकु आयोजन कित्तोर. ताना लोप्पा 12 तारीख ते जोरदार नारांग हीसोरे बेहरा रैली टेंडतोर. ओसो बंडा उर्सकी 'मावा नाटे मावा राज' ता घोषणा कित्तोर. इव मूंड दियांग लोप्पा 40 वक्तालोरु भाषण हित्तोर. ताना लोप्पा 13 महिलांग वेने मंतांग. अगा नरका-पियल सांस्कृतिक कार्यक्रमकु ताकी कित्तोर. सांस्कृतिक टीम लोप्पा आधा से ज्यादा संख्या ते महिलांग शामिल अत्तांग. पुलिस कैंपकुन वापस ओयना इंजो हेरे मंदना आकाबेडा कैंप ते ज्ञापन हीयना मैदे 13 तारीख नरकोमे 190 मुल ना उंदी प्रतिनिधिमंडल पेसता. ताना लोप्पा महिलांग वेने मंतांग. इद प्रतिनिधिमंडल आकाबेडा कैंप ते दायनास्के रोड़ ओदा वेड़ांग ते वंजी कोयना बचोन महिलांग वेने तमा काम विडचिसी इद प्रतिनिधि मंडल लोपा शामिल आत्तांग. ओरु सबेतोर कैंप ते एवतादू हूडसी पुलिसतोर कैंप ता गेट बंद कित्तोर. मति आंदोलनकारीर 'गेट खोला कीमटू इल्वेके मुट्टी कीतोम' इंजो धमकी हीसोरे पुलिसतोर किन गेट तेरियना लेहका कीत्तोर. कैंप ते नैगिसी 'कैंप खाली कीसि बेस्के दांतीर?' इंजो पुलिसतोर किन सवाल कीसोरे वडकतोर. पुलिसतोर बंदूक ना संगे आंदोलनकारीर किन वेरपि कीयला कोशिश कीत्तोर. एके-47 बंदूक कुन वेने लोड़ कीत्तोर. आले कीतके वेने जनता पेरके गुच्चवा लेवा ओसो वेने मुन्नेटक अत्तोर. प्रतिनिधि मंडल तोर, ताना लोपा मंदना महिलांग वेने बचोनो मुल मुन्ने वासी 'बेगा फेरिंग कियाकीर?' इगा कीयकीरा?' इंजोरे छाती तिन तोहचोरे नित्तितोर.

पूरा क्षेत्र ता जनता किन संघर्ष मैदे प्रेरणा बनेमात्ता इद सभा ते उंदी दुख ता घटना जरगता. इद संघर्ष ते सक्रिय हिसाब ते सभा ते शामिल आसी भाषण हीसी, नारांग केयसोरे कैंप तगा हंजी पुलिसतोर संगे पोल्लू ता पोल्लू लडेमात्ता घटना ते शामिल आत्ता तोके नाटे ना मासे पोरोय ता महिला ना 14 तारीख नरकोम अचानक हामुर आता. तीन दिया ता कार्यक्रम माराना आखिरी दिया ते नरका जोरशोर ते सांस्कृतिक कार्यक्रम ता आयोजन कित्ताद मत्ता. अगा जाम शामिल आसि हंजी गुडियतास्के

शायद ताना गुंडे रोमिसी हामुर आता. अदू पक्काय सालकुनल केएएमएस ते सक्रिय रूप ते काम कित्ता. इंजे केएएमएस ता पंचायत कमेटी ता सदस्या मंजी महिलांग कुन संगठित कीसोरे मत्ता. संघर्ष कीयना जनता कामरेड मासे किन दुख ता संगे श्रद्धाजंली हीसी 'कामरेड मासे अमर रहें.....' नारा केयसोरे अंतिम संस्कार कित्तोर. ताना प्रेरणा ते जनसंघर्ष तुन मुन्ने ओयानीकी किरिया कित्तोर.

कोहकामेट्टा पुलिस कैंप ता घेराव

नारायणपुर जिला ते कोहकामेट्टा नाटे दिसंबर, 2018 ते पुलिस कैंप खोला कित्तोर. जनता तेन विरोध कित्तेके वेने कैंप खोले कीसी इंजे तेन विस्तार कीयना मैदे निर्णय एतितोर. तेनगडल जनता ना होंग संघर्ष लेहका मिडन्दता. 10 पंचायत ता 50 नाहकुना जनता जमाआसी



सुमारे 2500 महिलांग ओसो पुरुष 24 अक्टूबर, 2020 ते तेना विरोध ते आंदोलन कित्तोर.

कर्रपारा पुलिस कैंप ता विरोध

जगरगुंडा क्षेत्र ता कर्रपारा नाटेने 20 नवंबर, 2020 ते पूना कैंप वाटतोर. तेना विरोध ते 25 नवंबर ते आसपास 6-7 नाटेनोर जनता जमाआसी आंदोलन कित्तोर. कैंप हटा कीयना मांग कीसोरे रैली टेंडतोर. सबे नाटेना महिलांग इद आंदोलन ते शामिल आतांग.

बेलनार ते कैंप ओसो पुलिया निर्माण विरोध ते रैली

पूना कैंप ओसो इंद्रावती कुयेरु पोरो पुलिया निर्माण ता विरोध ते इंद्रावती क्षेत्र ता 11 पंचायतनोर जनता उंदी एकता आसी तेदित्तोर. कैंप ओसो पुलिया ता काम तुन तुरंत बंद कीयना मांग कुन पोयसी लगभग 2500 मुल 27 नवंबर, 2020 ते बेलनाटे रैली पेसी कित्तोर. पेरके मीटिंग ताकतगा 12 मुल भाषण हित्तोर. कैंपकु खोलेमात्तगडल पुलिसतोर जोर-जुल्म आदिवासीरा पोरो ओसो महिलांग पोरो बेरसता इंजी वक्तालोरु वडकतोर. ओसो जनता किन स्कूल-अस्पताल ता जरूरत मंता, कैंपकु लागो इंजी वेने सबे वक्तालोरु भाषण ते वेहतोर.

गंगालूर क्षेत्र लोप्पा कैप विरोधी आंदोलन

जनता ना विरोध तुन मूला ते तासी बीजापुर जिला, गंगालूर क्षेत्र ता बुरजी ओसो पूसनार ते पूना कैप बनेकीयामंतोर. इव कैपकुना मैदे जनता ना जमीन तुन जबर्दस्ती उंदतोर. ओसो पूसनार तल हिरोली एवना सड़क बनेकीसोरे मंतोर. इव कैपकु ओसो सड़क पंडना विरोध ते इद क्षेत्र ता लगभग 6 हजार मुल जनता 19 दिसंबर, 2020 ते शांतिपूर्ण तरीका ते रैली कित्तोर. मति, शासन-प्रशासन आंदोलनकारीरा पोरो निर्मम तरीका ते दमन कीसी इद रैली तुन हिंसक बनेकित्तोर. अस्के महिलांग अरके पूरा जनता इद हिंसा तुन प्रतिरोध कित्तोर.

आंदोलनकारीर पोरो पुलिस फोर्स संगे क्रूर तरीका ते लाठीचार्ज कितोर. डीआरजी गुंडालोरु तुपाईंग, बंडांग, बड़गांग, रॉडकुने जानवर लेहकाने मुयतोर-डोकरी तल



पोयसी 13-14 साल ता पिल्लांग किन वेने विडचवालेवा सैकडों मुल जनता किन मारपीट कित्तोर. तेना लोप्पा महिलांग ओसो पिल्ला-पेकोर करीबन 200 मुल घायल आतोर. ताना लोप्पा 13 मुल गंभीर रूप ते घायल आतोर. पुलिस ता इद दमन जनता ना लोप्पा ओसो होंग किन बेरसी कित्ता. ओरु वेने पुलिसतोर किन पिटाई कित्तोर. वरोर पुलिसतोरना पापी पूजतोर. ओनकु तुरंत हेलिकाप्टर ते अस्पताल ओत्तोर. पारंपरिक विल-कांडी पोयत्ता जनता ना प्रतिरोध कुन रोमी कीयला जनता ना लोप्पा रैड पुट्टी कियला हवाई गोलीबारी कित्तोर. इद मौका ते पुलिसतोर 16 मुल किन अरेस्ट कित्तोर. ताना लोप्पा बचोनो मुल 13-14 साल ता पिल्ला-पेकोर वेने मंतोर.

पुलिसतोर लाठीचार्ज ते बचोनो मुल महिलांग घायल आतांग. ताना लोप्पा तोड़का गांव की ताती सोमी (38), सावनार ता हेमला मोती (43), हेमला सोमली (52), चिन्नी पूनेम (57), कोरचोली नाटेना लखी पोटाम (50), रेंगों कमली (50), मंगी पोटाम (39), पालनार नाटेना ताती आयती (65), एडसमेट्टा ता काराम बण्डी (50), काराम छोटी (16), काराम आयती (20), काराम सोंबारी (18), काराम सोमली (40), काराम सुक्की (26), काराम बंडी (50), तुमनार नाटेना रामे, चिन्नी, पिडिया नाटेना अवलाम मंगली, बुरजी पंचायत की प्रसिक पु पा (16), बुरजी नाटेना पूनेम कोपे (30), पूनेम राधा (56), ओयाम गांति (35), ओयाम आयते (65), पूनेम पांडे (19), उरसा मोती (16), कावाड़

नाटेना पूनेम कमली (63), मोती पूनेम (19), आयते पूनेम (68), सुक्की पूनेम (23), हिडमगोंडा नाटेना हिडमे सोड़ी (55), छात्रा प्रियंका तामो (16), पूंबाड़ नाटेना पूनेम सन्नी (45), पूनेम पांडे (14), स्कूल छात्रा पूनेम रीता (12), पूनेम ज्योति (13), पोटाम मंगली (40), पोटाम सुक्की (50), पोटाम पांडे (30), पोटाम सनकी (51), पूनेम बुदरी (45), पोटाम सनकी (52) शामिल मंतांग.



पुलिस हिंसा के सबूत देते महिलाओं के बदन पर ये निशानें!

बचोनो मुल महिलांग, सुडला-सुडला पिल्लांग संगे पूरा 16 मुल जनता किन गिरफ्तार कित्तोर. ताना लोप्पा पूंबाड़ नाटेना पोटाम राजेश्वरी (12), स्कूल छात्रा पोटाम ललिता (12), स्कूल छात्रा पूनेम शांति (18), पालनार नाटेना पद्दाम छोटी (14), ताती सविता (13), सोनी माड़वी (15), तुमनार नाटेना कोसी बाड़से (15), वेने मंतांग.

इद जुल्म ओसो गिरफ्तारींग तुन विरोध कीसोरे जनता गिरफ्तार आतोरकुन रिहा कीयना मांग पोयसी पांच दियांग गंगालूर मुख्य सड़क ते जमा आसी जुझारु संघर्ष ताकी कित्तोर. इद संघर्ष ते महिलांग सबेतोर किन उंदी डाका मुन्ने नितिसी जबर्दस्त विरोध प्रदर्शन कित्तांग. 22 दिसंबर मूल्ये तहसीलदार मांग पूरा कियकोम इंजी आश्वासन हित्ता पेरके इद आंदोलन मारता.

पुलिस कैप, पुलिया, पर्यटक केंद्र माकुन लागो

22 अप्रैल, 2020 ते गंगालूर ते बेस्के आंदोलन खत्म आत्तयो ताना रेंडू दिया ना पेरके 24 दिसंबर ते लगभग 3 हजार मुल महिलांग ओसो पुरुष तमा 15 सूत्रीय मांग किन पोयसी ब्लॉक मुख्यालय भैरमगढ़ ते आंदोलन कित्तोर. ताकिलोड़, धर्मा, छोटेपल्ली संगे आधा दर्जन तुक ज्यादाये नाहकुनाल आंदोलनकारीर पुंडरी नाटे हेरे इंद्रावती कुयेरु पोरो पुलिया निर्माण कीयना तुन विरोध कीसोरे प्रदर्शन कित्तोर. हांदावाड़ा, ताकिलोड़ ओसो कावरनारु ते प्रस्तावित पूना कैपकुन बंद कीयना, हांदावाड़ा पर्यटक केंद्र कुन ओसो इंद्रावती डोड्डा ते पुलिया निर्माण बंद कीयना इंजी मांग कित्तोर.

वेचापाल पुलिस कैप ता विरोध ते

पश्चिम बस्तर डिविजन, भैरमगढ़ एरिया ता वेचापाल नाटे पुलिस कैप वात्ता पेरके सड़क ओसो पुलिया निर्माण

कोहकामेट्टा नाटे महिलांग पोरो पुलिसतोर दमन

बस्तर संभाग ते 2005 तल पोयसी नेंडू एवनाल बचोको पुलिस कैंपकु खोले कित्तोर. पुलिसतोर कैंप मंदाना हर नाटे ओसो आसपास नाहकुने मंदना महिलांग पोरो अत्याचार, हत्यांग कीयना मामूली पोल्लूंग बनेमासोरे मंता. इस साल माड़ क्षेत्र ता कोहकामेट्टा नाटे महिलांग पोरो पुलिस अत्याचार ता घटनांग बाहर पेसता.

माड़ डिविजन ता कुतुल एरिया, कोहकामेट्टा नाटे पुलिस कैंप खोले कित्तोर. कोहकामेट्टा आसपास ते आकाबेडा, सोनपुर, बासिंग नाहकुना लोप्पा बस्के तल पुलिस कैंपकु खुलेमात्तायो अस्के तल महिलांग संगे छेडछाड़, अत्याचार, जनता ना संगे मारपीट, डरा-धमका कीयना जारी मंता. उचुक-उचुक घटनांग बाहर वायामंता. इचुक घटनांग किन डरा-धमका कीसी दबेकीसोरे मंतोर. इद साल ते हिम्मत ओसो साहस तोहचोरे जनता, पुलिस कैंपकुन वापस ओयाना मांग संगे जुझारू संघर्ष कीयामंता. ताना लोप्पा महिलांग ना जबर्दस्त भागीदारी मंता. कोहकामेट्टा नाटे ना महिलांग तमा पोरो जरगता घटनांग किन बाहर पेसी कित्तांग. बक्के कोवाची ना संगे पुलिस बलकु सामूहिक बलात्कार कीसी तमा कित्ता गलती किन मिस्सना काजे तानकिन हौकसीत्तोर.

बुक्के ना कोयतोर डोल्लतोर. अदू तना पिल्ला-पेकोर कुन पोयसी पिस्सोरे मत्ता. इदे आयवा इदे नाटे ना

आदिवासी महिला सावित्री नरोटी, लक्ष्मी कोवाची, मेस्सी कोवाची पुलिस अत्याचार ता शिकार आत्तांग. ओसो वेने इद्रम ता घटनांग जरगना संभावनांग मंता. इच्चोने आयो, पुलिसतोर जनता ना माल-कारूकु, मेकांग, पददींग हौकिसी तित्तोर. दाडंगो, गोरगा उट्टोर. हिवोम इंजी वेहतेके मुरा नरेटी ना तम्मून पिटाई कित्तोर. पुलिसतोर सुक्कू उसेंडी, फगनू कोवाची ना पददी-मेका 4 तला जबर्दस्ती पोयसी ओत्तोर. लक्कू नरोटी ना संगे मारपीट कीसी 4 हजार रूपया डोंगिसी (कल्सी) ओत्तोर. माझी पारातोर कमलू ओसो ओना लोन बितीन मारपीट कीसी ओरगडल पैसा उंदिसी ओत्तोर. साग-सब्जी आहे हिवोन इंजी वेहतास्के सोनू उसेंडी किन पिटाई कित्तोर. गोदूल ते पाटा-डाका एंदनोरकिन धमका कीसी जबर्दस्ती बंद कित्तोर. इद सबे घटनांग कोहकामेट्टा नाटे ना आंदू, ईले बेगा-बेगा पुलिस कैंपकु मंतायो अगा सबे नाहकुने इद्रमताये परिस्थिति मंता.

1 फरवरी ते कड़ियामेट्टा पुलिस कैंप हेरे गुमर नाटेनोर शंकर ना लोन तुन घेराव कीसी ओनकु पोयसी पिटाई कीसोरे ओयनास्के ओना लोन बिती ओसो ओना अंगे वेने ओरा पेरके-पेरके हत्तांग. पुलिसतोर अविन कुन वेने पिटाई कित्तोर. अदेन अवु गंभीर रूप ते घायल आत्तांग.

★

वेने कीयामंतोर. तेनागडल जनता होंग आसी 26 दिसंबर, 2020 ते कैंप वापस ओयना ओसो सडक, पुलिया निर्माण बंद कीयना मांग पोयसी रैली पेसी कीसी वेच्चापाल कैंप ता मुन्ने जबर्दस्त धरना कित्तोर. इद आंदोलन ते 4 पंचायतकुना 5 हजार तुक ज्यादाये महिलांग ओसो पुरुष शामिल आतोर.

हांदावाड़ा पर्यटक क्षेत्र बंद कीमुट!

इंद्रावती क्षेत्र ता हांदावाड़ा नाटे बेहरा जलप्रपात मंदना मैदे तानकुन पर्यटक केंद्र पंडना इंजी सरकार निर्णय कित्ता. इद पर्यटक केंद्र बने मातेके जरूर इगा ता आदिवासीरा पिस्वल बर्बाद आयर. इंजि एवना देश ते मंदना बचोनो पर्यटक क्षेत्र कुना होटल्स, रिसॉर्ट्स, दाडंगो दुकानकुना संगे-संगे मेंदुल व्यापार वेने बेरस्ता इंजि मनल पुत्तादे. खासकर बचोनो आदिवासी इलाकांग लोप्पा पर्यटक क्षेत्र बना कीसी आदिवासी महिलांग किन मेंदुल वम्मना व्यापार ते दोबसिया मंतोर. इगा वेने अद्रमे आयर. अदेन मैदे इगा ता जनता पर्यटक केंद्र ता निर्णय तुन विरोध कीयामंता. अदेन काजे 14 दिसंबर, 2020 ते लगभग 1500 महिलांग ओसो पुरुष ओरछा ते रैली टेंडतोर.

करकाघाट ओसो तुमीरघाट कैंप वापस ओयना!

जनता ना विरोध तुन मूला ते तासी कोयलीबेडा क्षेत्र ता करकाघाट ओसो तुमीरघाट ते बीएसएफ कैंप खोले कित्तोर. तेना विरोध ते पखांजूर ते 23 तल 28 दिसंबर, 2020 एवनाल आंदोलन कित्तोर. इद आंदोलन ते बेहरा संख्या ते महिलांग शामिल आत्तांग.

टोंडाबेडा कैंप ता विरोध ते

इंद्रावती एरिया ता टोंडाबेडा नाटे प्रस्तावित कैंप ता विरोध ते इगा ता जनता उंदी कट्ट आसी तेदित्तोर. अस्सल दंडकारण्य ते नाटे-नाटे पुलिस कैंप खोले कीयना सरकारकु इगा ता जनता ना मूलभूत सुविधांग कुन इच्चून वेने ध्यान हीसोरे हिल्ले. अदेन मैदे टोंडाबेडा ओसो आसपास नाटेनोर 4 हजार तुक ज्यादाये जनता पुलिस कैंप ता प्रस्ताव कुन रद्द कीयना इंजी ओसो जनता ना मूलभूत समस्यांग किन हल कीयना मांग पोयसी 24 दिसंबर, 2020 ते ओरछा ते रैली पेसी कित्तोर. इद रैली ते महिलांग अस्सल भूमिका निभा कित्तांग.

★

किसान आंदोलन ते महिला किसानलोर अस्सल भागीदारी!

ब्राह्मणीय हिंदुत्व मोदी सरकार सितंबर 2020 ते तत्ता किसान विरोधी, जनविरोधी ओसो देशद्रोही मूंड कृषि कानूनकु – कृषक उपज व्यापार ओसो वाणिज्य (संवर्धन ओसो सरलीकरण) कानून 2020, मूल्य आश्वासन ओसो कृषि सेवांग पोर्रो किसान (सशक्तिकरण ओसो संरक्षण) समझौता विधेयक 2020, आवश्यक वस्तु अधिनियम (संशोधन) कानून, 2020 तुन वापस एताना मांग पोयसी सितंबर तुक मुन्ने तल आंदोलन शुरु आत्ता. मुन्ने पंजाब ओसो हरियाणा राज्यकुना लोप्पा इवु आंदोलन शुरु आत्तांग मति पेरके लगभग देशमेंड किसान आंदोलन कीयला आतोर. 26 नवंबर ते इद आंदोलन दिल्ली एवता. अस्के तल इद आंदोलन दिल्ली ता सीमांग-सिंधु, टिक्री, घाजीपुर, शाहजहांपुर ओसो पलवाल तगा लगातार जारी मंता. दिल्ली ता सीमा ते जारी इद आंदोलन 5 मार्च ते पूरा 100 दियांग पूरा आत्ता. देश ता इचुक दूसरा-दूसरा इलाकांगने वेने इव आंदोलन ताकाये मंता.

मूंड कानूनकुनाल नुकसान बातल मंता?

इव कानूनकुनाल सरकार किसानलोर पंडी कीत्ता पंटांग कुन अस्सना जिम्मेदारी तल पेरके गुच्चीयार. सरकारी मंडिंग खत्म आयनूंग. न्यूनतम समर्थन मूल्य मन्नो आयर. कृषि उत्पादन ता मूल्य ता निर्णय कीयना अधिकार पूरा-पूरा कार्पोरेट घरानांग, ओसो बेहरा व्यापारी, जमाखोर ओसो बिचौलियालोरा कैदे मंदार. कार्पोरेट ओसो कांट्रैक्ट खेती तुन बेरसी कीयानूर. तमा नेली ते बाता पंटा टेंडाना, बाता विज्जा उर्सकना, बाता खत्तूम ओसो कीटनाशक दवाई इदकना इव सबे निर्णय कीयना अधिकार किसानलोर किन मनवालेवा कार्पोरेट घरानातोरा कैदे मंदार. कार्पोरेट संस्थांग लेवेके व्यापारीरा धोखाबाजी तल बचेमायनीकी किसानलोरगा बातय कानून ता अधिकार मन्नो आयर. किसान तमा नेली तल विस्थापित आयनूर. लेवेके तमा नेली ते गुलाम आसी पिस्सानोरु. जमाखोरी बेरसियार. जरूरी ता चीजकु दोरकवा लेवा कियनूर. मोला बेरसियार. उंदी पोल्लू ते वेहाना इतेके अंबानी, अदानी, दमानी, वालमॉर्ट, टीसीआई लेहका देशी-विदेशी कार्पोरेट कंपनींग

कुन फायदा बेरसि कीयना ओसो जमीन पोर्रो, उत्पादन पोर्रो, उत्पादन कुन जमा कीयना (भंडारण), वम्मना सबे पोर्रो ओरा नियंत्रण निल्पी कीयना मैदे पोर्रो वेहता मुंड कानूनकु तत्तोर. इव कानूनकु उंदी खेती ओसो किसानलोर किन बर्बाद कीयनादे आयवा देश ता आम जनता किन पूरा-पूरा प्रभावित कीयनादू आंदू. बारंक इतेके खेती संगे उंदी किसानलोरा ओसो खेती मजदूरलोराये आयो सबे जनता ना संबंध मंदान्ता. अदेनकाजे इव कानूनकुन रद्द कीयना मांग संगे देश ता किसान ऐतिहासिक संघर्ष किन नेतृत्व कीयामंतोर. लगभग 500 किसान संगठनकुना संयुक्तमोर्चा इद संघर्ष तुन संचालन कीयामंता. इद संघर्ष किन सबे तबका कुना समर्थन मंता.

महिला किसानलोरु तमा असली पहचान निल्पी कित्तांग

इद संघर्ष ते महिलांग ना जबर्दस्त भागीदारी मंता. मामूली हिसाब ते किसान इतेके हर मानय ना दिमाग ते कोयतोना फोटो उदिदीतादू दिसिन्ता. महिलांग ना मेहनत लेवा खेतीये हिल्ले. खेती ते वेने श्रम ता लैंगिक विभाजन ता कारण ते इचुन काम महिलांग ना काजे पोलो इंतोर मति इचुन काम ते अविस्कुना प्रधान भूमिका मंदान्ता. मति पुरुष प्रधान समाज ते महिला किसान लोरा अस्तित्व किन दबे किन्तोर. तानकु किसान ना लोन बित्ती लेहकाने हूडितोर. मति इद आंदोलन ते तमा शानदार भागीदारी तल महिला किसानकु तमवा असली पहचान निल्पी कित्तांग.

कृषि संकट- महिला किसानकु ओसो महिला खेतिहर

मजदूरकुना परिस्थिति

देश ते पक्काय दियांग तल ताकाना कृषि संकट महिला किसान ओसो महिला खेतिहर मजदूरीरकुन पक्काय प्रभावित कीयामंता इंजो मनल पुत्तदे. अव आर्थिक ओसो सामाजिक रूप ते बचोनो दबाव किन सामना कीयामंतांग. कर्जा हीयना सावकार लोरा अपमान किन सामना कीयामंता. कर्जा ता बोजा ते दबेमात्ता परिवार ता मदद मैदे पिल्लांग-पेकोर किन पोसे कीयना मैदे बचोनो महिलांग आखिर ते तमा मेंदूल किन वेने वम्मसोर मंतांग. तमा



पिल्लांग किन वेने वम्मा मंतांग. कृषि संकट ता कारण ते ताकाना किसानलोरा आत्महत्या तल परिवारकु बर्बाद आयमंता. कोयतोर आत्महत्या कित्तेके पूरा परिवार ता बोजा महिला ना पोरो अरदामंता. बचोनो किसान महिलांग वेने आत्महत्या कित्तांग.

इंजे इव कानूनकु खेती ओसो किसानलोरा परिस्थिति कुन ओसो पापम कीयना लेहका मंता. इद्रम ते महिला किसानलोरा ओसो महिला खेतिहर मजदूरीरा तिप्पल ओसो बचोनो गुणा बेरसियार.

महिलांग पोरो महंगाई ता बोजा

देश ते दिया-दिया ते महंगाई बेरसामंता. इव कृषि कानूनकुना कारण ते इंजे महंगाई ओसो बेरसियार. महंगाई ता ज्यादा बोजा महिलांग पोरोने अरिन्ता. बेरसना महंगाई ते बाता अरसना? बाता अट्टना? पिल्ला-पेकोर किन बाता तिहाना? आम महिला हर समय इदे चिंता ते मूडन्दीसी मंदान्ता. पिस्ता गाटो-कुसीर तिंदना कारण ते महिलांग ओसो पिल्लांग कुपोषण ता शिकार आसोरमंता.

आंदोलन ते महिलांग ना भागीदारी

अदेनकाजे इंजे ताकाना किसान आंदोलन ते महिलांग वेल्लये शामिल आयामंतांग. दिल्ली सीमांग ते ताकाना आंदोलन आयवा वेने देशमंड ते जारी आंदोलन ते महिलांग



शामिल आयामंतांग. सुडला पिल्लांग तल पोयसी डोकरी आस्कु वेने पक्काय मुल महिलांग इद संघर्ष ते शामिल मंतांग. वालंटियरकु, सांस्कृतिक कार्यकर्तालोरा लेहका महिलांग, लयास्कु ओसो छात्रालोरु वेने सक्रिय भूमिका निभा कीयामंतांग. बचोनो महिलांग तना केसमुल पिल्ला किन पोयसी इद संघर्ष ते शामिल आसोर मंतांग.

हिम्मत ओसो दृढसंकल्प संगे नितित्ता महिलांग

इद्रम लंबा समय एवना आंदोलन ते निच्ची मंदनादू महिलांग मैदे आसानी ता पोल्लू आयो. दिल्ली ता पेडका सांगना लेहका ता पिनी ते सुडला पिल्ला किन पोयसी

90 साल ता झिलाबाई महाराष्ट्र ता नंदुरबार जिला तल किसान आंदोलन ते शामिल आयला वात्ता. हर तिप्पल तुन सामना कीसी अदू शाहजहापुर बॉर्डर ते आंदोलन कीयामंता. अदू लोक संघर्ष मोर्चा ता प्रेरणा हीयना वरिष्ठ कार्यकर्ता आदू.



ताना वेहताना बातल इतेके 'मोदी सरकार किन माटू वेहतामंतोम. इद जमीन मावा यायाल आदू ओसो तेना काजे माटू लडेमायामंतोम. माटू कर्कूविना तिप्पल ते मंतोम. मावगा रोजगार हिल्ले. बेरोजगार मंतोम माटू. बेगा-बेगानो हंजी माटू रोजगार परकामंतोम. इद सरकार माकुन लूटी कीयामंता. तेना माटू वेहताना बातल इतेके निमा मावा हक हीमू लेवेके माटू मावा हक पिडंगना वेने पुंतोम. ताकीसी-ताकीसी नावा काल्कुने पुंड आंता. मति नन्ना रोमता हिल्ले, पैदल ताकतन. मावा हक ता लडाई लडेमायनीकी ताकतन. ओसो नाकुन नावा हक दोरकनाजोम नन्ना पेके वेने इद्रमे ताकितान. मोदी सरकार ओडकु-वेडांग कमा कीयनोरा काजे इद कायदा पंडतायो, तेना विरोध कीयनीकी माटू इगा वात्तोम. माकुन लज्जा वायामंता मावा सरकार इद्रम मावा काजे आल्सामंता. माटू इचोन दियांग तल लडेमासोर मंतोम मति माटू हारे मायोम. सरकार माकुन बचोन तिप्पल कित्तेके वेने जिद्द पोयसी ताना जवाब हियकोम. नावा बाबल ओसो मावा बाबाल ना बाबल बस्के दिल्ली हूडोर मति, इद 90 साल ता उम्र ते नाकुन दिल्ली गुडनीकी लागता. नाकुन पक्काय होंग वस्सा मंता इद मोदी सरकार पोरो. ओरु बद्रम तोरु मानय आदूर जनता ना काजे आल्सवालेवा अंबानी, अडानी लेहकाटा इचुवर मुल ना बारे ते आल्सा मंतोर.

मंदना, उडका-पेलना ओसो एरु मियना ता बातय सुविधा लेवा मंदना इतेके युद्ध कीयना तुक कमी आयो. मति बातय सुविधा लेवा ओसो प्राकृतिक संबंधित तिप्पल तुने सहे मायामंता इंदनादे आयो, सांगना पिनी ते वेने पुलिस बलकुना वाटर केनानकुना देब्बा तित्तांग. लाठी चार्ज ओसो कन्नीर पेसना आंसू गैस कुन वेने सामना कीयामंतांग. आंदोलनकारीर कुन दिल्ली ते नेंगा हियवा शासन-प्रशासन परताचोन कोशिश कित्तोर. बचोनो अडचनकु पुटटी कित्तोर. हरी ते कोय्येग मंदाना फेसिंग वायर तासतोर. कांक्रीट आदी कुन निल्पी कित्तोर. तलवार लेहका ता राडकुन उर्सकतोर. बेहरा-बेहरा कोदरांग कित्तोर. सडक तगा बेहरा-बेहरा ट्रक ओसो शिपिंग कंटेइनरकुन तासतोर. इव सबे तिप्पल तुन महिला किसानलोरु तमा किसान पुरुषलोरा संगे अट्टा ते अट्टा काल्पीसी हिम्मत, साहस ओसो संघर्ष कीयना जोश ते वेंडतांग. आंदोलनकारीरा विरोध ते सरकार ओसो गोदी मीडिया मनोवैज्ञानिक युद्ध ताकी कीयामंता. आंदोलन, आंदोलनकारीर ओसो नेतालोरा बारे ते दुष्प्रचार कीयामंता. आंदोलन कीयनोर कुन किराया एतिसी वात्तोर इंजी तोहतनीकी कोशिश कीयामंतोर. ओरा विरोध ते बचोनो अपमान कीयना लेहका ता पोल्लूंग वेहतामंतोर. इद्रम ता सरकार ता मनोवैज्ञानिक युद्ध किन वेने आंदोलन कीयना महिलांग सामना कीयामंतांग. महिलांग ना हिम्मत ओसो दृढसंकल्प मुन्ने इव सबे अडचनकु हारे माता.

आंदोलन ता पेरके वेने महिला किसानकु नित्तांग

महिलांग सिर्फ प्रत्यक्ष रूप तेने शामिल आयामंता इंदनादे आयो, इद ऐतिहासिक आंदोलन तुन निल्पी कीयना मैदे, इचोन लंबा समय एवना तेन ताकी कीयना ते महिला किसानलोरा महत्वपूर्ण भागीदारी मंता. लेक्कालेवा महिलांग ओसो किसान महिलांग इद आंदोलन ते अस्सल भूमिका निभा कीयामंता. लेक्कालेवा अज्ञात महिला किसान योद्धांग इद आंदोलन ता पेरके आदी कल्कु लेहका गटटिंग नित्तांग. नरका-पियल तना जमीन ता राका कीयना किसान इंजे नरका-पियल आंदोलन ते निच्चीमंतोर. इद्रम ते ओरा नेली ओसो खेती ता परिस्थिति बेले मंता? खेती बंद कित्तोर? आयो, खेती काम वेने जारी मंता. वर्रोर वर्रोर पारी हिसाब ते इचुन मुल आंदोलन ते शामिल आतेके इचुन मुल खेती काम कीयामंतोर. उंदी जबर्दस्त एकता ओसो सहकारिता खेती काम ते दिस्सा मंता. इद समय ते किसान महिलांगे ज्यादा खेती काम किन हूडा मंतांग. इचोके आयो, पुरुष किसानलोर बचोनो महीनांग आंदोलनकुने मत्ता कारण ते महिला किसानके लोता सबे जिम्मेदारिंग पूरा कीयामंतांग. इद्रम दिल्ली तेने आयो, तमा ओड़कु-वेडांग, लोन-दूवार ता दोगुनी जिम्मेदारी पोयसी किसान आंदोलन कुन मुन्ने ओयना मैदे महिलांग ओसो महिला किसानकु अस्सल भूमिका निभा कीयामंतांग.

नाकुन धमकी हीया परवोर..... पैसा ते वेने अस्सा परवोर

इद आंदोलन ते महिला किसान कुना भूमिका तुन पूरा दुनिया वेने मेचसोर मंता. दुनिया ते पेदेर गड़स्ता बचोको बुद्धिजीवी लोरा समर्थन वेने वेरकुन दोरकामंता. इद आंदोलन तुन नेतृत्व कीयना किसान महिलांग ना मैदे टाइम मैगजीन तना कव्हर पेज तुन समर्पित कित्ता. टाइम मैगजीन ता कव्हर पेज ते उंदी कैदे पिल्ला किन एतिसी उंदी कैदे नारांग हीसारे महिलांग ना फोटो हूडतेके अवु लड़ाई ते बचोन जिद्द पोयसी मंतांग इंदना समझेमायना आंता. 'नाकुन धमकी हीया परविर... पैसा ते अस्सा परविर' पोरोय ते इद पत्रिका ता कव्हर स्टोरी छापे कित्तोर. इद आंदोलन ते शामिल आयना संगे-संगे नेतृत्व कीयना पंजाब, हरियाणा ओसो उत्तरप्रदेश महिला किसानलोरा अनुभव ओसो तिप्पल ता बारे ते इद कव्हर स्टोरी ते



कोटतोरु. इवु महिला किसानकु सिर्फ कृषि कानूनकुना विरोध तेने आयो, पितृसत्ता, यौन-उत्पीडन ओसो लैंगिक भेदभाव ता विरोध ते वेने लडेमासोर मंतांग इंजो मैगजीन ते वेहतादू मंता.

8 मार्च, महिला किसान दिवस

इद आंदोलन ते महिला किसानलोरा सक्रियता तुन हूडसी इद साल ता 8 मार्च तुन 'महिला किसान दिवस' लेहका मानेमायना इंजी संयुक्त किसान मोर्चा निर्णय कित्ता.



ओरु आह्वान कित्तादू बातल इतेके 'बहनो रालो पर्वा संघ. ... मिलकर लड़ी हाकी जंग' (हेलोस्कु, मीटू दादालोरा संगे कलियसी वाटू... मनवा अधिकार मैदे एकता आसी लडेमायाकाल). इद आह्वान ता जबाव ते शासन-प्रशासन दिल्ली तल वायना महिलांग कुन रोमी कीसी महिला किसान दिवस तुन विफल कीयना लक्ष्य संगे पंजाब, हरियाणा ओसो उत्तरप्रदेश तल दिल्ली दायना राजमार्ग कुन बंद कित्तोर. मति अस्के वेने सिर्फ पंजाब, हरियाणा तल 50 हजार महिलांग दिल्ली ता टिक्री सीमा तगा एवतांग. ताना लोप्पा 80 साल ता डोकरी महिलांग तल 16 साल ता पिल्लांग वेने मंतांग. इद मौका ते टिक्री, सिंधु, शाहजाहानपुर, पल्वाल, घाजीपुर ते ताकाना कार्यक्रम कुने हजारों महिला किसानकु ओसो अविना यायो-पिल्लांग वेने शामिल आतांग. अद दिया सबे जागा ते ताकाना सभांग किन सिर्फ महिलांग ताकी कित्तांग. अध्यक्षता वेने अवे कित्तांग ओसो सभांग लोप्पा भाषण वेने अवे हित्तांग. इचोके आयो, अद दिया ता आंदोलन ता पांच केंद्रकुने तिंदना-उंडना तल पोयसी सुरक्षा व्यवस्था एवनाल सबे रकम ता जिम्मेदारी तुन महिलांग पूरा कित्तांग. दिल्ली हंदा परवा महिलांग तमा-तमा राज्यकुने महिला किसान दिवस ता आयोजन कित्तांग. अद मौका ते अलग-अलग राज्यकुने कृषि कानूनकुना विरोध ते महिलांग रैलींग, विरोध प्रदर्शन ओसो सभांग ताकी कित्तांग.

इद मौका ते पंजाब ता खेत मजदूर यूनियन ता चीफ तरनवंती बातल वेहता इतेके, पुरुष किसानलोरा समस्यांग

कुन आयो, महिला किसानलोरा समस्यांग कुन वेने केंजना. इद कृि 1 कानून ता दुष्प्रभाव बचोन पुरुष किसानलोरा पोरो आयारो अचोन महिला किसानलोरा पोरो वेने आयर. महिलांग लोतगा गुलामी आंदू ओसो देश ता वेने गुलामी आंदू... इद गुलामी पोरो मावा लड़ाई आंदू.

पंजाब ता स्त्री जागृति मंच ता सचिव अमनदीप डियोल ईले वेहता – 'पुरुष प्रधान समाज ते महिला किसान कोंडा ते दिस्सो, केव ते केंजा वायो. नेली ते जोर हेपुर पेस्सनाल बूता कित्तेके वेने जमीन ता मालिक पुरुष आइन्तोर. सबे अधिकार ओरा कैदे मंदान्ता.'

नक्सलबाड़ी हरी ते मुन्ने दायना

इद्रम किसान आंदोलन ओसो महिला आंदोलन कलिय-मेलिय ताकामंता. इद आंदोलन ते महिलांग ना भागीदारी ओसो बेरसी कीयना. इद आंदोलन सिर्फ कृषि कानून कुन वापस एताना तुके सीमित आयवा लेवा ओसो वेने मुन्ने दायना. महिला मुक्ति ता लक्ष्य पोयसी देश ते नरगे सालकुनाल क्रांतिकारी आंदोलन ताकामंता. इदे लक्ष्य ते देश ते ताकाना क्रांतिकारी आंदोलन ता नेतृत्व ते केएमएस लेहका ता कई क्रांतिकारी संगठन काम कीयामंता. नेंडू किसान आंदोलन तल नित्ता महिलांग ना इद संघर्ष

कीयना क्षमता, एकता, दृ ढसंकल्प महिला मुक्ति काजे कीयना आंदोलन ते शामिल आयाना. बस्के महिलांग सामाजिक श्रम ते समान भागीदारी आंतायो, उत्पादन ता सबे साधन पोरो ताना समान अधिकार मंदांतायो, लोता बूता तल तान मुक्ति दोरकिंतायो अस्केने महिला मुक्ति ता लक्ष्य सफल आंता. इविन हासिल कीयना इतके इद भूमि तल सामंतवाद, दलाल नौकरशाह पूंजीवाद ओसो साम्राज्यवाद अनि इद निल्पी कित्ता पितृसत्ता तुन मुट्टी कीतकेने आयापरिता. इवु मायना इतेके देश लोप्पा कृषि क्रांति आस्कुड लेहका मंदना नवजनवादी क्रांति तुन सफल कीसि पेरके समाजवादी क्रांति तुन सफल कीयना. इंजि देश लोप्पा नवजनवादी क्रांति ता लक्ष्य ते ताकना कृषि क्रांति ते लेक्कालेवा किसान ओसो भूमिहीन किसान शामिल आसी सशस्त्र संघर्ष कीयामंतोर. नक्सलबाड़ी सशस्त्र संघर्ष ता विरासत तुन पोरो तेहची अदे हरी ते मुन्ने दायामंतोर. इद कृषि क्रांति ते महिला किसान कुना, खेती मजदूरीरा ओसो अविस्कुना मियास्कुना अस्सल भूमिका मंता. इदे हरी ते महिला किसानलोरु किन ओसो अविस्कुना मियास्कुन मुन्ने दायना जरूरत मंता. अस्केने इद लूटी शासक वर्गकु कीयना लूटपाट किन मापा परिन्तोम. ★

लंबित मांग किन पोयसी आंगनबाड़ी कार्यकर्तांग ओसो सहायिकांग ना हड़ताल

छत्तीसगढ़ राज्य ता आंगनबाड़ी कार्यकर्तांग ओसो सहायिकांग इदु सरकार तमा समस्यांग किन हल कीयना तुक सुडुन वेने ध्यान हीवा हूडसि सरकार ता विरोध ते ओसो उंदी बेरा आवाज तेहतांग.अवु तमा मांग किन पोयसी 5 मार्च, 2021 ते छत्तीसगढ़ ता राजधानी रायपूर ते बूढापारा धरना जागा ते उददतांग.

अस्सल वेहतना इतेके राज्य ता आंगनबाड़ी कार्यकर्ता

ओसो सहायिकांग 2003 तल तमा मांग कुन पोयसी आंदोलन कीयामंतांग. इंजि इतके अविस्कुन 6000 वेतन हीयामंतोर. नेंडू दिया-दिया तुक मंहगाई बेरसामंता.



इद्रम ते इचोन कम पैसा ते पिस्सला परवोर. राज्य ता पूना बजट वात्ता पेरके आंगनबाड़ी कार्यकर्ता ओसो सहायिकांग ना लोप्पा सरकार पोरो होंग बेरसता. बारंक इत्तेके बजट ते अविस्कुना बाटा बातय आवंटन कीत्तद हिल्ले. अविस्कुना वेहाना बातल इतेके भाजपा सरकार मत्तास्के अवु वेतन बेरसी कीयना मैदेने अनिशिचतकालीन हड़ताल कीसी मत्ता. अस्के कांग्रेस पार्टी अविस्कुना मांग किन तना घोषणापत्र ते शामिल कीसोरे वादा कीत्तद बातल इतेके कांग्रेस ता

सरकार बनेमातेके अविस्कुना सबे मांग किन 2 महीनांग ना लोप्पा पूरा कीयकोम इंजी. नेंडू सरकार बनेमासी रेंड साल आयामंता. मति ओरु कित्ता वादा पूरा आत्तादू हिल्ले. कोरोनाकाल ते वेने आंगनबाड़ी कार्यकर्तांग ओसो सहायिकांग राज्यमंड सेवांग हित्तादू मंता. मति तेना बदला ते अविस्कुन बजट ते बातय दोरकतादू हिल्ले. वेतन बेरसी कीयनादू उंदि आयवा लेवा आंदोलन ता मुख्यतावु मांगआंगनबाड़ी

कार्यकर्तांग ओसो सहायिकांग कुन शासकीय कर्मचारी ता दर्जा हीयना. सुपरवाइजर ता जागा खाली मत्तेके कार्यकर्तांग किन ओसो कार्यकर्तांग ना जागा खाली मत्तेके सहायिकांग कुन अविस्कुना जागा ते पदोन्नति संगे पेंशन ओसो अस्पताल भत्ता वेने हीयना किन शामिल कीयना.

तृतीय वर्ग शासकीय कर्मचारी संघ वेने आंगनबाड़ी कार्यकर्तांग ओसो सहायिकांग ना आंदोलन तुक तमा समर्थन हीत्तोर. संघ ता प्रांताध्यक्ष वेने आंगनबाड़ी कार्यकर्तांग किन उंदि महीना तुक 12,000 रूपया ता वेतन हीयना इंजो मांग कीत्तोर. ★

8 मार्च, अंतर्राष्ट्रीय महिला दिवस ता 111वीं वर्षगांठ ता जय-जयकार!

महिला मुक्ति आंदोलन तुन मजबूत कीयाकाल ओसो ताना विस्तार कीयाकाल!

इद अंतर्राष्ट्रीय महिला दिवस ता 111वीं वर्षगांठ ता मौका आंदू. इद ऐतिहासिक मौका ते भारत देश ते महिलांग जोश-गिरदा ता संगे बचोनो कार्यक्रम कुन ताकी कित्तांग. मुख्य हिसाब ते हूडतेके इंजे देश लोप्पा किसान आंदोलन जोर-जोर ते ताकामंता. लगभग 500 किसान संगठनकुना संगे बने मत्ता किसान संयुक्तमोर्चा इद 8 मार्च तुन 'महिला किसान दिवस' घोषित कित्ता. इद मौका ते दिल्ली ता संगे-संगे देशमेंड महिला किसानकु किसान विरोधी, जन विरोधी, महिला विरोधी ओसो देशद्रोही कृषि कानूनकुन वापस एताना इंजी मांग पोयसी बचोनो कार्यक्रमकु ताकी कित्तांग.

इद मौका ते देश ता महिला मजदूरकु केंद्र सरकार तत्ता श्रम कानूनकुना लोप्पा कीत्ता बदलावकुना विरोध ते आवाज तेहतांग.

दंडकारण्य ते केएएमएस इद 8 मार्च ते जेल बंदीर किन रिहा कीयना मांग तेहता. इद मांग किन पोयसी नाटे-नाटे रैलींग, सभाग लेहका ता बचोनो कार्यक्रमकु ताकी कीसी 8 मार्च ता विरासत कुन मुन्ने ओयानीकी लडेमायकाल इंजि महिलांग किरिया कित्तांग. इद मौका ते जेल बंदीर किन रिहाई कीयना मैदे हस्ताक्षर अभियान वेने शुरू कित्ताद मंता. अद इंजे वेने ताकामंता.

उंदी वडका उत्पीडित ओसो लडेमायना महिलांग '8 मार्च' तुन तमा अधिकारकु मैदे लडेमायना दिया ता लेहका चिहिनत कित्तांग. ओसो इद मौका ते अव तमा समस्यांग कुना विरोध ते आवाज तेहतामंतांग. दूसरा वडका बचोनो रकम ता संसदीय पार्टींग, अविस्कुना महिला संगठनकु ओसो बहुराष्ट्रीय कंपनींग इद मौका ते महिलांग मैदे सिलाई करियना, शोभा-शोभा ता पुंगार पंडाना, अटाना-बोडसना, ओसो रंगोली पंडाना पोटी लेहका ता ताकी कीसोरे मंतोर. शोभा पोटी तासाना ओसो फैशन परेड लेहका ता ताकी कीयमंतोर. इद्रम 8 मार्च ता लड़ाकू विरासत तुन मरंगना लेहका कीयनादे आयो, अदिन खत्म कीयना इंजो लूटी शासक वर्ग साजिश कीयमंता.

इद लूटी शासक वर्ग लाखों कोशिश कित्तेके वेने 8 मार्च ता विरासत किन मरंगना लेहका कीया परवो, मापा वेने परवो. मजदूर महिलांग ता कुर्बानी तल पुटता इद विरासत बेस्के वेने लूटी आयना महिलांग मैदे प्रेरणा हीसोरे मंता. लडेमायना हरी दे अवस्कुन मुन्ने ओन्ता. अद्रमासी

लडेमायना महिलांग इद विरासत किन लगातार मुन्ने ओन्ता. लूटी व्यवस्था किन खत्म कित्ता पेरके वेने क्रांतिकारी दिवस लेहका 8 मार्च तुन मानेमान्तोर.

इद विरासत माकुन बद्रम दोरकता ?

विरोध, संघर्ष, विद्रोह, लड़ाई इंदनाव कोयतोरे किन्तोर इंदना सोच तुन पितृसत्ता पूरा समाज लोपा फैला कीयला कोशिश कीत्ता. इव कोशिश किन हारे कीसोरे महिलांग पितृसत्ता पुटतागडल विरोध, संघर्ष, विद्रोह, लड़ाई ते शामिल आयामंता. महिलांग ना इवु संघर्षकु पूंजीवादी समाज ते संगठित रूप एतित्ता.

पूंजीवादी समाज महिलांग किन स्वतंत्र रूप ते सामाजिक उत्पादन ते तत्ता. मति अदू महिलांग बेस बतकना इंजो, पितृसत्ता किन खत्म कीयना इंजो अद्रम किवो. नरगे मुल मजदूरीर किन दोरकि कीयना मैदे अद्रम कित्ता. इच्चोने आयो महिलांग ना मेहनत किन सस्ता ते लूटी कीयना मैदे अदू पितृसत्ता किन जारी तासता. महिलांग किन अबला, सुडला जीवा ता नाजूक, कोमल इंजी औद्योगिक श्रम ते लैंगिक विभाजन तत्तोर. अद्रमे महिला ओसो पुरुष मजदूरीरा नडमा एकता वायनायो इंजो वेने ईले कित्तोर.

पूंजीवादी समाज पुटतागडले ताना लूट ता विरोध ते मजदूर संघर्षकु शुरू आत्तांग. मति अविना लोप्पा महिलांग ना भागीदारी पोरोय तुके मत्ता. अव संघर्ष किन नेतृत्व कीयना मजदूर संगठनकु लोपा मंदना पितृसत्तात्मक विचारधारा ता कारण ते महिलांग किन संगठित कीयना कोशिश कित्तादू हिल्ले.

मति सामाजिक उत्पादन क्रम ते सामाजिक चेतना पेरस्ता. महिला श्रमिक हमेशा मैदे संघर्षकुना लोप्पा पोरोय तुके मंदा परवो आता. अद बेद तिप्पल ता परिस्थितिंग किन सामना कित्तयो अव परिस्थितिंगे अविस्कुन सक्रिय हिसाब ते शामिल आयना लेहका प्रेरित कित्ता. 15 घंटांग ता काम दियांग, कम से कम सुविधांग वेने हिल्लाद ओसो कम वेतनकुने अविस्कुन पिस्कट वात्ता. पुरुष ट्रेडयूनियन अविस्कुना समस्यांग किन ध्यान हीसोर हिल्ले इंदनादू बेस्के समझेमात्तयो अस्के तल अवु तमा आंदोलन कुन अवे नेतृत्व कीयला मैदे निर्णय कीत्तांग. इद्रम 1820 ते अमेरिका ता न्यू इंगलैंड टाइलरिंग ट्रेड्स ते पहली बेरा हडताल आता. ताना नेतृत्व सिर्फ महिला मजदूरकु कित्तांग. ओसो ताना लोप्पा सिर्फ महिला मजदूरकु शामिल आत्तांग. महिला

आंदोलनकु लगातार ताकाना कारण ते 1844 ते पहली महिला श्रमिक संगठन— लोवेल महिला श्रमिक सुधार संगठन ता गठन आता. 10 घंटांग ना काम ता दिया मंदना इंजो मुख्य मांग मत्ता. इद संगठन ता संघर्ष ता कारण तेने पहली बेरा कपड़ा कारखाना ते इचून सुधारकु तत्तोर. तेना पेरके कई क्षेत्रकुना लोप्पा महिला ट्रेड यूनियनकुना गठन आता. अगाडल महिला मजदूरकुना आंदोलन ओसो तेज आता.

8 मार्च, 1857 ते न्यूयार्क शहर ता कपड़ा कारखाना ता महिला मजदूरकु ऐतिहासिक आंदोलन कित्ता. अविस्कुना मुख्य मांग बातल मत्ता इतेके काम कीयानगा मंदना परिस्थितिग लोपा सुधार तत्तना, 10 घंटांग काम ता दियांग मंदाना, बराबर ता अधिकार मंदना, बराबर काम ता काजे बराबर वेतन हीयना. आंदोलनकारीरा पोरो पुलिसतोर हमला कीसी अद आंदोलन किन दबेकित्तोर. मति इद आंदोलन हमेशा ता मैदे रोमता हिल्ले. ताना पेरके ता सालकुना लोप्पो वेने 8 मार्च ते विरोध प्रदर्शन आत्तांगे.

51 सालकुना पेरके 8 मार्च, 1908 ते महिला मजदूरकु ओसो उंदी बेरा जबर्दस्त तरीका ते आंदोलन ता अक्कूम उरतोर. न्यूयार्क शहर ते कपड़ा कोट्टना महिलांग 8 मार्च, 1857 ता आंदोलन तुन मान हीसोरे अद दिया प्रदर्शन कित्तांग. अस्के महिला श्रमिक काम दियांग कम कीयना, वेतन बेरसी कीयना, महिलांग किन मतदान ता अधिकार हीयना, बाल श्रम व्यवस्था किन मापना, स्वेट शाप बंद कीयना इंजी इव मांग किन तेहतांग. अगा 15 हजार महिला मजदूरकुना संगे प्रदर्शन ताकता.

इव संघर्षकु उंदी ना पेरके उंदी ताकसोरे 22 नवंबर, 1909 ते 'अपरायजिंग ऑफ ट्वेंटी थौजंड' (20 हजार मुल कुना विद्रोह) शुरू आता. पक्काय तिप्पल मंदना ओसो नरगे समय ताकना संघर्ष ते महिलांग बेले वेने नित्ता परवो इद पोल्लू तुन उरगड़ ते जवाब हीसोरे महिलांग आदुर अरर्ना कालम ते वेने 13 हाटूम धरना कित्तांग. अद मौका ते आंदोलनकारीरकु हर दिया पुलिस ता देब्बा तित्तांग ओसो गिरफ्तारींग ओसो जेल ता सजांग वेने अरतांग.

अमेरिकी महिला मजदूरकु कित्ता इव संघर्षकु दुनियामेटोरा नजर अविना वड़का दायनल कित्तांग. अलग-अलग देशकुना कम्युनिस्टलोरु इव संघर्ष तल प्रेरणा हासिल कित्तोर. इद पृष्ठभूमि ते अंतर्राष्ट्रीय कम्युनिस्ट आंदोलन ता नेत्री कामरेड क्लारा जेटकिन ता नेतृत्व ते 1910 ते कोपेनहेगन ते ताकी कित्ता सोशलिस्ट महिलांग

जगरगुंडा एरिया ते अंतर्राष्ट्रीय महिला दिवस!

सुकमा जिला ता चिंतलनार इलाका ते 8 मार्च, 2021 ते अंतर्राष्ट्रीय महिला दिवस ता शानदार मीटिंग ताकता. नरकोम 10 बजे तल पियल 3 बजे एवनाल इद कार्यक्रम ताकता लोप्पा लडेमायना महिलांग जोश-गिरदा ते जोर-जोर ते नारांग हीसोरे रैली टेंडतांग. पेरके केएमएस ता इंडा -विव्युक्का मंदना लालझंडा तेहतांग. हत्ता साल 8 मार्च तल इद 8 मार्च एवनाल जनयुद्ध ओसो



जनसंघर्ष ते शहीद आता वीरांगनास्कुन सुरता कित्तांग. अविस्कुना आदर्श किन पोरो तेहवी अविस्कुना सपना किन पूरा कीयना मैदे क्रांति ता हरी ते मुन्ने दायना काजे किरिया कित्तांग. पेरके मीटिंग ताकी कित्तांग. पुलिस तोर महिलांग किन प्रताड़ित कीयना ओसो फर्जी मामलांग ते अरेस्ट कीसी हत्यांग कीयना तुन विरोध कीसोरे इद मीटिंग ते आवाज तेहतांग.

वक्तालोर हत्ता एक साल लोप्पा जगरगुंडा एरिया ते 60 महिलांग किन पुलिसतोर मारपीट कीयना, 7 महिलांग किन अरेस्ट कीसी जेल ते बंद कीयना, ओसो फर्जी मुठभेड़ ते तीन महिलांग किन हौकता घटनांग किन वेहतोर. ओरु जेल ते बंद महिला कार्यकर्तालोरु किन राजनीतिक बंदीर किन तत्काल रिहा कीयना ओसो महिलांग ना विरोध जरगता अत्याचार किन न्यायिक जांच कीयना मांग कित्तोर. इद कार्यक्रम ते सैकड़ों महिलांग शामिल आतांग. मिलिशिया सुरक्षा ते इद कार्यक्रम सफलता ते मारी कित्तोर. मिलिशिया लोप्पा वेने आधा मुल महिलांग मंतांग.

ना अंतर्राष्ट्रीय सम्मेलन ते '8 मार्च' तुन महिला अधिकार मैदे लडेमायना दिया लेहका चिहिन त कीयना इंजी उंदी प्रस्ताव कित्तोर .

इद्रम अंतर्राष्ट्रीय महिला दिवस ता पुटूल वेने कम्युनिस्ट आंदोलन ता पहल तल आता. ताना पेरके विभिन्न देशकुना लोप्पा कम्युनिस्ट पार्टींग नेतृत्व ते '8 मार्च' ताकी कीयना शुरू आता. भाकपा (माओवादी) वेने तेन क्रांतिकारी दिवस लेहका चिहिनत कित्ता. तेना नेतृत्व ते ताकाना महिला संगठनकु हर साल '8 मार्च' क्रांतिकारी स्फूर्ति संगे मानेमान्तांग.

'8 मार्च' - महिला मुक्ति ता चिहना (प्रतीक) आंदु

क्रांतिकारी महिला संगठनकु हर साल 8 मार्च ताकी कीयना महिला मजदूरकु कित्ता संघर्षकुन सुरता कीयना ओसो तान प्रशंसा कीयनादे उंदी आयो तेन ताकी कीयनादू वेने तेनागडल प्रेरणा एताना तेना विरासत किन मुन्ने ओयाना. बेव तिप्पल ता परिस्थितिग किन देहना लक्ष्य संगे अमेरिका महिला मजदूरकु लडेमायना मैदे हरी तोहतांगो, अव दुनियामेटे बेरसना फासीवाद ता पृष्ठभूमि ते नेंडू वेने मजदूरकु अद्रमतांग परिस्थितिग संगे जुझेमासोर मंतोर. मुख्यरूप ते मावा देश ता बारे ते वेहाना इतेके इगा

इंद्रावती एरिया ते 8 मार्च, अंतर्राष्ट्रीय महिला दिवस

इंद्रावती एरिया ते 8 मार्च, अंतर्राष्ट्रीय महिला दिवस मानेमायना काजे मुन्ने एरिया लोप्पा मुंड जनसंगठनकु नेतृत्व ते प्रचार कार्यक्रम ताकता. केएमएस छापेकित्ता पर्चा, पोस्टरकु ओसो बैनरकु संगे जोरथोर ते प्रचार ताकता. पेरके पंचायत स्तर ता 8 सभाग किन ताकी कित्तोर. इव सबे सभाग ते 1605 महिलांग, 906 कोयतोर, 350 पिल्ला-पेकोर शामिल आतोर.

इद मौका ते सरकारी हिंसा, झूठा मामलांग ते महिलांग किन जेल ओयना तुन विरोध ते आवाज तेहतोर. मिलिशिया ता राका नडमा इव सबे सभाग सफलता संगे मारी कित्तोर.

कोविड-19 इंजी जाइपिसी केंद्र सरकार श्रम कानूनकुना लोप्पा बदलाव तत्ता. बचोको सालकु तल हासिल कित्ता 44 श्रम कानूनकुन चार कोडकुने बदले कित्तोर. मुंड राज्यकुना लोप्पा— उत्तरप्रदेश, मध्यप्रदेश ओसो बिहार ते मुंड सालकु एवनाल श्रम कानूनकु लोप्पा छूट हीयना काजे अध्यादेश (उत्तरप्रदेश टेम्परी एग्जंप्शन फर सस्टेइन लेबर लास आर्डिनंस लेहकातावु) तत्तोर. इद अध्यादेश तीन राज्यकुना मैदे तीन सालकुना मैदे तत्तादू मंता इंजी मजदूरीर कुन ओसो कर्मचारीर किन हरीं लेसी कीयनीकी वेहतामंतोर. मति तेन स्थायी कानून लेहका पूरा देश ते लागू कीयानूर. अस्सल वेहतना इतेके सबे श्रम कानूनकुन रद्द कीयना कोशिश ता लोप्पा इव सबे कीयामंतोर. श्रम कानूनकु लोप्पा कित्ता बदलाव ओसो इव अध्यादेश श्रमिकलोर ओसो कर्मचारीर कुना अधिकारकु पोरो देब्बा हीयनादे आयर. तेना अनुसार 8 घंटांग काम कीयना तुन 12 घंटांग काम कीयना लेहका कीयानूर. वेतन कम कीयानूर. पेंशन, स्वास्थ्य बीमा, लीव एनकैशमेंट, दुर्घटना आतेके मुआवजा लेहका ता श्रमिककुना ओसो कर्मचारीरना बचोनो मूलभूत सुविधांग कुन टेंडसित्तोर. बचोनो कानूनकुन रद्द कित्तोर. ओवर टाइम ता काजे अतिरिक्त वेतन दोरको आयर. कार्यघंटांग ओसो शिफ्टकुन निर्धारित कीयना, श्रमिकलोरु किन नियुक्ति ओसो टेंडना ता निरंकुश अधिकार मालिकलोरा कैदे मंदार. श्रमिकलोरु किन आपूर्ति कीयना ठेकेदारलोरु किन लाइसेंस ता जरूरत मन्नो अयनूंग. हडताल ता अधिकार कुन कमजोर कीयानूर. उद्योगपतिर बेस्के वेने तमा कंपनींग किन बंद कियनूर. ओसो मजदूरलोर किन सडक ते दोबसियानूर. इद्रम मजदूरीर ओसो कर्मचारीर किन गुलाम बने कीयानूर.

अस्सल लंबा समय एवनल बेहरा पूंजीपतिर ओसो ओरा वकालत कीयानूर अर्थशास्त्रीर वेहता मंतोर बातल इतेके बने कित्तावु कानूनकु देश ता बेहरा उद्योग ओसो व्यापार संस्थांग ना विकास ते अडचन पुट्टी कीयानूर. अदेन मैदे इवु कानूनकुन रद्द कीयना मैदे देशी-विदेशी कॉर्पोरेट घरानांग, सरकारकु दबाव तासामंता. कार्पोरेट घरानांग किन सेवा कीयना सरकारकु वेने तेना मैदे तैयार

मत्तोर. बेस्के तल मोदी सत्ता ते वात्तोरु अस्केडल तल ओरु 'मुन्ने ता कालम ते बने कित्तादू कानूनकुन' रद्द कीयना जरूरत किन बार-बार वेहिन्दूर. मति जनता ना होंग तल रैइसी इद्रम हिम्मत कित्ता हिल्ले. उदाहरण मैदे बेस्के तल लंबित जनविरोधी नीतिंग कुन जनता पोरो मेत्तना मैदे शासक वर्गकुन कोविड-19 ता संकट ते उंदी बेस ता मौका दोरकता. अद्रमे श्रम कानूनकुना संगे करर्सला वेने अस्सल ता मौका दोरकता.

समाज किन आई लेवेके बद वेने दूसरा-दूसरा तबकांग किन आई दुष्प्रभावित कीयना बददे वेने विषय अद समाज लेवेके दूसरा-दूसरा तबकांग ता महिलांग किन ओसो कई गुना दुष्प्रभावित किंता. इद्रम ते श्रम कानूनकुना लोप्पा कित्ता इव बदलावकु महिला मजदूरकिन कई गुना नुकसान किंता. मजदूरीररा मैदे केंद्र ते 44 कानूनकु ओसो तेनकु ज्यादा राज्य कानून मत्तास्केने पूंजीपतिर पितृसत्ता किन इस्तेमाल कीसी महिलांग ना मेहनत किन जोरशोर ते लूटी कित्तोर. इंजे इद कानूनन अधिकार खत्म आत्तस्के महिलांग ना परिस्थिति ओसो इनम आयर.

महिला मजदूर ओसो महिला किसानीर ना संगे-संगे देश ते सबे उत्पीडित वर्गकु, तबकांग ता महिलांग पोरो शासक वर्गकु पितृसत्तात्मक शोषण तुन ताकामंतांग. साम्राज्यवादी जहरीली संस्कृति ना कारण ते महिलांग पोरो रोजे-रोजे लूटी बेरसामंता. खासकर ब्राह्मणीय हिंदुत्व फासीवादी ताकतकु सत्ता ते वात्ता पेरके देश लोप्पा आदिवासी, दलित, धार्मिक अल्पसंख्यक महिलांग पोरो अत्याचार बेरसता. कटुआ, उन्नाव, हाथरस लेहका ता बचोनो अत्याचार घटनांग ते ब्राह्मणीय हिंदुत्व ताकतकुना लज्जा टेंडना लेहकाता भूमिका बाहर पेसता. दलितकु, आदिवासीर, महिलांग पोरो जुल्म ता खुला छूट हीयना मनुस्मृति तुन पालन कीसोरे ब्राह्मणीय हिंदुत्व फासीवादी ताकतकु महिलांग किन लूटी कीयामंता. तेन विरोध कीयना प्रगतिशील ओसो जनवादी महिलांग ओसो छात्रलोरा पोरो वेने मनु वारिश लोर हमलांग कीयामंतोर. संघर्ष ताकाना इलाकांग ते पुलिस ओसो सरकारी सशस्त्र बलकु महिलांग पोरो खासकर आदिवासी महिलांग पोरो लेक्का लेवा अत्याचार जरगामंता. अविस्कना पोरो सरकारी दमन दिया-दिया तुक बेरसामंता. राष्ट्रीय शिक्षा नीति-2020 ता कारण ते पिल्लांग ना पढाई प्रभावित आयामंता. महिलांग पोरो ताकाना इव सबे लूटी ता अस्सल मोदोल सामंतवादी, साम्राज्यवादी ओसो दलाल नौकरशाही पूंजीपति वर्गकुना ओसो पितृसत्तात्मक व्यवस्था ता लोप्पा मंता. इद व्यवस्था किन जारी तासाना मैदे महिलांग पोरो शोषण ओसो उत्पीडन ताकामंता.

8 मार्च ता विरासत किन जारी तासना इतेके इद्रम ता शोषित उत्पीडित समाज ता विरोध ते संघर्ष कीयना. अद समय 8 मार्च ता आंदोलन इचुन सीमित मांग किन पोयसी

भारत देश लोपा पहली शिक्षिका सावित्रीबाई फूले पिस्वल तिना प्रेरणा एतसोरे उत्पीड़ित जातिंग, वर्गकुना

महिलांग किन पढ़ाई दोरकवा लेवा कीयना 'नई शिक्षा नीति-2020' तुन विरोध कीयकाल!

मार्च 10, सावित्रीबाई फूले ना हामुर ता दिया आंदु, मेजारिटी जनता किन लूटी कीयना मैदे बने मात्ता जाति व्यवस्था तुन मापना मैदे हायनाजोम काम कीत्ता ज्योतिबा गोविंदराव फूले ना जीवनसंगिनि आंदु. सावित्रीबाई फूले 3 जनवरी, 1831 ते महाराष्ट्र ता सतारा जिल्ला, नाईगाम नाटेने पुटता. 9 साल ता उमर ते ज्योतिराव फूले संगे मर्मी आत्ता पया ओनागने पढ़ाई करित्ता. वीर इरवुर शूद्र ओसो दलित जाति ना महिला मैदे पहली बार स्कूल शुरू कीसि पढ़ाई करहतोर. 18 साल उमर तिना अद स्कूल लोपा गुरुजी काम कीत्ता सावित्रीबाई फूले भारत देश लोपाने पहली महिला गुरुजी आंदु. जाति आधारित सामंतवादी व्यवस्था लोपा ब्राह्मणीय विचार निंदता उच्च जातिनोर इसुंता नेल्लुटा काम तुन वेने रोका कीयलासि नरगे कोशिश कीत्तोर. हमलांग कीत्तोर, अपमान कीत्तोर मति सावित्री बाई फूले हिम्मत ते दृढसंकल्प संगे अविन सामना कीत्ता. पढ़ाई संगे सामाजिक चेतना, ज्ञान पेरसि मंजि उत्पीड़ित जाति ना महिला ना पिस्वल विकास आंता, सुदरेमांता इंदना विश्वास संगे हायनाजोम काम कीत्ता. समाज लोपा मनुवाद ता पितृसत्ता विचारधारा फैलेमासि मत्ता अद कालम ते महिला इतके कमजोर मंता इंजि, दूसरोरा पोरो आधार आसिये बतकिंता इंजि नेक्का सुडला हूडसोरे महिला इतके ओंड जानवर लेक्काटदे इंजि आल्सनोर. असुंता समाज लोपा तना कोयतोर ज्योतिरावफूले संगे गटिटंग नित्ति मंजि बाल विवाहकुन, सती प्रथा इसुंता सामाजिक दुराचार किन विरोध कीत्ता. अंधविश्वास, ओपवा रीति-रिवाज ना विरोध ते लड़ेमात्ता. रांडि मुत्तेस्क किन ओसो मर्मी आयना हक मंदना इंजि, अलग-अलग जातिनोर मर्मी आयना इंजि प्रोत्साहन हीसोरे पीड़ित महिला किन वेल्ला मदद हीत्ता. गुलाम तुन गुलाम आसि बतकना परिस्थिति ते मत्ता श्रमिक महिला ना सामाजिक ओसो सांस्कृतिक स्तर तुन विकास कीयना मैदे सावित्रीबाई फूले तना पिस्वल तुन अर्पित कीत्ता. प्लेग बीमारी मत्ता मरीजलोर किन सेवा कीसोरे अदे बीमारी तुंडता कारण ते सावित्रीबाई फूले 10 मार्च, 1897 ते डोलता. ताना हामुर ता 123 साल ना पया

वेंडे भारत देश लोपा महिला ना स्थिति तुन हूडतेके पोरो-पोरो उचुक बदलावकु दिस्सिंता मति, मोदोल तिना बदलाव वात्तद हिल्ले इंजि मनाकिन समझेमायमुंता. सत्ता ते बेनोर मतके वेंडे लूटी वर्गमतोरा फायदा मैदे समाज लोपा पितृसत्ता ता लूटी तरीका किन, पुरुष प्रधान विचारधारा तुन निल्वि कीत्तोर.



इविना कारण ते उत्पीड़ित वर्ग ना, पेरके अरता जातिना, दलित ओसो आदिवासी महिला ना पिस्वल लोपा तिप्पल इंका वेंडे पेरस्ता.

उपनिवेश भारत ते ज्योतिबा फूले, सावित्रीबाई फूले इद्रम ता सामाजिक सुधारवादीर कीत्ता कोशिश तिना, आल्केने साम्राज्यवादी विरोधी, भूस्वामी विरोधी जन आंदोलनकुना कारण ते जनताना मांग अनुसार 1947 पेरके उचुक कानून कुन बना कीसि संविधान लोपा रास्तोर. मति अविन अमल कीवा लेवा जनता किन धोखा कीत्ता शासकवर्गनोर जमने-जमने अविन संविधान तिना वेंडे टेंडामंतोर. शिक्षा तुन जनताना मौलिक अधिकार लेक्का चीनेमायना विषय लोपा वेंडे ईलेने आयमंता. साल दर साल प्राथमिक शिक्षा तिना उच्च स्तर ता शिक्षा एवना निजीकरण कीयना, बाजारीकरण कीयनद पेरसोरेमंता. ईले आसि शिक्षा नरगे फायदा गडसना बाजार ता चीज लेक्का बनेमात्ता. इसुंता परिस्थिति ते सामाजिक भेदभाव, जातिप्रथा कारण ते दबेमत्ता वर्गकिना, जाति ना मेजारिटी पिस्वांग पितृसत्ता ता कारण ते प्राथमिक पढ़ाई तगा रोमा मंतांग इंजि

ताकता. मति इंजे 8 मार्च ता लक्ष्य विस्तृत आता. काम कीयना घंटांग किन कम कीयना ओसो वेतन बेरसी कीयना मैदेने आयवा इंजे उत्पादन साधनकुना पोरो मेहनतकश जनता ना अधिकार मैदे मांग कीयामंतांग. ताना लोप्पा महिलांग ना समान भागीदारी मैदे, मताधिकार मैदेने आयो इंजे जनता ना राजसत्ता मैदे वेने आंदू. ताना लोप्पा महिलांग ना सही भागीदारी मैदे आंदू. काम कीयना जागा ता हालत सुधरेकीयना मैदेने आयो समाज ता लागवा हालत किन खत्म कीयना मैदे इतेके सामंतवादीर,

साम्राज्यवादीर ओसो दलाल पूंजीपति नौकरशाहीर ना लूट किन ओसो ओरा नेतृत्व ते बेरसना पितृसत्ता किन खत्म कीयना मैदे, शोषण लेवा, उत्पीड़न लेवा, भेदभाव लेवा, हिंसा लेवा, अत्याचार लेवा अद्रम ता समाज किन स्थापना कीयना मंता. नवजनवादी क्रांति संगेने इद लक्ष्य हासिल कीयना समझदारी ता संगे नेंडू देश ते क्रांतिकारी महिला आंदोलन ताकामंता. शासक वर्गकु ताकी कीयना भीषण दमन तुन सामना कीसोरे इद मुन्ने दायामंता. सबे लूटी आयना महिलांग इद हरीं तुन ते मुन्ने दायना. ★

अलग-अलग सर्वेक्षण कीत्ता लोपा वेहतद मंता.

1991 तिना सरकारकु नव उदारवादी नीतिंग किन अमल कीसोरे भारतदेश ता अर्थव्यवस्था तुन साम्राज्यवादीर किन अनुकूल मंदना अर्थव्यवस्था लेक्का बदली कीयना लोपा पोटी आयमंतोर. 2014 तिना देश लोपा ब्राह्मणीय हिंदुत्व फासीवादीर सत्ता ते वत्तागा तिना हूडतेके महिला किन परिवार तुके सीमित कीयना ब्राह्मणीय हिंदुत्व सामंतवादी संस्कृति तुन पेरसि कीयना मैदे पूरा अधिकारतंत्र तुन इस्तेमाल कीयमंतोर. विश्व बाजार संगे सांठगांठ आत्ता मनुवादी विचार तोर तमा फायदा तुन पूरा कीयना लेहका, अनुकूल मंदना लेहा वायना पीढी किन तैयार कीयना इंजि, हिंदू राष्ट्र तुन निर्माण कीयना लक्ष्य पोयसि काम कीयमंतोर. अदिन मैदे शिक्षा व्यवस्था लोपा नरगे बदलाव तत्ताना इंजो 'नई शिक्षा नीति-2020' तुन तत्तोर. ऑडोय माटा ते केत्तना इतके इद नीति, शिक्षा तुन कार्पोरेटीकरण, भगवाकरण, केंद्रीकरण कीयना मैदे तैयार कीत्ता घोषणा पत्र लेहका मंता. सार्वजनिक शिक्षा पोरो मर्स देब्बा वाटता. 'हिंदुत्व' संस्कृति संगे सबेतोरा सोच तुन, व्यक्तित्व तुन बदली कीयना इंजो ओरा योजना. हिंदू संस्कृति इंजोरे वीर वेहतनाद पूरा ब्राह्मणीय सामंतवादी पितृसत्ता विचार संगे मंजी महिला किन नेक्का विरोध कीयना स्वभाव मंदनाद आंदु. इद संस्कृति सती प्रथा तुन, बाल विवाह तुन समर्थन कीता. अंधविश्वास किन, धर्मांधता तुन पेरसि कीसोरे हेतुबद्ध विचार तुन विरोध कीता. महिला हमेशा कोयतोरा नियंत्रण ते मंजि लोत्ता काम तुक सीमित आसि मंदना इंजि आदेश हींता. ओसो दूसरा चप्पा बर्बरता पूर्वक छुआछूत तुन, जाति व्यवस्था तुन समर्थन कीयना संस्कृति आंदु. नई शिक्षा नीति लोपा धार्मिक शिक्षा तुन, रीति-रिवाज तुन कारतना मैदे धार्मिक संस्थांग कुन अनमोदन हीयकोम इंजो रास्तोर. इतके जाति ओसो धर्म लोपा वेहता महिला विरोधी ता ओपवा विषय कुन ओसो फेला कीयनोर. इदिना कारण तेने स्कूल किने, कॉलेजकु लोपा पढेमायना पिल्लांग पोरो अत्याचार, हमलांग, हत्यांग इंसुंतव पेरसामंता. अदिनके नरगे संख्या ते पिल्लांग प्राथमिक शिक्षा तुन मारि कीवा मुन्नेने विडसामंतांग. मुन्नेटले जाति पेददेर ते पढाई तुक जेक आत्ता शोषित वर्गकुनोर इंजि जाति प्रथा ओसो पैसा जोडेमात्तांकु पढाई दोरकवा लेवा आयमंतोर. इदिना लोपा वेंडे पिल्लांग नेक्का भेदभाव ता शिकार आयमंतांग.

सेकंडरी स्कूलकुना 5 से 10 किलोमीटर ता दायरा ते मंदना आंगनबाडी ओसो दोड स्तर ता सबे स्कूलकु किन जोडा कीसि ऑडोयस्कूल बिल्डिंग बना कीयना इंजि नई शिक्षा नीति लोपा केत्तामंतोर. ईले कीतके नाहकुने मंदना पिल्लांग-पेकोर पढाई मैदे बेचोन कोटो किलोमीटर जूई मंदना स्कूल किने दायालागिंता. दलित, आदिवासी पिल्लांग नरगे जूई मंदना स्कूल किन दायना समय ते दिनाले यौन शोषण ता शिकार आयमुंता, असुंता हमलांग पेरसा मंता. अदिन मैदे स्कूल पढाई कीयना समय तेने पढाई तुन

विडस्ता पिल्ला ना संख्या नरगे पेरसामंता.

सरकार ता बाता नियंत्रण लेवा मंदना विद्या कार्पोरेटीकरण तुन अमल कीयना मैदे नई शिक्षा नीति पूरा मौका हीयामंता. इतके जनता किन मुफ्त शिक्षा सुविधा हीयना जिम्मेदारी तिन सरकारकु विडसि मंजि शिक्षा क्षेत्र तुन निजीतोर किन, कार्पोरेट संस्थांग किन ओपि कीयमंतोर. नरगे फायदा गडसना मैदेने शिक्षा संस्थांग किन ताकि कीसोरे फीज तुन नरगे पेरसि कीयना कारण ते मेजारिटी पिल्लांग पढाई तुन विडसि मंजि शिक्षित आयवा अनपढ़ हिसाब तेने मंदांता. मुन्नेटल हूडतेके वेंडे दलित, आदिवासी जनता लोपा प्राथमिक शिक्षा तुन हासिल कीत्ता पिल्लांग 10 प्रतिशत वेंडे हिल्लेंग. इद नई शिक्षा नीति ता कारण ते पढाई तुन अस्सा परवा निरक्षर बनेमासि देश, विदेश कार्पोरेट व्यापार वर्गतोर किन, पूना बडा भूस्वामीर किन नेक्का कम कूली ते काम कीयना बेरोजगारीर बने मायनुर.

सावित्रीबाई फूले इंसुंतोर बेव आशय संगे काम कीत्तोरो अविना खिलाफ ते काम कीयना नरेंद्रमोदी सरकार सबे जनता किन गति कीयना मैदे सावित्रीबाई फूले ना जन्म दिवस तुन जोरशोर से मानेमायला प्रचार कीयमंता. साम्राज्यवादीरा फायदा मैदे काम कीसोरेने इद देश तुन हिंदू राष्ट्र बना कीयना इंदना तमवा लक्ष्य तुन हासिल कीयना मैदे पूरा सत्ता तुन इस्तेमाल कीयमंतोर. किसान विरोधी, मजदूर विरोधी कानूनकु तत्ता कारण ते अव वर्गकिना महिला सबे रकम ता जनवादी हक-अधिकार तिंचि वंचित आसि ओसो गुलाम लेहका बतकना स्थिति बनेमायमंता. जंगल तिना आदिवासीर किन जबरन पूंडला मैदे रंग-रंगीना कानूनकु तत्तामंतोर. आदिवासी जनता ना अस्तित्व तुके खतरा मंदना इंसुंता परिस्थिति लोपा शिक्षा, स्वास्थ्य सुविधा बेव वेंडे दोरकवा अव महिला नरगे तिप्पल ते बतकामंता. जनता किन जनवादी हक-अधिकार तिंचि वंचित कीसि देश ता संप्रभुता तिन वमसोरे मंदना इद नव औपनिवेशिक शासनकाल ता इद संदर्भ ते सावित्रीबाई फूले लेहकटा प्रगतिशील सुधारवादीर उत्पीडित वर्गकुना, जाति ना महिला ना विकास मैदे अर्पित आसि काम कीत्ता तरीका सबे जनता किन मुख्य रूप ते महिला किन, क्रांतिकारीर किन प्रेरणा हीयामंता.

जीवा ता महिला लोकुर,

वराट, 8 मार्च श्रमिक महिला ना संघर्ष विरासत तुन मुन्ने ओयना संदर्भ ते सावित्रीबाई फूले पिस्वलमंड कीत्ता काम तिना करियाकाल. उत्पीडित वर्गकुना, तबका ना, दबेमात्ता जाति किना महिलांग सबेतोर एकता आसि आस्क-कोयतोर बराबर इंजोरे तमवा जनवादी हक-अधिकार किन हासिल कीसि सबे क्षेत्र ने विकास आयना मैदे लूटी शासकवर्ग किना खिलाफ ते राजी लेवा लड़ाई कीयनदे सावित्रीबाई फूले आल्सता आशय कुन हासिल कीयना हरी आंदु.

★

पेरिस कम्पून लोप्पा 'आधा आकाश'

मानव इतिहास लोप्पा सर्वहारा वर्ग ता नेतृत्व ते बनेमात्ता पहली सरकार पेरिस कम्पून आंदु. अद कम्पून 18 मार्च, 1871 तिचि 28 मई, 1871 एवना सिर्फ 72 दियांग ताकि मत्ता, मति दुनिया मंड ता उत्पीडित जनता किन बेस

ता बतकड काजे आशा कीयना मैदे विश्वास हीत्ता दिया आंदु. अव 72 दियांग ना अनुभव तिना उंदि पक्का जनता, दूसरी पक्का पूंजीपतिर वेल्लाय सबक एतसोरे करित्तोर. पेरिस कम्पून लोपा हन्नी मन्नी जीवा इंजो लडेमात्ता महिलांग ना योगदान तुन चीनेमासोरे मार्क्स ईले वेहतोर - 'क्रांति सफल आयना लोपा महिलांग महिलांग ना हिसाब तेने बिडिया ताकत बनेमांता'. पेरिस कम्पून ता 150 वीं वर्षगांठ ता मौका ते ओसो उंदि बेरा महिलांग ना भूमिका तुन सुरता कीयकाल.

बेव परिस्थिति ने कम्पून बनेमात्ता:

1870 ता एददी कालम ता जर्मनी ते शासन ताकि कीयना बिस्मार्क किन, फ्रांस ते शासन कीयना नेपोलियन नडमा युद्ध जरगता. अद युद्ध फ्रांस तुक नुकसान कीत्ता. 3 सितंबर ते जर्मनी सेना फ्रांस सेना तुन (प्रशा) घेराव कीसि नेपोलियन किन पोयता. ताना पया ताकता राजनीतिक बदलावकुना कारण ते फ्रेंच रिपब्लिक बनेमात्ता. राष्ट्रीय स्तर ता नेता लेहका थियेर चुनेमात्तोर. पेरिस तुक 10 मील जेक मंदना वर्साय इंदनाद थियेर सरकार ता केंद्र मत्ता. पेरिस पूरा जर्मनी दोड मत्ता. पेरिस अर्थ व्यवस्था पूरा मुटता. अद समय ते सहन कीया परवाप इरंगम मत्ता. अट्टना मैदे वर्की वेंडे दोरकवा लेवा स्थिति वत्ता. 1871 ते रोटीकुना मैदे हमलांग जरगता.

बेरोजगारी समस्या वेल्लाय बेरस्ता. नेशनल गार्ड सैनिक लोरा वेतन डेढ फ्रैंक मत्ता. अद्रम ता परिस्थिति ते काम कीया परदना कोयतोर पूरा नेशनल गार्ड लोपा भर्ती आत्तांक ओरा संख्या 3 लाख तुक बडेमात्ता. जर्मनी तिचि

मंदना खतरा तुक वीडि शहर ते मंदनोरा लोपा पेरसना अशांति खतरातद इंजो आल्सता थियेर जर्मनी ता मुन्ने आत्मसमर्पण कीत्तोर. पेरिस तुन तनवा नियंत्रण ते तत्तला मैदे अगा मंदना तोपकु अड्डम आयमंता इंजो थियेर अविन पोयदला मैदे पेरिस ते मंदना तोप खाना पोर्रो हमला कीत्तोर. तोपकु तमवा इंजी जनता आल्सिंदु. बारांक इतके तोपकुना मैदे हर मानय तिचि 10 सेंटायम (अगा ता पैसा) वसूल कींदुर. अदिनके जनता थियेर ना हमला तुक पलटा जवाब हीत्तोर. आले आसि प्रशियाई प्रतिनिधिलोर ओसो थियेर सैनिक बल मिर्रतोर. अस्के जनता तमा सरकार तुन निल्पी कित्तोर. पेरिस कम्पून बनेमात्ता.



लुइस मिशेल



येलेना दमित्रियेवा

पेरिस कम्पून ता महिला शहीद योद्धा किन जोहार !

पेरिस कम्पून मैदे बचोन मुल तमा जीवा ता कुरबानी कीत्तोर, बचोन मुल प्रवास ओसो आजीवन कारावास सजा ता थिकार आत्तोर. वेर लोपा नरगे मुल महिलांग वेने मंतांग. मति अविस्कुना लोपा उचुक मुल महिलांग ना पेदेरकु दोरकता. इद संदर्भ ते मनल अद्रम पुत्ता ओसो पुनवा बहादूरलोर किन सुरता कीयकाल.

मनाकिन दोरकता महिलांग ना पेददीर - लुइस मिशेल, येलेना दमित्रियेवा, नथाली लामेल, आंडू ली, बियाट्रिस एक्स्क्यूपिन, सोफी पयोरीर, एना जाक लॉर्ड, मेरी केथरीन रिगिस्सार्त (महिला बटालियन की कमांडर), लूसी नेकी बेकर (कंपनी कत्यान), अलाइन जाकीर, मार्सेल तिनायर, ओटाविन टार्डिफ, ब्लांच लेफीब रे, जोसिफीन कोर्टोइस, मरिया डाइसइमस, नोमीस लेक्लास, स्काकिंग मॅडर, जोसिफीना मिम्मेट, वर्जीनिया लेनोर्देज, रोनाली गैलार्ड, अल्फान्सिस ब्लांचर्ड, मेरी कार्पियर, जोन मूर, मेडेलिना बिल्लाट्ज, आगस्तीना ग्रद्रेयड, यूनिनी रोजियन, मालवीना पोटाइन, युलेनिया पोपोवीन, विक्टोरिया जार्जेट, पेजोरी-मेरी-हिरले कोपेट, क्लाडिन लामड्टर.

कम्पून बनेमायना मुन्ने महिलांग ना परिस्थिति:

अद समय ते वर्कर्स पार्टी ता नेतृत्व पोर्रो अराजकतावाद ता संस्थापक पियरी जोसेफ प्रूधों (1805-1857) ना प्रभाव मत्ता. दूसरा बादशाह ना समय ते प्रूधों मजदूर नेताल मत्तोर. महिलांग ना बारें ते प्रूधों ना दृष्टिकोण तुन भारत ता मनु ना दृष्टिकोण संगे तुलना कीयनांता. ओना विचार ते 'महिला इंदनाद शोभा ता उंदि जानवर आंदु', 'पुनरुत्पादन कीयना मैदे प्रकृति महिला किन एंचता', 'पिल्ला पुट्टी कीयना मैदे आयवा महिला ना अस्तित्व तुक बाताय कारण तोंदो', 'मर्मी इंदनाद अविन नियंत्रण कीया परिंता,

छोड़-चिट्ठी ता अधिकार अविन हीयनायो', 'दूसरा कोयतोना संगे संबंध, गद्दारी, वेश्यावृत्ति, दाडुंग उंडना इद्रम ता बेवाय कारण मतके वेंडे मुज्जाल तना मुत्ते किन औकनांता' – इद्रम ओर कोयतोर किन सुझाव हीत्तोर.

1864 ते बनेमासि पया पहला इंटरनेशनल इंजो जनता लोपा पेदेर आत्ता इंटरनेशनल वर्किंग मेन्स एसोसियेशन ता जनरल काउंसिल (महासभा) लोपा महिला किन वेंडे सदस्यता हीयना इंजि मार्क्स ना नेतृत्व ते प्रस्ताव तास्तद मत्ता. मति अद प्रस्ताव हारे मात्ता. 'महिला ना स्थान संगठन ते आयवा ओइजल तगे मंता' इंजो पुरुष लोरा विचार मत्ता. इद समस्या तुन हल कीयलासि सब्बे विभागकु बेगटाव अगा महिला ना सदस्यता पारो निर्णय एतना इंजि फ़ैसला कीत्तोर. फ्रेंच विभाग महिला किन सदस्यता हीयना इंजि प्रस्ताव कीत्ता.

मुन्टेल ताकता महिला ना प्रतिरोध ता आवाज:

इद्रमता परिस्थिति मतके वेंडे महिला केमेके मत्तद हिल्ले. महिला ना बारें ते डेमोक्रेटलोरा विचार तुन आलोचना कीसोरे जेन्नी-डी-हेरिकोर्ट (1809-1875) पेदेर ता नानो ईले वेहता – 1789 ता क्रांति तुक महिलांग जेक मंदना तुक कारण बाता इतके अस्के मानव अधिकारकुना बारेंते घोषणा कीत्ता लोपा महिला ना बारें ते बाता वेहवा मत्तोर. 1848 क्रांति ता समय ते वेने अद नानो ईले वेहता "अगर महिला मीवा संगे कयलि मंजि लडेमायवेके मीवा सब्बे लडाई आहे दांता इंजो नावा विचार तुन वेहामुंतान. महिला गुल्लय उंदि चप्पा, कोयतोर गुल्लयतोर दूसरा चप्पा मतेके मानव जाति पूरा नाश आंता. मीटु पूरा कानाल बनेमासि इद विषय तुन समझेमायपरवारे आयामिंतीर". अचोने आयो अद नानो ओसो वेने ईले रास्ता "महिलांग नागरिक स्वतंत्रता मैदे योग्यता हासिल कीत्तांग. इगा तिना मावा न्यायपूर्ण अधिकार कुन विरोध कीयनोर किन माटु प्रगति विरोधी, प्रतिक्रांतिकारी इंजि मानेमांतोम. अद्रमे मावा सामाजिक मुक्ति मैदे गिर्दा आयनोर किन माटु प्रगति ओसो क्रांति ता जोकातोर इंजो मानेमांतोम, वोर मीवा दुश्मन आतके वेने". प्रूधों वेहता पोल्लोंग कुन गलत इंजो खंडन कीसोरे जूलियट लांबा (1853-1936) पेदेर ता नानो कस्सुम उंदि सवाल ताल्कता 'महिला किन काम कीयलासि शिक्षा मदद हींता. अद्रम काम कीतकेने महिला किन आजादी दोरकिंता. स्वतंत्रता ते सम्मान मंदना काम ओसो शिक्षा दोरकना मौका मत्तास्के वेश्यावृत्ति बंद आंता. पुरुषलोरा किन इद गिर्दा मंतया? इल्लेया?'. महिला किन छोड़-छुट्टी हीयना अधिकार मंदना इंजो, महिला किन अविना संपत्ती तुन खुद देखरेख कीयना मौका मंदना लेहका विवाह व्यवस्था मंदना इंजो अद मांग कीत्ताद मंता.

पेरिस कम्यून लोपा महिलांग:

जर्मनी संगे युद्ध शुरु आत्ता समय तेने नथाली लेमेल (1827-1921) ओसो लुइस मिशेल (1830-1905) इंदानव

महिला किन संगठित कीयना शुरु कीत्तांग. सब्बे जनता वेने तमवा शहर ता दरवाजा तेने उद्दता दुश्मन संगे लडाई कीसोरे मत्तोर. महिलांग वेने युद्ध क्षेत्र लोपा मंदना कोयतोरा हरिं पोयतोर. ओरा बंदूक किन कांजतांग. तिंदना चीज तुन कांजतांग. एंबुलेन्स किने नर्स लेहका काम कीत्तांग. उचुक दिया ना पेरके सामाजिक ओसो वर्ग अंतर तुन खतम कीसोरे दस महिला पलटन बना कीयना इंदना मांग पोयसि महिलांग आंदोलन कीत्तांग. इविन ताकि कीयलासि आर्थिक रूप ते मदद हीयना इंजो धनिक महिला किन ऑर्गनाइजरतव अपील कीत्ता. हथियार कुन ओसो आत्मरक्षा ता साधन कुन जांच कीत्तोर. अद मौका ते चिपका कीत्ता पोस्टर लोपा दोड़ रास्ता विषय वेहतोर.

"प्रशिया सेना ता असभ्य हिंसाकांड तुन प्रतिरोध कीयना मैदे महिलांग तमवा पूरा शक्ति ओसो चतुरता ता जरूरत तुन समझेमायना. महिलांग मावा तिप्पल ते संगे मंदिंता. माकिन प्रेरणा हींता. हामुर ता मुन्ने वेने विरिंवा लेवा नित्तना उदाहरण बनेमासि तोहिंता. अद हिसाब ते समान नागरिकता ओसो मुक्ति मैदे अव योग्यता हासिल कींता. पाशविक दुराक्रमण तुन प्रतिरोध कीसि आजादी तुन बचा कीत्तोरा लोपा पुरुष लोरे आयवा हजारों संख्या ते महिलांग वेने मिंदे, इद विषय तुन पूरा यूरोप महाद्वीप मेचसोरे ओप्पना लेहका कीमुटू". हजारों संख्या ते महिलांग इद विज्ञप्ति पोरो हस्ताक्षर कीत्तांग. पेरिस तुन प्रशा सेना घेराव कीत्तास्के, महिलांग नर्स लेहका सेवा कीत्तांग ओसो कैंटीन किने काम कीत्तांग. रोटी ओसो तिंदना सामग्री तुन मांग कीसोरे वर्साय एवना भूख यात्रा कीत्तांग. उंदि महीना तुक वीडो घेराव लोपाने मत्ता स्टान बर्ग तुक मदद हीयला काजे हथियार हीयना इंजो राज्य सरकार तुन मांग कीसोरे लुइस मिशेल ना नेतृत्व ते महिलांग उंदि प्रदर्शन कीत्तोर. मति सरकार अद मांग तुन मानेमायो.

शहर तुन बचा कीयना मैदे महिलांग उचुक प्रस्ताव कीत्ता. महिला किन भर्ती कीयना इंजो सरकार तुन मांग कीसोरे प्रदर्शन कीत्ता. प्रदर्शन तुन नेतृत्व कीत्ता लुइस तुन सरकार अरेस्ट कीत्ता.

महिलांग जांच कमेटी किन बना कीत्ता. आखिरी ते जनवरी 29, 1871 दिया पेरिस सेना जर्मनी सेना ता मुन्ने वींगता. शहरकुना लोप्पा मुख्य रूप ते पेरिस शहर लोपा पेरसोरे मत्ता प्रतिरोध, कोयतोरा बराबर सड़क पोरो वायना महिला शक्ति तुन हूडसि थियेर वेरित्तोर. जनता ना कैदे हारेमायवा लेवा मंदना मैदे तमा सेना तुक कम संख्या ते मंदना जर्मनी मुन्ने वींगनादे बेस इंजो थियेर आल्सतोर. जर्मनी सेना पेरिस शहर ते एवतेके शहर लोपा मंदना तोप कुन कब्जा कीतोर इंजो जनता आल्सतोर. तोपकुन जर्मनी तोरा कैदे दाया हीयनायो इंजि जनता गटिंटग निर्णय कीत्तोर. इचवुर महिलांग तोपकुन ओसि मंजी माउंटमार्टी मेट्टा पोरो तास्तोर. नेशनल गार्ड ता उंदि पलटन अविन राका कीत्ता.

17 मार्च ते तोप कुन जप्त कीयला वत्ता थियेर सेना उस्कड़ ते मत्ता शहर तुन अल्को कब्जा कीत्ता. इद विषय तुन मुन्ने महिलांग समझेमात्तांग. अव गुप्त रूप ते इद विषय तुन प्रचार कीत्तांग. माउंटमार्टी मेट्टा पोरो तारस्ता तोप कुन जप्त कीयला दायना सेना तुन वेल्लाय महिलांग विरोध कीत्तांग. महिलांग तोप कुन तमवा मेंदुल संगे मुचता. अव महिलांग ना पोरो फायरिंग कीयना इंजो नेशनल गार्ड कुन थियेर आदेश ईत्तोर. महिलांग सैनिक लोरा संगे चर्चा कीत्ता. 'मीटु मीवा दादा-दीदीलोरा पोरो ओसो पिल्ला पोरो फायरिंग कीतिरा?' इंजो वेहसोरे ओरा गुरम तुक मंदना जीनकुन कट कीत्तांग. अस्के सेना फायरिंग कीवालेवा थियेर किन घेराव कीत्तोर.

कम्यून तुन गठन कीयना लोपा महिलांग कीत्ता कार्रवाई ता नरगे महत्व मंता. अव माउंटमार्टी ते मत्ता तोप किन दुश्मन कैदे अरवा लेवा कीत्तांग. महिलांग ईले केयता 'पेरिस तुन घेराव कीयमुंतोर. मनवा मातृभूमि खतरा ते मिंदे. तोप कुना गर्जन केंजवावोया? हथियार पोयमुट! गरीबी ओसो अज्ञान मनवा पिल्ला-पेकोरा दुश्मन बनेमांता. मनल अदिन हूडसोरे मंदाकाला? मनवा पिल्ला-पेकोर वेर-वेरोना संगे लडेमासोरे, डोलसोरे ओसो हौकसोरे मंदना तुन माटु हूडसोरे मंदाकाला? विदेशतोर किन पूंडाट'. हथियार तुन पोयसि तेज गति ते घायल आत्तोरगा अंजि ओरकिन बचा कीयना ओसो दुश्मन बल तुन हौकना... इदिन हूडसि आश्चर्य आसि बेनोर बेनोर ईले रास्तोर - बाता इव महिलांगे? 19 मार्च ते टाइम्स पत्रकार नरगे द्वेष भाव संगे रास्तोर "उंदि मौका ते पूरा फ्रांस देश लोपा सिर्फ महिलांगे मतके, देश पूरा वेरि पुट्टना लेहका बदलेमासि मंदू!"

महिलांग बार मैदे कम्यून तुन बचा कीयला गिदा आत्ता?

महिलांग बार मैदे तमा जीवा तुन परवा कीवा कम्यून तुन बचा कीयना मैदे कोशिश कीत्तांग? कम्यून एतित्ता इचुन कार्यक्रम किने महिला किन समान अधिकार ईत्ता. अचोने आयवा युद्ध ता कारण ते अर्थ व्यवस्था कमजोर आत्ता कारण ते नरगे महिला किन वेश्यावृत्ती कीवा बाताय दूसरा हरी हिल्ला लेवा आत्ता. अद्रम ता सबे महिला पूना समाज ता स्थापना मैदे तमा जीवा तुन लेक्का कीवा लेवा मुन्ने वत्ता. रूसी ता क्रांतिकारी ओसो इंटरनेशनल ता सदस्या मत्ता येलेना दमित्रियेवा-तोमानोवस्काया पेदेर ता नानो किन मार्क्स इंटरनेशनल तरफ तिंचि प्रतिनिधि लेहका पेरिस तुक लोहसित्तोर. अदू अगा अंजी 1871 ते पेरिस लोपा इंटरनेशनल ता फ्रेंच विभाग ता अनुबंध संस्था हिसाब ते "विमेन्स यूनियन फर द डिफेंस ऑफ पेरिस अंड एड्ड टू द वूंडेड (पेरिस ता राका मैदे ओसो घायल तोर किन मदद कीयना मैदे महिला संगठन)" तुन गठन कीत्ता.

पेरिस कम्यून 72 दियांगे ताकता मति अचोन कम समय लोप्याने अद बेचोन सुधार काम कुन शुरू कीत्ता.

कम्यून तुन राका कीयला मैदे महिलांग हथियारकुना उत्पादन लोपा भाग आत्ता. तीन हजार महिलांग कैंट्रिड्ज उत्पादन लोपा भाग आत्ता. लीसा ग्रे अव उत्पादन कामकुना बारें ते रास्ता "1500 महिलांग बैरिकेडकुना निर्माण मैदे उसका ता बोरांग कुन सिलाई कीयामुंता. अव पाटा पारसोरे वेडका ते अविना काम कीयमुंता. लाल स्कार्फ तुन करता मार्ता पेदेर ता नानो सब्बेतोर किन काम तूसांमंता. दिनाल नुल्ये समय ते अविन पूरा वेतन दोरकिंता. ऑड ऑड बोरा तुक 8 सेंटइम. ताना मुन्ने दलाललोर अविन 2 सेंटइम ईदूर".

अर्थ व्यवस्था तुन सामाजिक रूप ते पुनरनिर्माण कीयना कोशिश शुरू आत्ता. तमा तमा व्यापार तुन विडसि मंजी पेरिस तिंचि मिरतोर कारखानांग कुन सहकारी पद्धति ते संचालित कीसोरे उत्पादन कीयना इंजि दिमित्रीव किन जिम्मेदारी ईत्तोर. इद पुनरनिर्माण ते स्त्री-पुरुषलोरा वेतन नडमा मंदना अंतर तुन टेंडि मंजी समान काम तुक समान वेतन हीयना इंजो, काम ता समय तुन कम कीयना इंजो, पूंजीवादी लूट तिंचि उत्पादन तुन मुक्ति कीसि उत्पादन संबंधकुने आयवा अमानवीय उत्पादन तरीकांग कुन वेने बदली कीयना लक्ष्य तुन पोयतद मंता.

कम्यून लोपा शिक्षा प्रणाली तुन बदली कीसि वेल्लाय सुधारकुन जोडपि मंजी शिक्षा प्रणाली तुन तैयार कीयना लोपा महिलांग मुख्य भूमिका निभा कीत्तद मंता. गिरजाघरकुना प्रभाव हिल्ला लेवा सब्बे पिल्ला-पेकोर किन मुफ्त शिक्षा हीयना मैदे, सामाजिक, वैज्ञानिक शास्त्रकुन ओसो दिनाल ता जिंदगी लोपा उपयोग आयना तकनीक कुन जोडा कीसि शिक्षा हीयना मैदे, मुन्ने सुडला हूडता पिल्ला ना पढाई पोरो विशेष ध्यान हीयना इद्रमता लक्ष्यकुना संगे शिक्षा प्रणाली लोपा सुधारकुन शुरू कीत्तोर. पिल्ला पढेमायना शालांग ना निर्माण काम तुन पर्यवेक्षण कीयना मैदे ऑड विशेष महिला आयोग तुन गठन कीत्ताद मंता. बालिका ना मैदे औद्योगिक प्रशिक्षण केंद्र ता गठन कीत्ताद मंता. मजदूर महिला ना साटि कारखानांग ना हेरे दिन भर काम कीयना शिशु संरक्षण केंद्रकुन गठन कीयना मैदे कोशिशकु शुरू आत्तांग. महिला समानता ओसो मुक्ति काजे पहली कोज्जिंंग लेहका शिक्षा ता विषय लोपा मुख्यम ता निर्णयकु एत्ताद मंता.

अचोने आयो नागरिकलोर किन ओसो ओरा अधिकार कुन बचा कीयना मैदे जीवा हीत्तोर मुत्ते-पिल्ला किन पेंशन ईयना इंजो 10 अप्रैल ते ऑड आदेश वेंडे पारित कीत्तोर. इदिना लोपा ईले रास्तोर "वैध इल्वेके अवैध" अंतर तुन हूडवा लेवा सब्बे तोर किन पेंशन हीयना. इद आदेश संगे साधारण रूप ते उत्पीडित जनता लोपा मंदना स्त्री-पुरुष संबंध कुन मर्मी ता बराबर दर्जा हीत्ता. इदीना कारण ते अस्के एवना धार्मिक रूप ते ओसो पितृसत्ता ता आधिपत्य मंदना मर्मी ता व्यवस्था तुन धक्का दलगता. मति इगा माटु ध्यान हीयना ऑड विषय बाता इतके पेरिस

कम्यून तुन निल्पी कीयना लोपा महिला ना महत्वपूर्ण भूमिका मतके आय महिला किन बोट वाटना हक हीत्तद हिल्ले. इदिन राजनीतिक अपरिपक्वता इंजो समझेमायना. इद्रमता बेचोनो चुकतव मतके वेंडे महिला ना मैदे कम्यून एतित्ता कार्यक्रम ओसो सुधारकु इतिहास लोपा वेल्लाय महत्व मंदना विषयकु आंदू.

आखिरी दियांगः

पेरिस लोपा ताकना गतिविधिकुन ओसो बाकी फ्रांस लोपा ताकना गतिविधिकुन नडमा बाताय संबंध हिल्ला लेवा आत्ता. जर्मन सैनिक युनिटकुना संगे कयलि मंजी थियेर सेना तुन बना कीत्तोर. मुन्ने शहर पोरो बमकु वाटि मंजी पया अदिन घेराव कीत्तोर. कम्यूनार्डलोर (कम्यून ता सदस्यीर) हिम्मत ओसो साहस संगे इद हमला तुन प्रतिरोध कीत्तोर. प्लेस ड्यू पांथियान तगा महिलांग बैरिकेड ता निर्माण कीत्तोर. ब्लैच तगा 120 सदस्य मंदना महिला बटालियन ऐतिहासिक बैरिकेड ता निर्माण कीसि दिनभर प्रतिरोध कीत्ता. बैरिकेड मुटता पेरके बटालियन ता वेल्लाय सदस्य किन हौकतोर. जोसिफिन कोर्टाईस पोरोय ता महिला उत्तर ते बैरिकेड तुन निर्माण कीयला आहान कीत्ता. 1848 ता क्रांति लोपा वेंडे इद महिला सडककुना पोरो नरगे साहस संगे लडेमासि "बैरिकेड राणी" इंजो पेदेर गडस्तद मंता. अद तना सुडला पिल्ला ना संगे लडेमायनोरा मैदे कैट्रिड्जकु लोहता. पया अद महिला अरेस्ट आसि बैरिकेडकुना निर्माणा कीत्ता 'अपराध' मैदे कोर्ट लोपा केस ताकता.

कम्यून मुटता पया महिलांग अविना कोयतोर हारदेने अंजोरे तेज आवाज संगे 'माकिन वेने फायरिंग कीमुट' इंजो वेहसि बंदूकना मुन्ने अंजि जीवा हीत्तद मंता. इदिना मुन्ने शहर पोरो बमकु वाटता कारण ते उचुक बंगलाकु पोत्तता. अद्रमे प्रतिक्रांतिकारीर वेंडे उचुक बंगलाकुन किस वाटि बोडस्तोर. महिलांग खुद इव बंगला कुन बोडसामुंता इंदना झूठा खबर तुन मीडिया प्रचार कीत्ता कारण ते फेले मात्ता. आले आसि महिलांग दिस्तेकेने अविना कपडा ईकसोरे, कलकु वाटसोरे, बंदूक संगे फायरिंग कीसि अविन हत्या कीत्तोर. क्रांति तुन विरोध कीयना इतिहासकारलोर वेने महिलांग किन किस वाटना महिलांग लेहका वर्णन कीत्तोर. कम्यून हारेमत्ता पेरके 1051 श्रमिक महिला किन युद्ध अपराधकुना आरोप वाटि मंजी काउंसिल मुन्ने निल्पि कीत्तद मंता. अद नेक्का हिम्मत संगे नित्तद मंता. अविना लोपा उंदि महिला पोरो इरवुर सैनिक लोर किन हत्या कीत्ता आरोप लगेमत्तास्के अद ओर किन बाताय परवा कीवालेवा ईले वेहता – "ओसो ज्यादा सैनिकलोर किन हौकवांक भगवान नाकिन माफ कीयना. ओर इस्सी तगा नावा इरवुर पिल्ला किन हौकतोर. निइल्ली तगा इरवुर पिल्ला किन हौकतोर ओसो बैरिकेड तगा नावा कोयतोन किन हौकतोर. इंजि नाकिन बाता कीतीर? कीमुटू!". अस्के

अद महिला किन नंगा कीसि बंदूक संगे फायरिंग कीसि हौकताद मंता.

कम्यून तुन गठन कीयना लोपा भागिदारी एतित्ता इंजो लुइस पोरो आरोप वाटतोर. अद आरोप तुन लुइस वेडका संगे ओपसोरे ईले वेहता "इंगो. नन्ना आले कीत्तान. कम्यून तुन गठन कीयना लोपा भाग आत्तद नाकिन गर्व ता विषय आंदू. बारांक इतके कम्यून मैदे समाजवादि क्रांति ता जरूरत मंता. सामाजिक क्रांति इंदनाद नावा गिर्दा ता विषय आंदू. आजादी मैदे गिर्दा आयना हर एक मानय किन उंदि कच्च ता तूटा दोरका मंता इतके, नन्ना नावा बाटा गावले इंजो मांग कीतान. अगर मीर नाकिन विडस्तेके बदला टेंडला काजे उंदि सेकंड ता समय तुन वेने आहे विडसोन".

पेरिस कम्यून बहुत कम समय अस्तित्व ते मत्तके वेंडे महिला मुक्ति ना बारें ते उंदि समझदारी तुन हीत्ता. बेचोनो पूना कार्यक्रमकु आचरण ते वायवा मुन्नेने दुश्मन ना हमला ता कारण ते जनता ना सरकार खतम आत्ता. कम्यून तुन निल्पि कीयना मैदे ताकता लडाई लोपा सैकडों महिला ना जीवा हत्ता. सैकडों महिला किन हौकना सजा हीत्तोर. बेच्चोनो मुल किन जीवा दायना जोम जेल ते मंदना इंजो सजा (आजीवन कारावास) वाटतोर. इचवुर किन प्रवास ते लोहसित्तोर. बहादुराना तरीका ते लडेमात्ता महिलांग ना बारें ते प्रतिक्रांतिकारी पत्रिकांग ओसो इतिहासकारलोर अद महिलांग दादालोरा लेहकाने लडेमात्तांग इंजो रास्तोर. अविन "बंगलांग किन बोडस्ताव" इंजो वेहतोर. पेरिस कम्यून तुन बचा कीयना मैदे आट मेंड लोपाने सुमारे 26 मुल ना जीवा हत्ता. ओरा लोपा नरगे मुल महिलांग वेने मत्ता. 150 सालकुना पेरके वेंडे पेरिस कम्यून ता इतिहास तुन विवरण ते रासना कोशिशकु ताकामंता. कम्यून मैदे लडेमायना महिलांग पूरा यूरोप महाद्वीप अविना बारें ते वडकना इंजो विचार कीत्तद मत्ता. मति तानकिन जीडसी पूरी दुनिया अविना बारें ते प्रशंसा कीसोरे प्रेरणा ता पोल्लोंग वेहसोरे मंता.

(बी.अनुराधा रास्ता इद लेख तुन 'अरुणा तारा' पत्रिका तिचि पोयतद मंता. इद लेख लोपा सुडला बदलावकु कीत्तद मंता.)

★

'लडेमायना महिला' मैदे डिविजनकुने सही समय ते महिला शहीदीरा जीविनिंग, महिला आंदोलन, प्रतिरोध, महिला ना पोरो ताकना सरकारी ओसो पितृसत्ता ता हिंसा अद्रमे सभाग, सम्मेलनकुना रिपोर्टकु जरूर लोहसीयना. इविना संगे फोटोंग जरूर जोडपना. महिला कामरेड्सना गुरिल्ला अनुभवकु, महिला समस्यांग पोरो लेख, कहानींग, कवितांग, पाटांग लोहसीयना. रिपोर्टर्स ओसो लेख हिंदी, गोंडी, तेलुगू – इविना लोपा बेद भाषा ते वेने लोहसीयना. मति कहानींग, कवितांग ओसो पाटांग जरूर हिंदी ते वेने लोहसीयना.

— संपादक मंडल

हाथरस कांड –महिलांग ओसो दलितलोरा पोरो ताकाना मनुवादी हिंसा ता ओसो उंदी घटना!

उत्तर प्रदेश राज्य ता हाथरस जिला, बुलगढी ता उंदी दलित (वाल्मिकी) परिवार ते 19 साल ता पिला ना संगे बेहरा जातिनोर ऊडा परवा लेहका सामूहिक बलात्कार कीत्तोर. इद घटना उंदी बेरा पूरा देश तुन होले कीत्ता.

14 सितंबर, 2020 ते नरकोम 9 बजे घटना ता शिकार आता पिल्ला (मीडिया ता अनुसार ताना पोरोय मनीषा आंदू) तना यायो ना संगे गड्डी कोय्यनीकी वेडा



मनीषा

तके हंजी मत्ता. पिल्ला किन ठाकुर जाति ता नालविर पेकोर हेरे ता काकाजोन्ना ता वेडा ते ओसी बलात्कार कीत्तोर. तम यायो भैरी आंदू ताना काजे तना मियाड ता केयना लेंग केंजो. पक्काय जेल पेरके तना मियाड वायवा हूडसी अद हिके-हके परकता. अस्के अदू ताना मियाड किन मेंदुल ते बाताय कपडा लेवा जोर नेत्तूर पोंगसी बेहोश आत्तादु ऊडता.

अत्याचारीर नेक्के पापम तरीका ते पीड़िता ता वेंजर कोयतोर. गुडंगा ता पेडका तिन उरहतोर. ताना कारण ते अदू मेलिया वेने परवो. यायाल जोर-जोर ते केयसोरे तना मरीन खबर हित्ता. परिवारतोर पीड़िता किन हेरे ता चांदपा पुलिस थाना ओत्तोर. पुलिसतोर, परिवारतोर पोल्लू किन इचुन वेने ध्यान हिवोर. ओसो अगातल पूंडसीत्तोर. पेरके परिवारतोर पीड़िता किन हाथरस ता बलगा अस्पताल ओत्तोर. ताना पेरके अलीगढ ते मंदना अस्पताल ते ओत्तोर. पेरके रेंड वीडियो बाहर पसता. अविन लोप्पा अस्पताल ओयनास्के ओसो स्ट्रेचर पोरो तल मनीषा तना किन अत्याचार कीत्तोर पोरोय वेहतादु मंता. ओरू नालविर अत्याचारीर किन बलात्कार ता शिकार आता पिल्ला चिहनेमात्ता. ओरू तमा लोन हेरे मंदनोर बेहरा जाति ता दबंग पेकोर आंदूर.

इच्योन क्रूर हिसाब ते जरगता घटना किन बलात्कार ता शिकार आत्ता पिल्ला खुद गवाही हित्ता पेरके ओसो ताना मेंदुल ते अत्याचार ता चिहना किन हूडता पेरके वेने तुरंत रिपोर्ट रिकार्ड कीयना मत्ता मति अद्रम कित्ता हिल्ले. 8 दिया ता पेरके 22 सितंबर ते न्यायाधीश ता मुन्ने अद पिल्ला ता स्टेटमेंट रिकार्ड कीत्तोर. अद समय ते वेने अदू बलात्कार कीत्तोर पूरा विवरण वेहता.

मति सबूत किन मिस्सना मैदे पक्काय लेट ते ताना नमूना तुन फॉरेंसिक लैब ते जांच कियला लोहतोर. अद पिल्ला किन बेस ता इलाज एवसी कीयला काजे पुलिस



ओसो जिला मेजिस्ट्रेट कोशिश कित्ता हिल्ले. आखिरी जीवा दायनास्के 28 सितंबर ते तानकु दिल्ली ता सपदरजंग अस्पताल ओत्तोर. दूसरा दिया 29 सितंबर ते ताना जीवा हत्ता. शासन-प्रशासन ओसो पुलिस बोरू वेने अद पिल्ला किन बचे कीयनीकी कोशिश कित्ता हिल्ले. अत्याचारीर किन गिरफ्तार कीसी सजा हीयनीकी कोशिश कित्तादू हिल्ले. इद अपराध किन मिस्सना मैदे बेहरा जातितोर किन बचे कीयना मैदेने ओरू सबे रकम ता कोशिश कीत्तोर. अद पिल्ला डोलता पेरके नडूम नरका ढाई बजे अस्पताल तल 200 किलोमीटर जेक ताना नाटेनगा ओसी पुलिसतोर पेट्रोल दोस्सीसि लाश किन किस वाटसित्तोर. किस वाटनास्के बोनकु वेने हेरे वायला हिवोर. आखिरी ते अद पिल्ला ता यायो-बाबो ओसो परिवार किन वेने अगा वायला हिवोर. ओरू जोर-जोर ते केयसोरे किल्लतेके वेने पुलिस तोर ओरू किन हेरे वाया हिवोर. ओरा रीति-रिवाज ता अनुसार यायो-बाबो ओसो परिवार किन पोहतला वेने हिवोर. इद सबे हूडतेके जिला न्यायधीश, राज्य सरकार ओसो पुलिसतोर बेद वर्ग ओसो बेद जाति किन सेवा



इद नेक्के पापम ता घटना ता खिलाफ ते देश मेंड आंदोलनकु ताकता.

छत्तीसगढ़ राज्य, कोंडागांव जिला, केशकाल विधानसभा ता धनोरा थाना क्षेत्र ते ओडानाटे उंदी लया ना संगे 7 मूल सामूहिक बलात्कार कित्तोर. अत्याचार ता रेंड दिया पेरके अद महिला आत्महत्या कित्ता. बलात्कार ता पेरके अद महिला ना परिवारतोर लगातार पुलिस थाना ते रिपोर्ट कीसी हूडतोर मति पुलिसतोर रिपोर्ट कोट्टोर. ओसो इद घटना ता जांच वेने किबोर. मियाड़ संगे जरगता अत्याचार ओसो ताना आत्महत्या तल नाराज बाबाल वेने 4 अक्टूबर ते आत्महत्या ता कोशिश कित्तोर. परिवारतोर ओनकुन समय ते अस्पताल ओता कारण ते पिस्सतोर. इद घटना ता मुंड महीना पेरके इद घटना तुन कोंडा ते हूडता डोलता पीड़िता ता जोका ता पिल्ला 7 अक्टूबर, 2020 ते पुलिसतोर मुन्ने इद घटना तुन वेहता पेरके पुलिसतोर तेन जांच कीया शुरू कित्तोर. अद महिला ता लाश किन विस्कु तल टेंडतोर. ओसो जांच कीया वेहतोर. महिलांग ना विरोध ते ताकाना इद्रम ता अपराध ते पुलिस बद्रम जिम्मेदारी लेवा कबड़ किता इंदानादू ओसो उंदी बेरा इद घटना तल सामने वाता.

किन्तोर इंदानादु सीधा-सीधा समझेमांता. अदे समय ते उंदी वीडियो मुन्ने वात्ता. ताना लोप्पा हाथरस जिला न्यायाधीश पीड़ित पिल्ला ना परिवारतोर किन "भीड़िया तोर नेंडू मंदार, नाडु दायर. हर हमेशा इगा मंदानोर मनले. अदेन काजे मावा पोल्लू केंजाटू" इंजी वेहतामंतोर वीडियो ते न्यायधीश 25 हजार मुआवजा ता प्रस्ताव ताससोरे मिवा पिल्ला ता हामुर कोरोना संक्रमण ते आतेके बाता कीसी मन्नेरीर इंजी वडकतोर.

दलित पिल्ला ना संगे बलात्कार कीसी, इच्चोन क्रूर रूप ते तिप्पल कीसी तान हौकता दबंग जातितोर 25 लाख रुपया हीसी ताना परिवार किन अस्सना कोशिश कित्तोर. मति अद परिवार इद मुआवजा किन पोयत्तादू हिल्ले.

बुलगांडी नाटे 600 तुक ज्यादा परिवारकु मंता. ताना लोप्पा 15 दलित परिवार लंबा समय तल दबेमासी मंतांग. मायावती सरकार 1990 ते बलात्कार ता शिकार आता पिल्ला ना परिवार किन 2 एकड़ जमीन हित्ता. मति इंजे एवनाल अदू परिवार किन 1.4 एकड़े जमीन दोरकता. पाल वम्मीसी इद परिवार पिस्सोरे मंता. इद नार पोरो कंट्रोल तासाना ठाकुर जातितोरा परिवारकुना दबाव ता शिकार आसी दलित परिवार पिस्सामंतोर. हालांकि दलितलोरा बेरसना चेतना किन हूडसी उच्च जातितोर सहेमासोर हिल्लेर. अदेन मैदे दलितलोरा पोरो अत्याचार कीयामंतोर. अगा ता ब्राह्मणीय हिंदुत्व फासीवादी भाजपा सरकार इद्रम ता दबंगतोर किन पूरा मदद हीसोरे मंता.

इद घटना ताविरोध ते आवाज तेहचोरे घटना तुन जांच कीयना मैदे ओसो पीड़ित परिवार किन धीरा वेहतानीकी नाटे दायना मुल किन नाटे डाका वेने तासा हिवोर. इद्रम जघन्य अपराध कीयना तुन विरोध कीयना जनवादी अधिकार किन वेने फासीवादी सरकारकु दबेकीसोरे मंता. देशमेंड इद निर्मम अत्याचार ता विरोध ते जनता आंदोलन कित्तोर.

उत्तरप्रदेश ता योगी सरकार "राज्य सरकार किन मुट्टी कीयना मैदे इद साजिश पंडतोर" इंजी वेहची संघर्ष कीयना जनता पोरो झूठा आरोप मेत्तसीत्तोर.

उत्तरप्रदेश ते योगी अदित्यनाथ सरकार सत्ता ते वात्ता पेरके मुसलमान, दलित ओसो महिलांग पोरो हमलांग बेरसता. अविस्कुना पोरो अत्याचार ओसो हौकाना घटनांग बेरसता. हाथरस कांड ते अत्याचार ता शिकार आत्ता पिल्ला डोलता पेरके सिर्फ 15 दियांग तेने उत्तरप्रदेश ते दलित लयास्कुना पोरो इद्रम ता मुंड बेहरा घटनांग मुन्ने वाता. 1 अक्टूबर ते बलरामपुर ते उंदी दलित पिल्ला ना संगे बलात्कार कित्तोर. हालत खराब आसी पेरके इद पिल्ला डोलता. 2 अक्टूबर ते भदोही ते 14 साल ता दलित पिल्ला ना संगे अत्याचार कित्ता पेरके तान हौकसित्तोर. 12 अक्टूबर ता नरका गोंडा जिला ता पसका नाटे मुंड दलित पिल्लांग लोतगा गुड़ियसी मत्तास्के अविस्कुना पोरो एसिड दोस्सतोर. इद हमला ते मुंड आसी हेलास्कु गंभीर रूप ते करूवता. इद घटना ता शिकार आता पिल्लांग लोप्पा बेहरा पिल्ला 17 साल ता, तानकु हूडला 12 साल ता ओसो उंदी 8 साल ता सुडला पिल्ला मंता.

ब्राह्मणीय हिंदुत्व फासीवादीर महिलांग, दलित ओसो धार्मिक अल्पसंख्यकलोरा पोरो ताकाना लूट, दबाव ओसो अत्याचार ता जबर्दस्त विरोध कीसोरे संगठित आसी संघर्ष कीयाकाल.

★

देश ते हर 16 मिनट ते उंदी मियाड़ 'बलात्कार' ता शिकार आयामंता

नेशनल क्राइम रिकार्ड ब्यूरो (एनसीआरबी) ता क्राइम इन इंडिया 2019 जारी कित्ता आंकड़ा हूडतेके पूरा देश ते महिला सुरक्षा ता परिस्थिति समझेमांता. ओरा रिपोर्ट हिसाब ते देश ते हर 16 मिनट ते उंदी बलात्कार जरगमंता ओसो हर चार घंटा ते उंदी महिला किन लापता कीसी वम्मामंतोर.

अत्याचार ता घटनांग लोप्पा राजस्थान ओसो केंद्र शासित प्रदेश चंडीगढ़ पहली नंबर ते मंतांग. देश ता राजधानी दिल्ली दूसरा स्थान ते वांता. देश ते हर चार मिनट ते उंदी महिला पोरो आतो-मामा ना लोते मारपीट, गाली-गलौच लेहका ता क्रूरता ताकामंता. हर एक घंटा 13 मिनट ते उंदी महिला किन दहेज तवो इंजी हौकामंतोर. औसतन रेंड-मुंड दिया ते उंदी पिल्ला पोरो एसिड हमला ताकामंता. 2020 साल ते सितंबर एवना महिलांग ना अपराध तल जुड़ेमात्ता 4 लाख पांच हजार तुक ज्यादा केस दर्ज आता.

बलात्कार ता आंकड़ा

- चंडीगढ़ ते हर उंदी लाख महिला आबादी ते 20.7 महिलांग शिकार आंतांग.
- राजस्थान, दिल्ली ओसो केरल ते लाइन पोयसी 15.9, 13.5 ओसो 11.1 महिलांग शिकार आयामंतांग.
- यूपी ते उंदी लाख आबादी लोप्पा 2.8 महिलांग शिकार आयामंतांग.
- असम, झारखंड, छत्तीसगढ़, पंजाब ओसो ओडिशा ते वेने स्थिति हूडतेके बेस हिल्ले.

(‘पत्रिका’ ते वात्ता रिपोर्ट हूडसी रासतोम.)

कंचन ना हामुर –सरकार, न्याय व्यवस्था ओसो जेल प्रशासन कित्ता हत्या आंदू.

6 साल तल अमानवीय जेल पिस्वल पिस्सोरे 38 साल ता आदिवासी कार्यकर्ता कंचन नानावरे गुंडे बीमारी तल तिप्पल आसोरे अदालत ओसो जेल प्रशासन तल इलाज तुकू अनुमति दोरकवा कारण ते 24 जनवरी, 2021 ते पूणे ता सासून अस्पताल ते जीवा पोहता. महाराष्ट्र राज्य, चंद्रपुर जिला ते छात्र संगठन ते काम कीयना कंचन पोर्पो माओवादी मुहर तासी 2014 ते तानकुन अरेस्ट कित्तोर. ताना जीवनसाथी अरुण बेलके किन वेने अस्केने अरेस्ट कित्तोर. ओरू इरवुरा पोर्पो ऊपा कानून लगे कित्तोर. कंचन पोर्पो 9 केस तासतोर. 6 साल ता लोप्पा तानकिन अलग-अलग जेलकुना लोप्पा बंदक बने कित्तोर. 6 साल ता 6 मामला ते अदू निर्दोष साबिता आता. ओसो तीन मामला ते- उंदी गढचिरोली, उंदी पूणे ओसो गोंदिया- ता सुनवाई जारी मंता. मति उंदी मामला ते वेने अदू दोषी इंजी साबित आत्ता हिल्ले. मति अदू 6 साल तल जेल पिस्वल पिस्सोरे मत्ता. कंचन पुटताडल गुंडे बीमारी ता पेशेंट आंदू, उंदी हाटूम मुन्ने दिमाग संबधित इचुन समस्या वासी 16 जनवरी ते दिमाग ता ऑपरेशन कित्तोर. ताना पेरके उंदी हाटूममेंड तेने ताना जीवा हत्ता. कंचन ना बीमारी ता बारे ते आई, ताना इलाज तस्के आई बाताय वेने जानकारी जेल अधिकारीर, सरकारी अधिकारीर ओसो पुलिसतोर कंचन ना परिवारतोर किन, जेल ते मत्ता ताना जीवनसाथी अरुण बेलके किन खबर वेने हिवोरू.

हत्ता रेंड सालकुनल कंचन सेशंस कोर्ट ते ओसो मुंबई हाई कोर्ट ते बचोनो बेरा जमानत याचिका दायर कित्ता. मति हर बेरा कोर्टकु कंचन ना जमानत याचिका किन खारिज कीसीत्ता. दिया-दिया तुक ताना बीमारी जीडानादूर रिपोर्ट ओसो गुंडे प्रतिरोपण कीयना मैदे डॉक्टरकु हित्ता सुझाव वेने कोर्ट मुन्ने तासतोर. ताना बीमारी तुन जांच कीयना ओसो तुरंत इलाज ता जरूरत मंताया... हिल्लेया तेना बारे ते वेहतला कोर्ट उंदी कमेटी बने कित्ता. मति इद समस्या ता तत्काल हल कीयना मैदे कोर्ट कोशिश कित्ता हिल्ले. सरकार ओसो कोर्ट इद्रम कीसी कंचन ना जीवा टेंडतोर.

कंचन उंदी बैंक अधिकारी ना मियाड आंदू. 2004 तल अदू छात्र आंदोलन ते शामिल आयना शुरु कित्ता. अस्के ता दिया ते अदू देशभक्ति युवा मंच पोर्पोय ता छात्र संगठन ते सैकडों छात्रलोरा संगे कलियसी काम कित्ता. देशभक्ति युवा मंच पोर्पो वेने माओवादी संस्था ता मुहर लगा कीसी कंचन ओसो कंचन ना जीवनसाथी अरुण बेलके किन पहली बेरा 2004 ते गिरफ्तार कित्तोर. अद समय ते ऊपा कानून ता तहत ओरू इरवुरा पोर्पो केस तासतोर. सात महीना ता जेल पिस्वल ता पेरके ओरू जेल तिंची बाहर पेशतोर.

कंचन ता जोका तादू अनुराधा सोनुले किन कबीर

कला मंच ता कार्यकर्ता इंजी 2011 ते अरेस्ट कित्तोर. 2014 ते अदू रिहा आता. अदू कंचन ता सुरता कीसोरे वेहता “मादू कलियसी बचोनो आंदोलन ते शामिल आतोम. किसान, आदिवासी, ओसो दलित समस्यांग किन पोयसी आवाज तेहतोम. बीमारी मत्तेके वेने कंचन हमेशा सक्रिय हिसाब ते शामिल आंदू” कंचन अस्पताल ते मत्तास्के अनुराधा सोनुले तानकुन हूडा हंजी मत्ता मति, तानकिन कलियना अनुमति हित्तादू हिल्ले.

कंचन ता ऑपरेशन आता पेरके डॉक्टरलोरू वेहतोरू, ताना तला नोयामंता ओसो ताना दिमाग ते नेत्तुर गड्डा आसोरे मंता. अस्के पूणे ता उंदी महिला वकील किन कंचन किन हूडनीकी अनुमति हित्तोर. अरुण बेलके किन वेने कंचन किन हूडला अनुमति हित्तोर मति जेल-प्रशासन ताना काजे जल्दी इंतजाम कित्तादू हिल्ले. अद्रम आसी जीवनसाथी किन कलियना मुन्नेये कंचन ता जीवा हत्ता.

कोविड-19 महामारी ता कारण ते मार्च 2019 ते सुप्रीमकोर्ट जमानत ते बंदीर किन रिहा कीयना इंजी सुझाव हीसी मत्ता मति, महाराष्ट्र सरकार इचुर मुल किन रिहा कित्ता. ओसो उल्टा पूना कैदीर किन जेल ते वाटाना शुरु कित्ता. गंभीर आर्थिक अपराध ते शामिल मानय किन ओसो विशेष कानूनकु ता तहत अरेस्ट आतोर किन रिहा कीयना आयो इंजी महाराष्ट्र सरकार निर्णय एत्ता. विशेष कानूनकुना लिस्ट ते ऊपा वेने शामिल मंता. अदेन काजे कंचन किन रिहा कित्तादू हिल्ले. ताना जीवा दायना अचोन गंभीर बीमारी ओसो खतरा ता हालत किन हूडसी वेने सरकार ध्यान हित्तादू हिल्ले.

सितंबर 2020 ते ताना बीमारी ओसो बेरसता. तानकिन नडमा-नडमा सासून अस्पताल ओयाना ओसो इचुन दिया पेरके ओसो जेल ते तत्ताना इद्रम लगातार जारी मत्ता. आखिरी ते 16 जुलाई ते तानकिन ओसो अस्पताल ओत्तोर. मुंबई हाईकोर्ट ता आदेश ता अनुसार ताना इलाज तुन जांच कीयना मैदे उंदी कमेटी पंडतादू मंता. अदे समय ते ताना दोरबा ता समस्या शुरु आता. ओसो मेंदुल ता कई भाग काम कीयना बंद आता. वर्रोर निजी डॉक्टर वेहतोर बातल इतेके तानाकिन दूसरा गुंडे वाटवालेवा पिस्सी कीयना बदे मौका हिल्ले. मति अस्के एवनाल पक्काय लेट आता अद्रमआसी ताना जीवा हत्ता.

झूठा केस वाटना, वेल्लयसाल आता पेरके वेने सुनवाई मारवालेवा मंदना, इचुन मामला ते तानकिन निर्दोषी इंजी साबित आत्ता पेरके वेने रिहा कीयवा मंदना, जमानत वेने हियवा मंदना, जीवा दायना लेहका ता बीमारींग मत्तेके वेने बेस ता इलाज हियवा मंदना न्यायिक हिरासत ते मंदना बंदीर कुना जीवा तुन लापरवाही हिसाब ते हूडना.....इद्रम सरकार बचोनो अपराध कित्ता. जनता ना पक्ष ते लडेमायनोर पोर्पो सरकारकु, अदालतकु ओसो जेलकु केत्ता परवा

कवासी पांडे किन झूठा आत्मसमर्पण तोहची हौकतोर



छत्तीसगढ़ ते लंबा समय तल पुलिस झूठा आत्मसमर्पण अभियान ताकी कीयामंता. मामूली पिस्वल पिस्सना जनता किन वेने रैडपी कीसी लेवेके लालच तोहची आत्मसमर्पण इंजी तोहतामंतोर. प्रमोशन ओसो रिवाडकुना लालच ता मारे पुलिस अधिकारी इद्रम ता कार्यक्रम ताकी कीयामंतोर. होन्ने तल लोन वर्राटू पोरोय ते कार्यक्रम ताका मंता. लोन वर्राटू अभियान तल बेस ता प्रतिक्रिया वायामंता इंजी पुलिसतोर पुकार पुट्टी कीयामंतोर. ओसो तेना लोप्पो इंजे एवनाल 300 माओवादी आत्मसमर्पण कित्तोर इंजी वेने वेहतामंतोर. इद कार्यक्रम बचोन ढोंग ता विषय आंदू इंदानादू कवासी पांडे ना हामुर तल ओसो उंदी बेरा समझेमायमंता. कवासी पांडे दंतेवाड़ा जिला ता गुडसा नाटेनादु आंदू. 19 फरवरी, 2021 ते ताना आत्मसमर्पण ता खबर मीडिया ते वासीमत्ता. पेरके अदू पुलिसतोर कस्टडी तेने मत्ता. मति 23 फरवरी मुल्ये बाथरूम ते पांडे आत्महत्या कित्ता इंजी पुलिस तोर खबर फैला कित्तोर. अस्सल इतेके 23 फरवरी पियल पांडे ना परिवारतोर तानकिन कलियला दंतेवाड़ा पुलिस लाइन हत्तोर. मति पुलिसतोर ओरकुन पांडेकिन कलियला हिवोर. पियल तले कलियना हरी हूडना पांडे ना परिवारतोर किन मुल्येडकु पुलिसतोर पांडे आत्महत्या कित्ता इंजी वेहतोर.

पांडे ना परिवारतोर इद आत्महत्या आयो, पुलिसतोर हौकतोर इंजी वेहतोर. ओसो ताना मियाड़ माओवादी आयो, पुलिसतोर तानकिन जबर्दस्ती पोयसी ओसी आत्मसमर्पण तोहतोर इंजी वेने वेहतोर. पांडे ना संगे-संगे अद दिया छह मुल कुना आत्मसमर्पण तुन तोहत्तोर. ताना लोप्पा उंदी

पिल्ला ना पेदिदर जोगी आंदू अदू पांडे ना जोका ता पिल्ला. अद वेने 18 फरवरी तल पुलिस कस्टडी ते मत्ता. अदू पूरा कौंडा ते हूडतादू वेहता बातल इतेके अव रेंडिन पोयसी पुलिसतोर. तान किन मर्रा ते दोहतोर. अदू खुद पुलिस कस्टडी ते मंजी इद गंभीर आरोप कित्ता. छत्तीसगढ़ ता आंदोलन इलाकांग ता महिलांग ना पोरो पुलिस अत्याचार रोमवालेवा ताकामंता इंदनादु पुत्तदे. आत्मसमर्पण कित्ता महिलांग ना संगे पुलिस अत्याचार ताकामंता. ओसो अविस्कुन जबर्दस्ती मर्री कीयामंतोर. इद्रमे पांडे ना संगे वेने अत्याचार कीसी तमा अपराध किन मिस्सना काजे पुलिसतोर तानकिन हौकसित्तोर.

माटू तेन आत्महत्या इंजी मानेमात्तेकाई पुलिस अधिकारी वेहतादू बातल इतेके नक्सलवादीरा चुच्चय ता विचारधारा तल पिस्कट आसी पांडे तना विचार ते आत्मसमर्पण कित्ता इंजी. मति सिर्फ पांच दियांग लोप्पा पुलिसलाइन ते अद बारंकु आत्महत्या कीत्ता? पुलिस कस्टडी ते पुलिस प्रताड़ना आयवा ओसो बाता कारण आसी मंदार?

सामाजिक कार्यकर्तालोरु क्राइम सीन ते छेड़खानी ता बचोनो आरोप लगे कित्तोर. इद सबे केंजतेके पुलिस तना अपराध किन मिस्सना काजे जी-तोड़ कोशिश कीयामंता इंजी साफ रूप ते समझेमासोरे मंता. एसपी इद हत्या ता जिम्मेदार आंदू इंजी परिवारतोर वेहतोर. ओसो इद पूरा मामला किन उच्च स्तरीय जांच ओसो मेडिकल रिपोर्ट तोहाना इंजी मांग कीसोरे परिवारतोर लाश किन ओयोम इंजी मानेमायवा मत्तोर.

दंतेवाड़ा कलेक्टर मजिस्ट्रियल जांच ता आदेश हित्ता ओसो जांच टीम बने कित्ता पेरकेने, 48 घंटांग तल मरच्युरी ते तासता पांडे ना लाश किन परिवारतोर तमा नाटे ओत्तोर. पांडे ना हामुर आत्मसमर्पण मैदे आलसना महिलांग मैदे उंदी बेहरा सबक आंदू अदेन काजे आत्मसमर्पण कीसी पिस्सना तुक आई आत्मसम्मान ता संगे हायानादे बेस इंजी आलसना. ★

अमानवीय ओसो क्रूर हिसाब ते व्यवहार कीयामंता. कंचन ना पिस्वल ओसो पक्काय तिप्पल ते जीवा दायनातगडल माटू ओसो उंदी बेरा इद पोल्लू समझेमायना बातल इतेके जेल बंदीरा पोरो शासन-प्रशासन ता इद तानाशाही व्यवहार ता विरोध ते उंदी व्यापक ओसो जुझारू जनसंघर्ष ओसो न्यायिक संघर्ष ता जरूरत मंताविन कंचन ता हामुर ओसो उंदी बेरा समाज ता मुन्ने तत्ता. क्रांतिकारी, जनवादी ओसो प्रगतिशील जनसंगठनकु ओसो मानवाधिकार संगठनकु, प्रगतिशील बुद्धिजीवीर ओसो अधिवक्तालोरु जेलबंदीर कुना अधिकार मैदे ओरु व्यापक ओसो जुझारू आंदोलन निल्पी कीयना. प्रगतिशील पत्रकारीर जेलबंदीर सामना कीयना अमानवीय हालत ओसो सरकार, न्याय व्यवस्था

ओसो जेल प्रशासन ता तानाशाही व्यवहार ना बारे ते ओरु तमा प्रचार साधन संगे पर्दाफास कीयना. इगा मनकिन राजयंत्र ता क्रूरता ओसो निरंकुशताये आयो ओसो उंदी विषय समझेमांता. उत्पीडित जनता ना मैदे कंचन बचोन जिद्द पोयसी ईमानदारी ते काम कित्तयो समझेमांता. दुश्मन ता गढ़ ते मंजी वेने अदू बेचुन साहस संगे काम कित्तयो समझेमांता. हामुर तुन विंगवालेवा मंदाना ताना स्वभाव समझेमांता. ताना पिस्वल आधाये मत्ता मति बेसता पिस्वल पिस्ता. जनवादी, प्रगतिशील, क्रांतिकारी ताकतकुना ओसो जेलबंदीरा मैदे अदू उंदी शानदार मिसाल पेश कित्ता. ★

‘शाहीन बाग’ महिला आंदोलन ता इतिहास लोप्पा उंदी नेल्लता नमूना लेहकाटदु!

सीएए, एनआरसी, एनपीए ता विरोध ते दिसंबर 2019 तिंची मार्च 2020 एवनल देश मेंड ते जोरदार ताकता आंदोलनकु लोप्पा महिलाऊ, छात्राऊ ना नेल्लता भागीदारी मत्ता. मुख्य रूप ते दिल्ली लोप्पा शाहीन बाग ते महिलाऊ ना नेतृत्व ते ताकता आंदोलन उंदी नेल्लता नमूना लेक्का बनेमात्ता. इद भगवा आतंकवादिलोर कुन उसकड लेवा कीत्ता. ‘नया भारत’ पेदिदर ते ब्राह्मणीय हिंदुत्व फासीवादी भारत देश तुन निर्माण कीयना मैदे कोशिश कीसोरे मंदना मोदी ता शासन लोप्पा इव मुंड कानूनकुना खतरा इंजेके वेंडे मंता. अदेनकु इंजेके वेंडे पुरुष लोरा अट्टा ते अट्टा मिलाकीसी महिलाऊ कुन लड्मायना जरूरत मंता.

अल्पसंख्यक, दलित, आदिवासी समुदाय लोप्पा मंदन कष्टम कीसी बतक नोर किने नागरिकता तुन साबित कीयना इद प्रक्रिया ते नरगे तिप्पल मंता. महिलाऊ किन इतेके इंका केत्ता परवोच्चुन तिप्पल मंता. असम ते 19 लाख मुल ना पेदिदर एनआसी लिस्ट ते हिल्ले. दान लोप्पा 70 प्रतिशत माहिलाऊवे मंता. महिला नगा बेव्हे कागज मन्नो आंता. मतेके वेंडे अव बराबर मन्नो आंता. उल्टापुल्टा मंता. आले बार मंता इतेके पेंडुल अत्ता पेरके महिला ना पेदिदर बदलेमांता. अदेनकु उंदी कागज लोप्पा उंदी पेदिदर मतेके इंका उंदी कागज लोप्पा दूसरा पेदिदर मंता. पिल्ला कुन स्कूल लोहोर आंतोर. अविस्कून विरासत ते संपत्ति दोरको आंता. पेंडुल ता पेरके दूसरा नार/शहर दांता. अदेनकु अविस्कूनगा बेवे कागज मन्नो आंता. अदेनके महिलाऊ कुन नागरिकता साबित कीयना इतेके इंका नरगे तिप्पल आंता. इद कारण तेने इव कानून कुना विरोध ते ताकना आंदोलन लोप्पा महिलाऊ ना भागीदारी नेक्के नेल्ला मत्ता.

भारत देश ता प्रथम स्वतंत्रता संग्राम (आजादी मैदे ताकता पहली लडाई) ते महिलाऊ ना जोरदार भागीदारी मत्ता इंदनादु गुल्लय तोर पुत्तदे. अंग्रेजी साम्राज्यवादीर कुना खिलाफ ते ताकता इद लडाई ते गिनती लेवा अच्चुन मुसलमान महिलाऊ नेल्लता भूमिका तुन निभा कीसी मत्ता. अवध महारानी बेगम हजरत महल किन झान्सी राज्य ता रानी लक्ष्मी बाई ना बराबर स्तर तदु इंजी वेहितोर. हजरत महल ना बारेम ते उंदी अंग्रेज अधिकारी “बेगम हजरत मावा संगे अधोषित युद्ध तुन ताकि कीयमुंता. इव रानी, बेगम कुना नेक्के नेल्लता, मजबूत ता इतिहास ऊडतेके लोन लोप्पा, परदा ना पेरके मंजि वेंडे इव महिलाऊ बेच्चुन मजबूत बनेमांतयो माकुन समझेमात्ता” इंजी रास्तोर.

आलकेने लोत्ता नालुंग नेट्टा लोप्पा मंदना महिलाऊ, बुरका लोप्पा मिंजी मंदना महिलाऊ वेंडे बेच्चुन हिम्मत कीया परदितायो मोदी-शाह लेक्कटा मनु ना मरु कुन शाहीन बाग आंदोलन समझा कीत्ता बाहे. मनुवादीर महिलाऊ कुना अस्तित्व तुने चिहनेमायोर. अविस्कून माने ना गुलाम लेक्का ऊडितोर. अविन गोड्डुकु लेक्का दोहची मंदना इंजी

वेहितोर. ओरू बेव महिलाऊ कुन आले ऊडितोर अव महिलावे नेंडु तम्मा लोहकु तिंची बाहर पेसी मंजी तम्मा अस्तित्व तुने आयो देश ता अस्तित्व तुन बचा कीयना जिम्मेदारी तुन तम्मा अट्टा पोरो कांजता. सीएए किन तत्ताना समय ते मोदी-शाह लेक्कटा हिंदुत्व फासीवादीर इद बार महिलाऊ अद वेंडे



मुसलमान महिलाऊ तिंची सबसे बिडिया प्रतिरोध वांता इंजी इच्चुन वेंडे आलसोर बाहे. हिंदुत्व फासीवादीर तीन तलाक ता खिलाफ कानून तच्ची अपुनकु अपने मुसलमान महिलाऊ कुन बचा कीयनोर इंजी प्रचार कीत्तोर. मति इंजे मुसलमान महिलाऊ ओरा षडयंत्र तुन समझेमासी दान परदाफाश कीयानादु ऊडिसी हिंदुत्व फासीवादीर उक्काबक्का आसी मंदनोर.

दिल्ली लोप्पा मंदना जामिया मिलिया इस्लामिया विश्वविद्यालय ना गर्रे शाहीन बाग मंता. सीएए ता खिलाफ ते आंदोलन कित्ता जामिया मिलिया इस्लामिया विश्वविद्यालय छात्रा लोर पोरो सन 2019 ते दिसंबर 13 तारीख तिंचि 15 तारीख एवनल पुलिस तोर नरगे दमन ताकी कीत्तोर. अद दमन तुन शाहीन बाग ते मंदना महिलाऊ तमा कोंडा ते ऊडता. भेदभाव तुन बेरसी कीयना लेक्काटा इव षडयंत्रपूर्वक कानून कुन रोकी कीयवोके तम्मा, तम्मा पिल्ला-पेकोरा भविता खतरा ते अरदिता इंजी अव महिलाऊ कुन समझेमात्ता. इद समझदारी संगे सिर्फ 15 स्थानीय डोकरी मुत्तेस्कु 14 दिसंबर तिंची शाहीनबाग ते विरोध प्रदर्शन शुरु कित्ता. पेरके इव महिलाऊ कुन पूरा देश जीवा कीसी शाहीन बाग दादी (बापी) इंजी करंगता. इद प्रदर्शन लोप्पा रोजे-रोजे महिलाऊ ना संख्या बेरसत्ता. हर दिया अगगे हजारों मुल जमा आयनोर. शनिवार, ऐतवार ते एक लाख जनता वेंडे अगगे शामिल आयनोर. मुन्ने इद आंदोलन तुन मुसलमान डोकरिस्कु शुरु कित्तेके आई पय्या-पय्या दीन लोप्पा हिंदू, सिख, ईसाई, इंका दूसरा-दूसरा धर्म ता डोकरी-मुयत्तोर, नडीर उमर तोर, लेय्या-लेय्योर, नूनी-पापलोर सब्बे तोर शामिल आत्तोर. दिल्ली ता वाडकी कीयना लेहकाटा इरंगम ते, मुसुर ते तिप्पल आसोरे आंदोलनकारीर तमा आंदोलन तुन जारी कीत्तोर. बेच्चुनो महिलाऊ पिल्ला कुन एत्तिसी इद आंदोलत ते शामिल अत्ता. नारा, पाटा, डाका, कविता, नाटक प्रदर्शन संगे आंदोलन ता जगह ते हमेशा

उंदी जोशीला माहौल मंदु. आंदोलनकारीर अग्गे 'फातीमा शेक, सावित्री बाई फूले ग्रंथालय' किन ताकी कीयनोर. अग्गे समष्टि हिसाब ते उंदी भोजनशाला ताकी कीयनोर. दीन मैदे पंजाब तिंची सिख किसान लोर रोजे रेंडु बेरा नरगे ट्रक संगे डोडा तत्तानोर.

इद आंदोलन तुन रोकी कीयना मैदे सरकारकु, भगवा आतंकवादिलोर बेचुनो कोशिश कीत्तोर. पाकिस्तान तोरा फायदा मैदे कीयमुंतोर इंजी दुष्प्रचार कीत्तोर. पुलिस तोर शाहीन बाग ता गर्रे-गर्रे मंदना सब्बे रोडकु बंद कीत्तोर. आले कीतके ट्रैफिक जाम आसी आंदोलन पोरो जनता किन हूंग बेरसिंता इंजी पुलिस तोर आलसतोर.

इद आंदोलन कारण ते जनता परेशान आयमुंतोर, दाया वायाना तिप्पल आयमुंता इंजी वेहचोरे उंदी वकील सुप्रीम कोर्ट ते जनहित याचिका दायर कीत्तोर. दान किन जवाब हीसोरे सुप्रीम कोर्ट मीकिन प्रदर्शन कीयना अधिकार मंता मति रास्ता बंद कीयनादायो इंजी वेहत्ता. ईले वेहसोरे प्रदर्शनकारीर संगे मध्यस्थता मैदे मुव्वुर संगे उंदी कमेटी गठन कीत्ता.

इद कमेटी शाहीनबाग अत्तस्के प्रदर्शन कीयनोर सब्बेतोर उंदिये माटा ते सीएए, एनआरसी, एनपीआर किन रद्द कीतकेने तमा आंदोलन तुन रोमी कीतोम इंजी गट्टिंग वेहत्तोर. अस्के उंदी पत्रकार 'मीकिन गिरफ्तार कीतोम इंजी मीटु वेरियविरा?' इंजी तालकतोर. दान किन जवाब हीसोरे उंदी डोकरी कवसोरे 'मम्मा गिरफ्तार तुक तैयारे मंतोम. मति माकिन तासनोक इद देश लोप्पा मंदना जेलकु आलिंताया इंदनादु मीटु आलसट' इंजी वेहत्ता.

इद कमेटी ता उंदी सदस्य प्रदर्शन स्थल तुन बदली कीयना मैदे, आंदोलन तुन जाम रोमि कीयना मैदे वेहत्तोर. अस्के आंदोलनकारीर 'मावा पोरो गोली चला कीतेके वेंडे माटु उंदी इंच वेंडे अब्बर अन्नोम' इंजी गट्टिंग वेहत्तोर. 'माटु अंग्रेज तोर किन देश तिंची पूंडनस्के नरेंद्र मोदी, अमित शाह लेहकाटोर बेगा मत्तोर? मीटु इव कानून कुन रद्द कीमुट, माटु इगाटल लेंगितोम' इंजी उंदी डोकरी वेहत्ता.

इंका उंदी महिला कन्नीर पेसकीसोरे 'माटु संविधान किन बचा कीयना, दाना मुताबिक व्यवहार कीयना इंजी मांग कीयमंतोम. दान मैदेने माटु लडेमायमुंतोम. नरका बारह बजे ते वेंडे इगा उदिदसी इरंगम ते वाडकामुंतोम. मावा नूनी-पापालोर किन वेंडे संगे तच्चि ओरकुन वेंडे तिप्पल कीयमुंतोम. संविधान ता मुताबिक सरकार ताकना इंजी मांग कीसोरे माटे तिप्पल आयमुंतोम. माटु बेददे सडक तुन बंद कीत्तदु हिल्ले. दाया वायाना तुन रोमिकीत्तदु हिल्ले. केंद्र सरकारे देश ता आजादी तुक खतरा लेहका बनेमात्ता' इंजी वडकता.

इद प्रदर्शन कीयनोरा संगे बेचुनो बेरा वडकता पेरके इद कमेटी सुप्रीम कोर्ट ते उंदी हलफनामा दायर कीत्ता. दान लोप्पा 'इद प्रदर्शन शांतिपूर्ण तरीका ता ताकामुंता,

पुलिस तोर आहे सडक बंद कीसी जनता किन परेशान कीयमुंतोर. उंदी निराशाजनक माहौल लोप्पा जनता तमा विरोध तुन प्रकट कीयमुंतोर. आसपास ता जनता किन, दुकानदार लोर किन इद प्रदर्शन पोरो आपत्ति हिल्ले. ओरू सब्बे तोर तमा सहानुभूति प्रकट कीत्तोर' इंजी वेहत्तादु मंता.

सरकार, संघ परिवार तोरा दुष्प्रचार, दबाव तुन सामना कीसोरे इद आंदोलन ताकसोर मत्ता. आंदोलनकारीर किन वेरपिकीयना मैदे भगवा आतंकवादीर टूटा वेंडे फायरिंग कीसि मत्तोर. इच्चुन तिप्पल कीत्तेके वेंडे महिलाऊ हिम्मत संगे नित्ताऊ. महिलाऊ कुना इद धीरा ता कारण ते टाइम मैगजैन चुना कीत्ता सौ प्रभावशाली महिलाऊ लोप्पा शाहीन बाग दादी वेंडे मंता.

हक अधिकार मैदे ताकना लडाई तुक शाहीन बाग उंदी नेल्लता नमूना लेहका बनेमात्ताकु इद नमूना तुन पूरा देश ता जनता पोयत्तोर. पूरा देश लोप्पा हजारों संख्या ते शाहीन बाग लेहकाटा आंदोलनकु ताकता. महिलाऊ ना नेतृत्व तेने इव सब्बे आंदोलनकु ताकता. दिल्ली ता जाफरबाद लेहकाटा बेचुनो जगह ते ई लेहकाटा आंदोलनकु ताकता. छत्तीसगढ ते बिलासपुर, रायपुर, दुर्ग, राजनांदगांव शहरकु लोप्पा वेंडे शाहीन बाग लेहकाटा आंदोलनकु ताकता. इव आंदोलनकु लोप्पा शामिल अत्ता मुसलमान महिलाऊ, पुरुष लोरा संगे-संगे बेचुनो धर्मनिरपेक्ष, देशभक्त, प्रगतिशील, जनवादी, वामपंथी माने वेंडे शामिल अत्तोर. बेचुनो मुल समर्थन वेंडे हीत्तोर.

सब्बे जगह ते प्रदर्शनकारीर दमन तुन सामना कीत्तोर. वेरि पुट्टि कीसी शाहीन बाग आंदोलन तुन, दान संगे-संगे ने महिलाऊ ना नेतृत्व ते दिल्ली ते बेचुनो जगह ते ताकना आंदोलनकुन रोमि कीयना लक्ष्य संगे, आलकेने देश भर ते ताकना आंदोलनकुन चेतावनी हीयना लक्ष्य संगे 24 फरवरी, 2020 तिंचि उत्तर-पूर्वी दिल्ली लोप्पा भगवा आतंकवादीर मुसलमान लोर पोरो हमलाऊ शुरु कीत्तोर. तीन दिन एवनल ताकता इव हमलाऊ लोप्पा 40 तुक ज्यादा मुल कुन हौवकसीत्तोर. 200 तुक ज्यादा मुल किन घायल कीत्तोर. जनता ना लोहकुन, करोडों संपत्ति तुन ध्वस्त कीत्तोर. हजारों जनता तम्मा जीवा बचा कीयना मैदे लोन-दुव्वाड विडिची मिरतोर.

इव हमलाऊ कुन हूडिसी एस. मुरलीधर इंदना न्यायाधीश सरकार, पुलिस तोर पोरो आलोचना तासतोर. मति सरकार किन इद सहेमायो. वोन किन बदली कीत्ता. ईले सरकार ता असहिष्णुता समझेमायमुंता.

इद हमलाऊ ना पथ्या शाहीन बाग ते प्रदर्शनकारीरा संख्या इच्चुन कम अतके वेंडे आंदोलन इतेके लॉकडाउन एवनल ताकता. ईले शाहीनबाग आंदोलन देश-दुनिया लोप्पा नेल्लता पेदिदर गडसता. महिलाऊ ना संघर्षरत इतिहास लोप्पा उंदी नेक्के नेल्लता नमूना लेहका नित्तिसी मंता.

★

शुभ्रांशू ! निम्मे महिला कामरेड्स ना महीनेवारी ता कटला ता बारंते वाडकामुंतिन मति इगा सरकारकु महिला कामरेड्स ना नेत्तुर ता कुएरकु पोंगी कीयामंतांग!

जीवा ता जनता!

'शांति यात्रा', 'साइकिल शांति यात्रा', डाइलाग-1, डाइलाग-2, पर्यावास अधिकार लेहका ता बचोनो पोरोय ते जनविरोधी ओसो क्रांतिकारी आंदोलन विरोधी कार्यक्रम कीसोरे जनता किन हरीं लेसी कीयना कोशिश कीयनोर शुभ्रांशु चौधरी इंजे 'पूना शांति प्रक्रिया' ता पोरोय ते महिला माओवादीर किन सैनिकरी पैड ओसो माहवारी कप (महीनेवारी समय ते कपड़ा लेहका इस्तेमाल कीयनाव) हीयना पोल्लू वेहतामंतोर. कार्पोरेट घरानातोर वेहताप, शुभ्रांशु चौधरी संगे अमल ते तत्ताना मैदे तैयार कित्ता इद साजिश किन मावा पार्टी गटिंग विरोध कीयामंता. ओसो इद्रम ता चीजकुन मावगा तत्ताना आयो इंजी शुभ्रांशु चौधरी ओसो ओना हरीं ते ताकानोर किन आदेश हीयामंता. तेना विरोध कीयना, शुभ्रांशु चौधरी ना जनविरोधी चेहरा तुन पर्दाफास कीयना इंजी जनवादी ओसो प्रगतिशील ताकतकुन अपील कीयामंतोम.

हत्ता कालम ते शुभ्रांशु चौधरी 'शांति यात्रा' ओसो 'साइकिल शांति यात्रा' ताकी कित्तोर. अस्सल नेंडू बस्तर ओसो पूरा दंडकारण्य ते केंद्र ओसो राज्य सरकारकु शांति लेवा कीयामंतोर. इद निट्टम पोल्लू किन मिस्सना लक्ष्य ते इव कार्यक्रमकु कीसोरे शुभ्रांशु चौधरी माकुन अशांति किन पुट्टी कीयानोर इंजी बदनाम कीयनोंकु कोशिश कीयामंतोर. ताना पेरके ओरू माड जनता किन 'पर्यावास अधिकार' हीयना पाटा ओत्तोर. अस्सल हूडतेके इद 'पर्यावास अधिकार' ता पोरोय ते इचुक मुल किन इचुन जमीन ता गोंदा हीसी माड पोरो माडिया आदिवासीरा संपूर्ण अधिकार तुन पिडंगना साजिश आंदू.

दंडकारण्य नेली ते दबेमासी मंदना प्राकृतिक संसाधन कुन लूटी कीयना मैदे नेंडू कई देशी-विदेशी कार्पोरेट घरानांग कोशिश कीयामंतांग. ओरा कोशिश बारंक फेल आयामंता इतेके इगा 40 साल तल ताकाना क्रांतिकारी आंदोलन तल इद नेली ते जन राजसत्ता - क्रांतिकारी जनताना सरकारकु निर्माण आत्ता. क्रांतिकारी जनता तना राजसत्ता कुन कैड तल पोहानादयो इंजो आलसमंता. अदेनकु कार्पोरेट घरानातोर कोशिश किन प्रतिरोध कीयामंता. खदानकु, बांध परियोजनांग ओसो पुलिस कैपकुना विरोध ते जुझारू संघर्ष ताकी कीयामंता.

इव संघर्ष किन दबेकीयना मैदे केंद्र ओसो राज्य सरकारकु लंबा समय तल बहुमुखी हमलांग कीयामंता. इंजे 'समाधान' पोरोय ते जनता ओसो क्रांतिकारी आंदोलन पोरो केत्तापरवा अचोन उरगड़ ते हमलांग ताकी कीयामंता.

बहुमुखी हमलांग लोप्पा उंदी मुकम प्रत्यक्ष रूप ते हमला किता. उंदी मुकम परोक्ष रूप ते हमला कीता. उंदी भौतिक रूप ते कित्तेके उंदी मनोवैज्ञानिक रूप ते कीता. इव हमलांग- षडयंत्र हिसाब ते, रक-रकम ता योजनांग संगे, सुधार कार्यक्रम, सिविक एक्शन प्रोग्रामकु, दुष्प्रचारकु, तथाकथित बुद्धिजीवीरकुना लेखन ता संगे किन्तोर. देशी-विदेशी कार्पोरेट संस्थांग ता बेसता सेवक ओसो ढोंग पत्रकार शुभ्रांशु चौधरी वेने 'शांति' पोरोय ते जनता किन जाडपना ओरकुन क्रांतिकारी हरीं तल लेसी कीयना साजिश ता संगे इद्रम कोशिश कीयामंतोर. ओरा इद्रम ता कोशिश कुन मावा पार्टी मुन्ने तल विरोध कीयामंता. ओसो ओरू ताकी कीयना कार्यक्रम किन बहिष्कार कीयना मैदे जनता किन अपील कीयामंता. इव कित्तेके वेने शुभ्रांशु चौधरी ताना जनविरोधी डाका किन रोमी कित्ता हिल्ले. इंजे मावा महिला कार्यकर्ताओरू किन टारगेट कीसी इद बेगय लागवा लेहका ता कोशिश कीयामंता.

अस्सल हूडतेके सरकारकुना दमन रोमवालेवा जारी मंता. मावा पार्टी ता महिला कार्यकर्तागे इद दमन ता मुख्यता शिकार आंदूंग. क्रांतिकारी जनसंगठनकुना महिला कार्यकर्तांग आयवा साधारण नाटे ना महिलांग किन वेने भीषण दमन ता सामना कीया लागा मंता. नाटेना ना महिलांग संगे वेने पुलिस ओसो अर्द्ध-सैनिक बलकु गाली-गलौंच, मारपीट, लज्जा टेंडना, बलात्कार कीयना इद्रम ता कीसोर मंतोर. कई महिलांग किन हौकामंतोर. हमलांग, मुठभेडकुने ओसो झूठी मुठभेडकुने मावा पार्टी ता पक्काय मुल महिला गेरिल्ला योद्धाओरू किन हौकतोर. कैदे दोरकता महिला कामरेड्स किन सरकारी सशस्त्र बलकु केत्ता-परवा व्यवहार कीयामंतोर. मुठभेडकुने घायल आसी डोल्लना पहर ते वेने सरकारी सशस्त्र बलकु सामूहिक अत्याचार कीयामंतोर. महिलांग ना कपड़ा लेवा, ओसो जोर नेत्तुर पेसता मेंदूल ता फोटो खिंचे कीसी वीडियो बना कीसी इंटरनेट ते वाटामंतोर. इद्रम ता बवे घटनांग किन वेने बेस्के खंडन कीयवा शुभ्रांशु चौधरी किन नेंडू मावा महिला कामरेड्स पोरो बेगाडल 'हमदर्दी' पुटता! शुभ्रांशु चौधरी! निम्मे महिला कामरेड्स कुना महीनेवारी ता तिप्पल ता बारंते वाडकामुंतिन मति इगा सरकारकु महिला कामरेड्स ना नेत्तुर ता कुएरकु पोंगी कीयामंतांग! नीवा हमदर्दी निट्टम ता आत्तेके इद दमन ता विरोध ते आवाज तेहाना. मति तेना विरोध ते निवा लेंग पेसो. बारंक इतेके नीवदु ढोंग हमदर्दी आंदू.

नेंडू मावा पार्टी ता आधा आबादी महिलांग मंता इंजी

महिलांग पोरो ताकाना भीषण दमन ओसो महिलांग कीयना जुझारु संघर्ष!

क्रांतिकारी आंदोलन तुन मापना मैदे केंद्र ओसो राज्य सरकारकु 2017 तल ताकी कीयना रणनीतिक 'समाधान' योजना ता तहत दंडकारण्य ते भीषण दमन ताकामंता. एसटीएफ, कोबरा, सीआरपीएफ, डीआरजी, महिला कमांडो लेहका ता रक-रकम ता लगभग 1 लाख 70 हजार केंद्र ओसो राज्य ता सशस्त्र बलकु, भारतीय सेना ता इचून युनिटकुन तैनात कीसी इगा दमन तुन दिया-दिया तुक बेरसी कीसोरे मंतोर. इद दमन ते जनता ना जीवा दायामंता. इद दमन महिलांग ना पिस्वल तुन बचोनो गुना प्रभावित कीयामंता. महिला गुरिल्ला कामरेड्स नगडल पोयसी साधारण महिलांग एवना दमन ता शिकार आयामंता. मति महिलांग इद दमन तुन केमेक मंजी सहेमासोरे हिल्लेंग. तमा किन मत्ता क्रांतिकारी लड़ाई चेतना अविस्कनुन केमेक मंदा हीवो. अविस्कनुन प्रतिरोध मैदे प्रेरित कीयामंता. सुडला पिल्ला तल पोयसी डोकरी यायो एवना इद प्रतिरोध ते जोरशोर ते शामिल आयामंतांग. पूरा दंडकारण्य मंडु महिलांग ना प्रतिरोध ताकामंता. मति इचुने खबरकु ठोस रूप ते माकुन दोरकामंता. खासकर पश्चिम बस्तर डिविजन ता गंगालूर क्षेत्र ते महिलांग कीयना प्रतिरोध ता जानकारी माकुन विस्तार ते दोरकता. अविनकु इगा हीसोर मंतोम.

गंगालूर क्षेत्र ता नाहकुना लोप्पा हर दिया पुलिस ता हमलांग ताकामंता. पुलिस बलकु जनता किन विचार वात्तप मारपीट, अवैध गिरफ्तारिंग, जनता पोरो अंधाधुंध गोलीबारी, झूठा मुठभेड़कु, महिलांग पोरो अत्याचार, जनताना संपत्ति किन लूटी कीयना मामूली पोल्लू बनेमात्ता. इद दमन ता विरोध ते लड़ेमायना वेने जनता मैदे खासकर महिलांग ना मैदे उंदी मामूली पोल्लू बनेमात्ता.

27 दिसंबर, 2019 ते पीडिया क्षेत्र ते पुलिसतोर उंदी बेहरा अभियान किन ताकी कित्तोर. ओसो पीडिया नाटे नल इरवुर जन किन ओसो अंड्री नाटे ना मुवुर जन किन पुलिसतोर गिरफ्तार कित्तोर. अस्के ओरु किन विड़ची

कीयना मैदे 350 मुल महिलांग ओसो 21 मुल पुरुष बीजापुर हंजी मुंड दिया संघर्ष कित्तोर. जिला कलेक्टर ओसो एसपी ओरु किन विड़चकोम इंजी आश्वासन हित्ता पेरकेने जनता तमा संघर्ष किन रोमी कित्तोर. मति शासन-प्रशासन जनता संगे धोखा कीसी तमा वेहता पोल्लू किन वेने लागू कीयालेवा बंदीर किन जेल लोहचित्तोर.

दिसंबर, 2019 ते मेट्टापड नाटे हमला कीसी पुलिस बल इरवुर नाटेनोर किन पोयसी ओत्तोर. अस्के नाटे नोर किन विड़ची कीयना मैदे 120 महिलांग गगांलूर थाना ते हत्तांग. अगा पुलिसतोर संगे लड़ेमासी तमा नाटेनोर किन पोयसी वात्तांग.

5 फरवरी, 2020 ते गश्त वासी पुलिसतोर तिमेनार नाटेना महिलांग संगे मारपीट कित्तोर. ताना लोप्पा 15 महिलांग गंभीर रूप ते घायल आत्तांग. अस्केने नाटेनारे 7 मुल कोयतोर किन पुलिसतोर अरेस्ट कीसी ओत्तोर. 60 मुल महिलांग पुलिसतोर पेरके अरसी कैप एवनाल हत्तांग. ओसो अगा वेने संघर्ष कीसी तमा नाटेनोर किन पोयसी वात्तांग.

23-27 फरवरी, 2020 ते बीजापुर जिला ता गंगालूर तल वात्ता पुलिसतोर मुंड पंचायतकु पीडिया, एडसूम, हिडमगोंडा - नाहकुना लोप्पा हमला कीसी पूरा जनता ना चीज-बस किन जतखत कीसीत्तोर. तेना प्रतिरोध कीयना महिलांग किन केत्ता परवा मारपीट कित्तोर. ताना कारण ते 13 महिलांग गंभीर रूप ते घायल आत्तांग. कई दियांग ताका परवा, तेदा-उददा परवा तिप्पल आत्तांग. पुलिसतोर नाटेनोरा लोहकु नगा नेंगसी पैसा, कपड़ा डोंगीसी ओसो कोरूकु, तिंदना-उंडना चीजकु वेने डोंगी ओत्तोर. तेना विरोध ते 250 महिलांग ओसो 8 कोयतोर किन गंगालूर हंजी पत्रकारकु ओसो सामाजिक कार्यकर्तांग मुन्ने पुलिस जुल्म ता पर्दाफास कित्तोर. अपराधी पुलिसबलतोर किन नौकरी तल बर्खास्त कीयना ओसो कड़ी सजा हीयना इंजी

सबेतोर पुत्तोर. नेंडू समाज ते महिलांग पोरो भेदभाव, जुल्म ओसो अत्याचार ताकामंता. तेन विरोध कीयना महिलांग मावा पार्टी ता हिस्सा बनेमासोरे मंतांग. बारंक इतेके मावा पार्टी इद भूमि ते साम्यवाद किन निल्पी कीयना मैदे लड़ेमासोरे मंता. साम्यवादे महिला मुक्ति मैदे संपूर्ण आश्वासन हिंता. मावा पार्टी लोप्पा दिया-दिया तुक बेरसना महिलांग ना संख्या मावा पार्टी मैदे गर्व ता पोल्लू आंदू. मावा पार्टी ता प्रतिष्ठा ता पोल्लू आंदू. मावा पार्टी पोरो महिलांग ना बेरसनाविश्वास ता पोल्लू आंदू. मावा पार्टी किन नुकसान कीयना इतेके मावा पार्टी ता आधा ताकत लेहका मंदना मावा महिला कामरेड्स कुन वेने निशाना बनाकीयना इंदना विषय तुन लूटी सरकार बेस पुंता.अदेन काजे उंदी वड़का

महिला कामरेड्स ना विरोध ते प्रत्यक्ष रूप ते भीषण दमन तुन ताकि कीसोरे दूसरा वड़का अविस्कनुना मन जीडाना इंजी शुभ्रांशु चौधरी लेहकाटा मानय किन इस्तेमाल कीयामंता. इद क्रांतिकारी आंदोलन ता विरोध ते ताकाना चौतरफा हमलांग ता उंदी हिस्साये आंदू.

तेना विरोध कीयना. मावा इलाका ते शुभ्रांशु चौधरी ओसो ओना हरी ते ताकानोर किन कोज्जी वेने विहकला हीयना आयो. इगातल पूंडाना.

**दंडकारण्य स्पेशल जोनल कमेटी
भारत की कम्युनिस्ट पार्टी (माओवादी)**

मांग कित्तोर. इद जुल्म ता विरोध ते हमला ता शिकार आत्ता महिलांग अदालत हंजी कानून हिसाब ते वेने लड़ेमात्तांग. मति इद लूटी न्याय व्यवस्था तल अविस्कन बातय न्याय दोरकता हिल्ले.

19 मार्च, 2020 ते बोडोड ओसो गंपूर नाहकुना पोरो पुलिसतोर हमला कित्तोर. ओसो पुलिसतोर इडु पेहकानोर माडवी बदरु पोरो फेरिंग कीसी ओनकुन हौकतोर. इद हत्या ता विरोध कीयना 9 महिलांग ना संगे वेने पुलिसतोर केत्ता परवा अचोन मारपीट कित्तोर. इद्रम कित्तेकाई लगभग 360 महिलांग ओसो 15 कोयतोर बदरु ना लाश किन पोयसी रैली कीसोरे किरंदुल ओत्तोर. मति पुलिसतोर कोरोना ता बहाना ते सबेतोर किन गिरफ्तार कीतोम इंजी धमकी हित्तोर. मति महिलांग पेरके गुच्चवा लेवा दंतेवाडा हंजी इद फर्जी मुठभेड ता विरोध ते संघर्ष कित्तांग. अपराधी पुलिसतोर किन नौकरी तल टेंडाना ओसो ओरुकिन सजा हीयना मांग कित्तांग.

29 जुलाई, 2020 ते मेट्टापाड नारु पोरो पुलिसतोर हमला कीसी महिलांग ओसो पिल्ला-पेकोर किन मारपीट कित्तोर. ताना लोप्पा 22 महिलांग गंभीर रूप ते घायल आत्तांग. 7-8 साल ता रेंड पिल्लांग वेने इद मारपीट ता शिकार आत्तोर.

13 सितंबर, 2020 ते जेलबंदीरा रिहाई ता मांग कीसोरे दंतेवाडा जेल तुन सरने घेराव कीसी दक्षिण बस्तर, पश्चिम बस्तर ओसो दरभा डिविजन ते बेहरा पैमाना ते जनता पेसतोर. ताना लोप्पा बेहरा संख्या ते महिलांग वेने मत्तांग. पुलिसतोर केत्ता परवा जुल्म कीसी ओरुकिन श्यामगिरि हेरे रोमी कित्तोर. ओसो ओरा पोरो लाठी चार्ज कित्तोर. अगा 83 महिलांग ओसो 60 कोयतोर गंभीर रूप ते घायल आतोर.

15 सितंबर, 2020 ते पूंबाड पंचायत ते गश्त ते वात्ता पुलिसतोर 221 मुल महिलांग ना संगे निर्मम रूप ते मारपीट कित्तोर. ओसो 16 मुल कोयतोर किन मारपीट कीसी ओरकुन गंगालूर थाना ते ओत्तोर. अस्के गंभीर रूप ते घायल आतेके वेने महिलांग पुलिसतोर पेरके-पेरके हंजी ओरा कैदे मत्ता जनता किन विडची कीसी तत्तोर. इदे अभियान ते डीआरजी गुंडालोर 16 साल ता नाबालिग पिल्ला किन अत्याचार कित्तोर. तेना विरोध ते महिलांग बीजापुर ता अदालत ते हंजी अत्याचारी किन कड़ी सजा हीयना मांग किन पोयसी धरना कित्तांग.

25-27 सितंबर ते पीडिया क्षेत्र ते पुलिस, सीआरपीएफ, डीआरजी, एसटीएफ, कोबरा ओसो दंतेवाडा महिला पैथर्स ता संयुक्त टीम पीडिया, डोडी तुमनार, अंझी, हर्रा, इडियुम, सुडला गोट्टोड, पेदापाल, एलमागोंडा, एडसुम ओसो बासागुडा थाना अंतर्गत मिर्गागोट्टोड, आउटपल्ली ओसो इकुम नाहकु पोरो हमला कित्तोर. इद हमला तल रैडसी पीडिया नाटेनोर जीवा पिस्सी कीयनीकी जंगल तके वितसोर मत्तोर अस्के पुलिसतोर जान-बूझकर ओरा पोरो फायरिंग कित्तोर. ताना

लोप्पा पीडियातोर पूनेम छोटू टूटा पडसी हामुर आतोर. पेरके पुलिसतोर एक लाख ता इनामी नक्सली किन हौकतोम इंजी दावा कित्तोर. अस्केने अंझी नाटेना उंदी महिला किन पुलिसतोर अरेस्ट कीसी ओत्तोर. इद हूडसी नाटेना महिलांग इद फर्जी मुठभेड ओसो अरेस्ट ता विरोध ते संघर्ष कित्तांग. अस्के महिलांग संगे पुलिस गुंडालोर केत्तापरवा अचोन मारपीट कित्तोर. इद मारपीट ते 34 महिलांग घायल आतंग. इचोन कित्तेके वेने लगभग 500 महिलांग बीजापुर हंजी तेना विरोध ते पुलिसतोर संगे लड़ेमात्तांग ओसो छोटू ना लाश किन पोयसी वात्तांग ओसो तमा रीति-रिवाज हिसाब ते पोहतंग.

10 अक्टूबर, 2020 ते पालनार पंचायत ता नाहकुना पोरो पुलिसतोर हमला कित्तोर. ओसो उंदी महिला ना संगे इचुर मुल किन पोयसी तमा संगे ओयनीकी कोशिश कित्तोर. अस्के ओरकिन विडची कीयनीकी महिलांग प्रतिरोध कित्तास्के गद्दार महिला कमांडो बलकु ओरा संगे पक्काय मारपीट कित्तांग. तेना विरोध ते 200 मुल महिलांग जमा आत्तांग. ओसो पुलिसगुंडालोर ओसो गद्दार महिला कमांडो किन देब्बा हीसी गंगालूर थाना एवना पूडतांग. ओसो तमा नाटेनोर किन विडची कीसी तत्तांग.

30 अक्टूबर, 2020 ते बीजापुर जिला मुख्यालय तल पुलिस ता 7 बैच बलकु पेसतोर ओसो गंगालूर क्षेत्र ता अवनार, तोडका, पालनार, कोरसिल, नेंडा, मुरंगा, कोरमा, मनकेली ओसो कोकरा नाहकुना पोरो हमला कित्तोर.



ओसो पुलिसतोर अवनानाटेना मुंड स्कूल छात्रालोर किन ओसो इरवुर पेकोर किन अरेस्ट कीसी तमा संगे ओयनीकी कोशिश कित्तोर. अस्के तेन प्रतिरोध कीसोरे इवु नाहकुना 600 मुल महिलांग तुरंत उंदी एकता आसी हत्तांग. ओसो पुलिसतोर संगे लड़ेमासी चार मुल किन पोयसी वात्तांग. मति वरार 15 सालतोर नाबालिग पेकाल ना पोरो झूठा कंस तासी पोयसी जेल ओत्तोर. ओना काजे वेने महिलांग पक्काय लड़ेमात्तांग मति पुलिसतोर बडगांग, बंदूक बट ते महिलांग किन पक्काय मारपीट कित्तोर. इद मारपीट ते 43 साल ता उंदी महिला गंभीर रूप ते घायल आत्ता. 8 महिलांग किन तल्ला विरहतोर. ओसो कैडकु-कालकु उरहतोर. इच्चोन कित्तेके वेने महिलांग हिम्मत हारेमायोंग. छात्रा-छात्रालोर हारेमायोर. लड़ेमायना विडचोर. नरकोम तल पुलिसतोर मारपीट किन सहेमासी करविना पोदटा ते

अवु जुझारू हिसाब ते प्रतिरोध कित्तांग. कल्ल गोटी ओसो बड़गांग ने पुलिसतोर किन, डीआरजी गुंडालोर किन ओसो महिला कमांडोलोर किन देब्बा हीसोरे अचनाटे नल चेरपाल कैंप एवना पूड़तोर. हथियारबंद पुलिस बलकु अवु महिलांग ना प्रतिरोध किन हूडसी हुक्का-बक्का आतोर. पेरके इवु महिलांग इद मारपीट ता विरोध कीसोरे थानेदारकु ओसो जिला एसपी कमलोचन कश्यप किन बर्खास्त कीयना ओसो मारपीट कीत्ता दोषी पुलिसतोर किन, महिला ओसो पुरुष डीआरजी गद्दारलोर किन सजा हीयना इंजी मांग कीसोरे चेरपाल कैंप ता मुन्ने धरना कित्तांग.

नवंबर, 2020 ते कमका नाटेनोर वर्रोर मानय हाटूम हत्तोर. पुलिसतोर पोयसी ओनकु थाना तगे ओत्तोर. इद खबर केंजता महिलांग 160 मुल थाना हंजी पुलिस बलकुना संगे लड़ेमासी ओन मानय किन ओरा कैदाले पिडंगीसी पोयसी वात्तांग.

4 दिसंबर, 2020 ते आकवा नाटे ना इरपा अर्जुन पोर्रयतोर वर्रोर आदिवासी किसान तना कड़ा ते वंजी विस्फोर मत्तोर अस्के पुलिस-डीआरजी गुंडालोर ओनकु फर्जी मुठभेड़ ते हौकतोर. ओसो पेरके लज्जा लेवा ओनकु मिलिशिया कमांडर इंजी वेहतोर. महिलांग इरपा अर्जुन ना लाश किन पोयसी गंगालूर ओत्तांग. अस्के 31 मुल महिलांग किन गंभीर रूप ते मारपीट कीसी घायल कित्तोर. इदे अभियान ते कमका पंचायततोर वर्रोर मानय किन पुलिसतोर पोयतोर. अस्के महिलांग प्रतिरोध कित्तांग. पुलिसतोर महिलांग ना प्रतिरोध तुन उरहतलाई अविस्कुना पोर्री लाठी चार्ज कित्तोर. इच्चोन कित्तेके वेने जोजूर ओसो कमका पंचायतकुना 82 महिलांग गंगालूर थाना तगा हंजी थाना तुन घेराव कित्तोर. ओसो पुलिस बलकुना संगे लड़ेमासी इरपा अर्जुन ता लाश किन पोयसी वात्तांग.

27 दिसंबर, 2020 ते परलनारनाटे पुलिसबलकु मुवुर जन किन अरेस्ट कीसी तमा संगे ओत्तोर, नाटे ना 150 महिलांग ओसो 15 मुल कोयतोर बीजापुर एसपी दफतर ते हंजी लड़ेमात्तांग. अस्के पुलिसतोर इरवुर जन किन विडचीत्तोर. मति वर्रोर मानय किन जेल ओत्तोर.

उंदी दमन ता विरोध तेने आयो, आर्थिक ओसो राजनीतिक संघर्षकुने वेने गंगालूर ओसो पश्चिम बस्तर डिविजन लोप्पा महिलांग ना सक्रिय भागीदारी मंता. 2020 ते तेंदूपत्ता मजदूरी बेरसी कीयना मांग तुन पोयसी ताकी कित्ता संघर्ष ते लगभग 3000 मुल महिलांग शामिल आत्तांग.

2020 ते सालमेंड लोप्पा गंगालूर एरिया ते पुलिसतोर फर्जी मुठभेड़ कीसी 4 मुल मामूली जनता किन पोयसी हौकतोर. इद साल ते पुलिसतोर संगे आमने-सामने लड़ेमासोरे पीएलजीए ता इरवुर योद्धालोर तमा जीवा ता कुर्बानी हित्तोर. महिलांग पुलिसतोर संगे लड़ेमासी ओरू 6 मुल ना लाश किन पोयसी वात्तांग. फर्जी मुठभेड़ ते जीवा पोहतना मामूली जनता ना लाश तुने आयवा पुलिसतोर संगे लड़ेमासी शहीद आत्ता कामरेड्स ना लाश किन वेने तत्तना लोप्पा महिलांग तमा वड़का तले महत्वपूर्ण भूमिका निभा कीयामंतांग. इद सालमेंड लोप्पा इवु संघर्ष कीयना महिलांग पुलिसबलकुना कैदाले 35 महिलांग ओसो 60 मुल कोयतोर किन विडची कीसी पोयसी वात्तांग. इदे आयवा नाटेना सुरक्षा ते वेने अवु सक्रिय भूमिका निभा कीयामंतांग. रोजे पेट्रोलिंग कीसोरे पुलिसतोर खबर नाटेनोर किन एवसी कीसी ओरकुन सतर्क कीयामंतांग. इद्रम इंजे ताकाना समाधान हमला किने हरा कीयनादे आयवा नवजनवादी क्रांति लोप्पा वेने महिलांग अहम भूमिका निभा कीयामंतांग. महिलांग ना इद प्रतिरोध किन ओसो विस्तार कीयना. ★

जेल बंदीरा रिहाई संघर्ष समिति ता अध्यक्ष मडकाम हिडमे ना गिरफ्तारी तुन विरोध कीमुट!

उंदी वडका इद साल ता 8 मार्च, अंतर्राष्ट्रीय महिला दिवस ता मौका ते कोएएमएस जेल बंदी लोरा खासकर दंडकारण्य ता महिला जेल बंदीरा रिहाई ता मांग उठा कीत्ता. दूसरा वडका अंतर्राष्ट्रीय महिला दिवस ता इम्मा दिया 9 मार्च ते जेल बंदीरा रिहाई संघर्ष समिति ता अध्यक्ष मडकाम हिडमे किन पुलिस तोर गिरफ्तार कीत्तोर. अच्चुने आयो तान किन एक लाख ता इनमी नक्सल इंजी पुलिस तोर वेहतोर. पुलिस तोर ताना पोर्री चार केसकु दर्ज अत्ता इंजी वेंडे वेहतोर.

अस्सल इतेके हिडमे किन माओवादीर संगे बेदे संबंध हिल्ले. अद जेल बंदीरा संघर्ष समिति अध्यक्ष आंदु. जेल लोप्पा मत्ता निर्दोष आदिवासीरा रिहाई मेदे 2019 तिंची अद आंदोलन कीयामुंता. नरगे दिया आंदोलन कीत्ता पेरके छत्तीसगढ़ मुख्यमंत्री भूपेश बघेल संगे उंदी बैठक जरगता. अद बैठक लोप्पा हिडमे वेंडे शामिल अत्ता. उंदीवेला अद इनामी नक्सली अतेके अद बैठक लोप्पा बेले शामिल अत्ता इंजी नरगे मुल तालकामुंतोर. हिडमे सिर्फ जेल बंदीरा रिहाई ता संघर्ष तुके सीमित अत्तादु हिल्ले. दंडकारण्य जनता किन नुकसान आयना लेहकाटा हर मुद्दा तुन पोयसी अद विरोध कीयामुंता. अडानी किन नंदराज पहाड़ तुन सौंपा कीयना मुद्दा तिंची शुरु कीतेके इस्साले पुलिस कस्टडी ते पांडे किन हौकसीत्ता घटना एवनल अद आवाज उठा कीसोर मत्ता.

क्रांतिकारी आंदोलन तुन उन्मूलन कीयना मकसद संगे केंद्र, राज्य सरकारकु रोजे-रोजे दमन तुन बेरिसी कीयमुंता. जनता पोर्री वेंडे नरगे दमन तुन ताकी कीयमुंता. इद दमन ता विरोध ते लेंग पेस कीयानोर किन वेंडे सरकार सहन कीसोर हिल्ले. ओरा लेंग तुन दबा कीयनोक बचुनो कोशिश कीयमुंता. उंदी आदिवासी युवती ईले तम्मा जनता चप्पा नित्तिसी लड़ेमायनादु मनु ता मरु लोर किन बिलकुले ओप्पो आत्ता. अदेनकिने हिडमे किन गिरफ्तार कीत्तोर. सरकार ता इद तानाशाही रवैया तुन सब्बे तोर विरोध कीयना.

“पुलिसतोर वायामंतोर, वित्तट-वित्तट” इद लेंग केंजी पूरा नाटेनोर कंदरेमातोर. दण्डकारण्य ता हर नाटे इद पूना पोल्लो आयो. अद नाटे ना मैदेने आयो, इगा ता बेदद नाटेना मैदे वेने इद पूना पोल्लो आयो मति, नाटेनोर कंदरेमातोर. ओरा कंदरेम बारंक इत्तेके, हर बेरा नाटे इद्रम ता कोलार ता पेरके बेच्चोन कटला पुटिन्ता इंदना विषय इगा ता हूडिला पिल्लंग-पेकोर वेने पुत्तोर.

अद लेंग केंजा वात्ता इत्तेके वित्ता परतोर, वित्तला आत्तोर. अद नाटेना आस्क-कोयतोर, पिल्लंग-पेकोर तमा ओडकु-वेडांग ता कमाई तल अस्के-अस्केने लोन एवसी मत्तोर. सबे लोत्तगे, लोता बूता अट्टना-बोडसना शुरु कीसि मत्तोर. सबेतोर कुन करू वसिस मत्ता. ओसो जइक मत्तेके, सबेतोर लोन-लोन, लोता मुल उदिसी कास्ता-कास्ता जावा-गाटो तिंजी मन्नेर मति, नेंडु बेद लोते वेने रोजे ता लेहका अद्रम तिंदा परवोर. नेंडु अद नाटे ना कामकाज दिनाल लेहका ताका परवो. नेंडे आयो, हत्ता इचुक साल्कु तल अद नाटेने आयो हर नाटेना इद्रमे कंदरेम ते पोटदु मुलिसोर मंता.

मंगली लोन लोपोडल दूवार ते दोहता ऊकाड़ ता हेरे वितिसी वात्ता. तानकु कंदरेम ता मारे बाता कीयना इंदनादू समझे मायो. तना मुज्जो, इल्का तगा एरू मिया हत्तोर. ओर अगाडले वितिसी मंदनूर बहेइंजि मंगली आलस्ता. मति मुंड लेंजकुना केसमुल पिला किन पोयसी नन्ना बेगा दायकन इंजि आलस्ता. तान बाता समझे मायो. पिल्ला किन निन्ने तल जर पोयदा मंता. अद बाता कीयाकन इंजी आलसला आता.

अस्केने तम आतो सनकी, एरू गंजी तल्ला पोरी तोच्चीसी वायना दिसता. उक्का-बक्का ते गंजी नेल रेहचोर कंदरेमासी सनकी कोडियाड किन ताल्कता.

“लालू वात्तोर”?

“वायोरू, ओरू अगाडल वितिसी मंदनूर बहे.” मंगली वेहत्ता.

सनकी किन वेने ओना मरी बचेमासी पेसिस मंदनूर इंजी जीवा ते लागता. मति, अद अस्के वेने आराम ते नेस्को. बारंक इत्तेके, इंजे कोडा मुन्ने कोडियाड मंता. ताना बारे ते आलसीसी, तना जीवा ते पुट-पुट आसोर मंता. पक्काय आल्सुड ते अद वेहता.

“निम्मा बाता कीयाकिन?”

“अदे, बाता कीयाकन, समझे मायो. बीमार पिल्ला किन पोयसी बेके वित्तकन” सनकी किन वेने बातय उपाय वायो. अद हिके-हके हूडता. उंदी वडका तानकु रैइ बातल इत्तेके, जवान कोडियाड लोन मत्तेके, पुलिसतोरू कैइ

पोयनोरू इंजी ओसो, दूसरा वडका जंगल बेके वितितेके जर पोयत्ता पिल्ला बाह आयर इंजी पक्काय आलसोरे मत्ता. मति पेरके-मुन्ने आलसीसी फैसला एतना मौका बग्गा मत्ता? अस्केने पुलिसतोरू केयना, रांगना कोलार केवदे केंजा वात्ता. सनकी उबय मिरी तना नाती पिल्ला किन ऊकाड़ तल तेहची कोडियाड ना कैदे हीसी तान नेल उददा वेहता.

अद केसमुल पिल्ला ना यायाल इंजी पुलिसतोरू पुन्निर इंजी आतो आलस्ता. आतो अद्रम आलस्ता इंजी कोडियाड किन वेने समझे मात्ता. कोडियाड न गरें हंजी तना वेने उदिदता. वेट्टड हबर तल पुलिसतोर वायना दिसतोर. इच्चुन मुल पुलिसतोर तमा लोतेनेनेंगतोर. ओरकुन हुडसी कोडियाड रेंडिना गुंडे जोर ते डक-डक आसोर मत्ता.

इगा बोर वेने पुलिसतोर किन मानय इंजी आल्सोर! बचोनो जीवा टेंडना जानवर किन वेने इगातोर रैइवा लेवा सामना कीतोर. मति, पुलिसतोर कुन जानवर लेहकाटोर इंजि वेने वेहता परवोर. मुख्य रूप ते आस्कु अद्रम वेह परवो. बारंक इत्तेके बेद वेने जीवा टेंडना जानवर तल जीवा दायना रैइ मंता, मति बलात्कार ता रैइ मन्नो.

“ऐ... बेके हत्तीर रा.. लोतोर मानय”? गट्टिंग बेहरा लेंग ते वेहत्तोर. पुलिसतोरू बुद्धिये अद्रमतदु, हांग ते दागा हीसोर बेहरा लेंग तेवडकिंतोर.

“सबेतोर बोरू? नावा वेरैरे मरू, ओरू, तना हेलो ना नाटे, तना कुन हूडनीकी हत्तोर” धीरा कीसोरे सनकी वेहता. सनकी ना मुज्जो मुंड साल मुन्ने डोलतोर. पुलिसतोर तना मुज्जो ना बारे ते ताल्कोर, सनकी वेने वेहो.

“इद बेददू... निवा हुडिला मियाड आ?” उंदी ओसो लेंग. लेंग बदले मात्ता मति, वेहना तरीका बदले मायो.

“नावा कोडियाड.”

“नीवा कोडियाड ? ताना मरी वेने आयोये.....! तानकु नावा कोडियाड इंजी जाडपा मंतीन?” इद बेरा इज्जत टेंडना बुद्धि वेने ओना लेंग ते जुडेमात्ता.

“बारंक जाडपाकन? ताना मरी आयो इंजी, मीटू बद्रम वेहता परिन्तीर! अद उंदी पिला ना यायल आंदू”. सुडला जीवा किसी वेहता सनकी.

“बाता, इद उंदी पिल्ला ना तल्लूर आ.....?” ओर नमवा लेवा अद्रम वेहोर. अविस्कुन पिस्कट कीयना बुद्धि ओना लेंग ते मत्ता.

“हुडटू..... पिल्ला किन एत्तिसि मंता.” ताना विचार बाह बरा कीसी कोडियाड कुन कटला तल पिसी कीयना इंजी मत्ता.

“दूसरोना पिल्ला किन तच्ची, तेना मर्मी आत्ता इंजी माकिन नमी कीया मंता”.

कोडियाड रेंडिना गुंडे सांगता.

“दूसरोना पिल्ला कुन माटू बारंक तत्कोम? इद तेनाये पिल्ला” सनकी पक्काय दुखम ते वेहता.

“तेना मर्मी आत्ताया आयोया, तेना मुकम हुडतेके समझे मायोया? इच्चोन नाटक कीया मंतीन इत्तेके जरूर इद दलमताये पिल्ला आंदू, दय..दय तेदा बाहर पेसा” इंजी वेरॉर पुलिस जवान, पिल्ला किन एत्तिसि उदिदता मंगली ना कैदले पिल्ला किन उन्दतोर. ओसो वेरॉर पुलिसतोर ताना डंडा कैइ तुन पोयसी पिडंगसोर तेहतोर. पुलिसतोर उन्दा—पिडंगा ते मंगली नेल मुट्टाले आत्ता मति बाल—बाल बचेमात्ता.

सनकी उब्बय तेदित्ता. अद पुलिसतोर कैदले किल्लना पिल्ला कुन पोयसी अडयूल ते उरंगता. “इद बाता पापम. हुडिला पिल्ला कुन पुन्चीर, पिल्ला मुत्ते कुन पुन्चीर” होंग ता मारे उबुकने सनकी ना टोडडी तल पोल्लो पेसता.

ऐ...डोकिरी! बीड आयमा इंजी वेहचोरे वेरॉर पुलिसतोर तान उंदी वडका दोबसीत्तोर. ओसो वेरॉर पुलिसतोर, निमा दय इंजी वेहचोरे मंगली कुन दोबसोरे लोतल दूवार ते पेसी कीत्तोर.

हिके—हके दोबना मारे मंगली मुटसोर मत्ता. वेरॉर पुलिस जवान पोइतोर. “नावा पिल्ला बीमार मंता. नाकिन विडचट, नाकिन विडचट” इंजी पुलिसतोर कैदल पिस्क अरला मंगली जूझेमासोरे मत्ता.

“कम से कम पाल उंडना पिल्ला न मुकम हुडसी आई जीवा कीमूट. नावा कोडियाड किन विडचियाटू। ताना बातय गलती हिल्ले”. होंग कुन मकी कीसोरे सनकी किलसोरे वेहता.

ताना किलसी—किलसी वेहतना तुन पुलिसतोर पास्कसोरे मंगली कुन जबर्दस्ती पोयसी ओत्तोर. किल्लना पिल्ला कुन एतिसी सनकी वेने ओरा पेरके—पेरके दायला आत्ता.

“पिल्ला कुन केयी कीसोरे बेके ओयकिन. तानकुन नाकून हीसी हन्नू नन्ना पोयसी मंदकन” इंजोरे तमा लोन हेरे लोता डोकरी मुत्ते कैइ आहता. पुलिसतोर वायना खबर पुंजी वेने अद डोकरी बातल आत्तेके आई, परवा—परवा बेके वित्तकन इंजी तना लोन मुन्ने दूवार ते मर्रा अडडी उदिसी मत्ता. मुन्ने तल अद पुलिसतोर संगे कोडियाड रेंडिना वेहना माटा केंजसोरे मत्ता. दुख ओसो आल्सुडे आयो, होंग तना गुंडे किन वेने सांगी कित्ता. उमर जीडसी लाव दोगतनके बातय कीया परवो मति, अद वेने पुलिसतोर किन मुंडाड कीसोर मत्ता.

पिल्ला कुन अद डोकरी मुत्ते ना कैदे हीसी सनकी, पुलिसतोर गोंजी जाडा ओत्ता.

बच्चोको बैचकु पुलिसतोर नार कुन सर्र तिरियसी कम से कम घंटामेंड नाटे नंगसी लूटपाट, मारपीट कीसी बोर दिसतेके ओरकुन पोयसी पेरके नार नडमा सबे बैचकुनोर जमा आत्तोर. पुलिसतोर 70—80 मुल मत्तोर. ओसो ओरा कैदे अरतोर नाटेनोर 10 मुल मत्तोर, ओरू 10 मुल लोपो मंगली कुन विडची ओसो रेंड आस्क मत्तांग. अरेस्ट आत्तोर मुकम ते तिप्पल ओसो होंग दिस्सोर मत्ता. सनकी संगे 10—15 मुल डोकरी मुत्तेस्कु ओसो आस्क, पुलिसतोर गोंजी जाडा पोयसी अगा एवसी मत्तांग.

ओरा लोपो इचुक जन आस्क किलिसी—किलिसी मावा मानय कुन विडचियाटू इंजी वेहची हुडतांग. इचुन आस्क, पुलिसतोर पोर्रो होंग ते सवाल तुक सवाल मल्हसोरे लडे मात्तांग. “बारंक इद्रम हमेशा मावा नाटे ना पोर्रो हमला कीसी माकुन तिप्पल कीतीर” इंजी ताल्कमंता.

पुलिसतोर कैइकुने, बडगा ने पिटाई कीसोरे, अविस्कन पूंडसोर अरेस्ट कियलेर किन पोयसी ओयनीकी कोशिश किन्दूर.

अस्के सनकी पक्काय जोर ते इत्ता, “इद मीवा बाता बीडू! केसमूल पिला ना यायाल कुन बेके ओया मंतीर. अद पिला बाह आयर?” अस्के सबे आस्क ना कोंडा मंगली नके हत्ता. सबे आस्कना कोंडांग ते मंगली ना पिल्ला ता मुकम सीता वात्ता. “पिल्ला मुत्तेन बेके ओयकिर? इद बाता पापम! सबे आस्क बार—बार वेरॉरन पेरके वेरॉरन इदे पोल्लो कुन ताल्कना शुरू कित्तांग. पुलिसतोर पोइत्ता सबेतोर लोपो मुन्ने मंगली किन विडची कियनीकी अवु जोर हित्तांग. इद तामा पहली जिम्मेदारी इंजी अवु समझे मात्तांग. सबे आस्क मंगली किन विडची कीयना मांग पोर्रो पट्ट पोयत्तदु हूडसी वेरॉर पुलिस अधिकारी ना मन ते नेक्का लागवा विचार वात्ता. पुलिसतोर कुन बद विचार वात्तेके वेने पेरके मुन्ने आलसोर. ओसो इद सरकार वेने ओरकुन तमा विचार वात्तप कीयना अधिकार सौंपे कित्तद मंता. “निजमे इद हूडिला पिला ना यायाल आंदू इत्तेके तेन माटू इगने विडची दायकोम” ओर अधिकारी वेहतोर.

निजमे विडचियानूर बहे इंजी मंगली संगे अगा मत्ता सबे आस्कना विचार ते इचुन आशा वाता. “निजमे अद हूडिला पिला ना यायाल आंदू” सबे आस्क उंदी लेंग ते वेहतांग.

“अद हूडिला पिल्ला ना यायाल इंजी माटू बद्रम पूंदकोम” ओरू अधिकारी ना गत्ति पोल्लो किन अव सीदा—सादा आस्क समझे मायोंग.

“माटू वेहता मंतोम ना?” अव वेहतांग.

मीटू सबेतोर जाडपा मंतीर बहे” गत्ति बुद्धि ता संगे पास्कना बुद्धि वेने ओना पोल्लो ते जुडे मात्ता.

“अद हूडिला पिला किन मीटू सबेतोर वेने हूडतीरू”

सनकी हूडिला लेंग ते वेहता.

“माटू बद्रम माने मायना, अद पिल्ला किन इदे पुट्टी कीत्ता इंजी”

“मीटे वेहतीर ना? इद हूडिला पिल्ला ना यायाले इत्तेके, विडचियाकोम इंजी मति, मावा पोल्लो किन नमविर, असल मीटू बोना पोल्लो किन नमकिर” सनकी ना लेंग ते वेर किन बद्रम कीसी वेहना इंदना दुखम मत्ता.

“माटू बेद वेहतेके अदू कीयना अस्केने, माटू नम्माकोम.”

“वेहटू, माटू बाता कीयाना?”

ओरू अधिकारी वेहत्तोर. अद पोल्लो केंजी मंगली संगे सबे आस्कु पक्काय हुक्का-बक्का आतंग. सबे पुलिसतोर कुटिल बुद्धि ते कवतोर.

“मीकू लज्जा वायो?”

“मीटू उंदी यायो ना इज्जत टेंडा मंतीर? मीकिन यायो पुट्टी कीत्तादू हिल्ले या?”

अगगे मत्ता आस्क सब्बेतव अद्रम पोल्लो ता पोल्लो होंग ते वेहचोर मत्तांग.

ओन, पुलिस अधिकारी किन इचुन वेने होंग वायो. “मीटू वेहता मंतीरू, इद उंदी पिला ना तल्लूर इंजी मति, माटू मुन्ने वेने वेहतोम. इदू उंदी पिल्ला ना तल्लूर इंदना साबूत तोहतीतेके, तेन इग्गाने विडची दायकोम लेवेके, तेन ओसी जेल ते तासाकोम. इंजे मीवा कैदेये फ़ैसला मंता!” इंजी वेहची मुन्नेटकु हत्तोर. सबे पुलिसतोर ‘दट’ इंजी वेहचोर अरेस्ट कित्तोर किन मुन्नेटकु दोबसोर ओयला आतोर.

पेरके-पेरके वायना आस्कुना पोरो पुलिसतोर ओसो जोर ते लाठी चार्ज कीयना शुरू कित्तोर. मंगली किन, तना पिल्ला सुरता वात्ता. “नाकुन जेल ओत्तेके नावा पिल्ला बाह आयर? इद पोल्लो सुरता कीसी अद यायो ना गुंडे पक्का अरतप आत्ता.

मंगली तना मन ते आलसला आत्ता. “पुलिसतोर नाकिन जेल ओयनूरा लेवेके, इव आस्कून इगाडल पूण्डिसी नाकिन हबर ओसी बलात्कार कीयोर बाह....! बच्चोन आस्कूना इज्जत टेंडतोर वेर पुलिसतोर. “इद पोल्लो सुरता कीसी ताना जीवा सांगता.

पेरके ओन पुलिस अधिकारी ना इज्जत टेंडना पोल्लू किन सुरता कित्ता. “ओरू वेहतप कीयकना” इंजी जाम आलस्ता. ओना पोल्लो सुरता कितेकेने तान जीवा ते ओप्पो. बाता कीया परवोन इंजी ओसो तानकु पक्काय जीवा नोत्ता. सनकी वेने अद्रमे आलसोर मत्ता. ओरू हजार

इद अंक ते छपा कीत्ता इच्चुक तसवीरकु, समाचार अलग-अलग अखबारकु, पत्रिकांग तिंची एत्तदु मंता.

कोशिश किथीर मति, कोडियाड किन बहे बरा ओरा कैदले पिस्हना लेवेके, पुलिसतोर कैदे ताना पिस्वल इनम (बर्बाद) आंता. वेहता परवा कटला कीसी तान हौक्सीयानूर. तल्लूर लेवा तना जीवा कित्ता वर्वाय नाती पिल्ला बाह आयर? अद पिसियर आ... पिस्सोये? इद्रम आलसीसि ताना जीवा पक्काय नोत्ता.

जमने ताना गुंडे तुन गट्टिंग कीसी, कोडियाड कुन जोर ते केयसी वेहता. “नूनी ओरू बेले कीया वेहतोर अद्रम कीमू नीकुन बातल आयो ओरकुने पाप आयार. नीवा पिल्ला किन सुरता कीसी निम्मा अद्रमे कीमू निम्मा लेवेके अद पिस्सो” किल्लेंग-किल्लेंग आसी अद वेहता.

आतो ना पोल्लू केंजी मंगली जोर ते किल्लता. आखिर ते अद, तनकिन नन्ना उंदी पिल्ला ना यायल आंदन इंदना पोल्लो किन साबूत तोहता पुलिसतोर कीया वेहता लेहका ता पक्काय लागवा परीक्षा काजे तैयार आत्ता. पुलिसतोर कोडिंग ताना मेंदुल पोरो पुडिय ताकतप लेहका तानकिन लागता. पहली बेरा तानकु, तना आंचड आसी पुटतनकु वेहता परवा होंग वस्ता. लज्जा ओसो अपमान संगे तल्ला ओडच कीसी बोम्मा तल पाल पिरिसी तोहत्ता. अद पाल आयो...! अद यायो ना गुंडे तल पोंगता कन्नीर आंदू.

... ..

पुलिसतोर वाया मंतोर. वित्तट-वित्तट” अव पोल्लूंग केंजी अद नारमेटोर हूसार आतोर. वित्ता परतोर, वित्तला आत्तोर.

सोमारी अटसोर मत्ता, अद अटना बूता, बगा ता अगा विडचीसी ऊकाड ते गुडियत्ता तना पेकान किन तेहता. अद समय ते लोते बोरे हिल्लोर. वंजी कोयना काम ताकसोर मत्ता. आतो-मामा, तना एरवु पेका ओसो एरवु पीकी सबेतोर हकेने मत्तोर. तना मुज्जो संगठन मीटिंग तुक ओदे ता नाटे हंजी मत्तोर.

हुडिला पापाल किन पोयसी सोमारी वित्तसोर मंदनास्के, हरदे पुलिसतोर कैदे अरता. पुलिसतोर तानकिन इडचसोरे नाटेनल बाहर ओत्तोर. जइक मंजी नार किन सर्र तिरियत्ता सबे पुलिसतोर अगा एवतोर. ओरू तमा संगे ओरू सबेतोर बेनोन-बेनोन नाटे ओसो कमाई तल पोयसी मत्तोर, ओरू सबेतोर किन इडचसोर तच्ची मत्तोर.

पुलिसतोर कोलार, केंजा वायमंता. लाठी चार्ज कीयना लेंग केंजा वायमंता. पुलिसतोर कैदे अरतोर किल्लमंतोर. मावोर किन विडचियाट इंजी ओरा परिवार तोर वेहची-वेहची किल्लमंतोर. होंग आयमंतोर. हुडिला पिल्लांग-पेकोर किल्लमंतोर. अद्रम आसी अगगे पूरा कोलार-कोलार गरम माहौल बने मात्ता.

“दट-दट” बंदीर किन मुन्ने ताकना आदेश हीसोरे पुलिसतोर आंगलिस वेहतोर. वेरोर पुलिस जवान सोमारी

ना डंडा कैइ पोयसी मुन्ने दोब्बनास्के सोमारी धक्का हीसोरे होंग ते वेहता.

“बेके ओया मंतीरू? बाता कित्तन नन्ना?”

“बोर वेने बातय किवीर? मीटू सबेतोरा बातय गलती हिल्ले इतेके, इस्साल बूबीट्राप पोक्की कित्तोर बोरू? मिलिशिया तोर किवोरा....!” पुलिस जवान पास्कताप वेहतोर.

“मिलिशियातोर कित्तेके, ओरकुन पोयाटू, नाकिन बारंक पोयतीरू” सोमारी ना लेंग इच्चुन वेने जमने आयो.

“ऐ.....दय! बेहरा-बेहरा पोल्लूंग वेहिंता. मिलिशियातोर मोयुल तल अरतोर? निवा लेहका ता लयास्कु-लयोरे मिलिशिया ते काम कित्तोर ना? ”

“नावा हुडिला पेकाल मंतोर, नन्ना मिलिशिया ते बद्रम काम कीया परितन. नीकिन, नन्ना एतित्ता पेकाल दिसिन्तोर या दिस्सोरा?”

“बेसे दिस्सा मंतोर. बोना तो पेकान किन एतिसी पिस्क अरला हुड़ा मंतीन?”

“बाता पोल्लो वेहता मंतीन? बोना तो पेकान किन नन्ना एतित्तान!” सोमारी ओसो पक्काय जोर ते केयत्ता.

उंदीवडका, सोमारी ओसो ओरू पुलिस जवान ता नडमा झगड़ा आयमंता. पुलिस तोर ओसो दूसरोरा नडमा इद्रमता झगडांग अगगे पक्कये आयमंता. मति सोमारी जोर ते लाव कीसी केयत्तास्के, पूरातोर चिम-चाम आत्तोर. सबेतोर सोमारी नके हुडला आत्तोर. इचुन जन आस्कु सोमारी ना हेरे हंजी तानकु बोइसी नितित्तांग “पिल्ला मुत्ते किन बेके ओया मंतीर?” अवु तालक्तांग.

“मीकु इच्चुन वेने दिस्सो या! बेद पिल्ला मुत्ते पुन्वीर, डोकरी पुन्वीरू. मीटू, माकिन इचुन बारी कटला कीया मंतीर?”

“असल मावा नार पोरो हमला कीसी माकिन कटला कीयना अधिकार मीकुन बोरू हित्तोर.” आस्कु पोल्लो ता पोल्लो सवाल किसोरे मत्तांग. पुलिसतोर बचोन कोलार कित्तेके आई, रेहतना-कोट्टाना कित्तेके आई आस्कुना लेंग मायो.

“वेर इंदा मंतोर, नन्ना मिलिशिया ते काम कीया मंतनले. वेर नावा पेकाल आयोर अले. बोना तो दूसरोना पेकान किन एतिसी नन्ना, पिस्क अरला कोशिश कीया मंतन अले!” आस्कुना होंग किन ओसो, किस मडगी कित्ताप सोमारी इत्ता.

इद मीवा बाता बुद्धि...! ताना पोट्टा ते पुट्टा पेकान किन दूसरोना पेकाल इंजी बारंक वेहता मंतीर?” सोमारी ना हेरे मत्ता आस्कुना पोल्लो मारवांये सोमारी ना मुन्ने नितित्ता पुलिस जवान ताना केने हुडसोरे वेहतोर “इंगो वेरू दूसरोना मरी आसी मंदानूर. वेर तानाये मरी इंजी,

ओना मुकम ते कोटतादू मंताया?”

सोमारी होंग अरके तेदित्ता. अद ताना मरीन तना हेरे ता आस्कुना कैदे हित्ता, पेरके ताना कैइ जोर ते मेलियत्ता. अद बाता कीया मंता. बोने समझे मायवा मुन्नेये ओन पुलिसताना मुकम ते चिर... इंजी पाल बोटकु अरता. सोमारी ताना मुकम पोरो उस्कसित्तप ओन पुलिसतोनकु लागता.

सबेतोर हुक्का-बक्का आत्तोर मति, सोमारी ना मुकम ते पेरके-मुन्ने आयना दिस्सो. रैइ हिल्ले ओसो लज्जा वेने हिल्ले. ताना कोंडा ते, ताना मुकम ते ताना मेंदूल ता उंद-उंद कन ते उंदी ये विचार दिस्सोर मत्ता.

अद बातल इतेके, धिक्कार!

★

क्रांतिकारी दिवसकु - महिलांग ना भागीदारी

उत्तर बस्तर डिविजन

10 फरवरी, 2020 ते मानेमात्ता भूमकाल दिवस ता कार्यक्रम लोप्पा 230 महिलांग ओसो 15 बालिकांग शामिल आत्तांग. 8 मार्च, 2020 ते मानेमात्ता अंतर्राष्ट्रीय महिला दिवस ता कार्यक्रम लोप्पा 128 महिलांग शामिल आत्ता. 28 जुलाई-3 अगस्त, 2020 - शहीद स्मारक सप्ताह मौका ते ताकी कीत्ता कार्यक्रमकु लोप्पा 2290 महिलांग ओसो 500 बालिकांग शामिल आत्तादु मंता. 13 सितंबर, 2020 - जतिनदास शहीद दिवस ता मौका ते जेल बंदीरा अधिकार दिवस तुन मानेमात्तादु मंता. इद कार्यक्रम लोप्पा 250 महिलांग ओसो 58 बालिकांग शामिल आत्तांग. 21 सितंबर, 2020 ते पार्टी दिवस ता मौका ते आयोजित कीत्ता सभा- समारोहकु लोप्पा 135 महिलांग ओसो 80 बालिकांग शामिल आत्तांग. 15 अगस्त, 2020 ते झूठी आजादी दिवस ता मौका ते कीत्ता विरोध कार्यक्रमकु लोप्पा 330 महिलांग शामिल आत्तादु मंता. 2020 ते ताकता भूसमतलीकरण अभियान ते 1355 महिलांग शामिल आत्तांग.

पश्चिम बस्तर डिविजन

8 मार्च, 2020 ता मौका ते भैरमगढ़ ओसो चमेली ते रैली ओसो सभाग कुन ताकी कीत्तादु मंता. इविन लोप्पा लगभग हजार महिलांग शामिल आत्तादु मंता.

वीरा योद्धा सृजना दीदी ना सुरता ते



वीरा योद्धा सृजना दीदी
क्रांतिकारी लालुसलामो दीदी
माओवादी लालुसलामो दीदी

महाराष्ट्र राज्य – गढ़चिरोली जिला
गोपनारु नाटे ने पुट्टि पेरिस्तीना
– आदिवासी जीवता मियाड
यायो-बाबो जीवा कीसोरे दीदी
जैनी इंजो करंगनोरे दीदी

आदिवासि सियानीरा पितृसत्ता खिलाफ ते
जबरदस्ती मर्मी तुन विरोध कित्तायो
– दलमु लोपा डाका वाट्तायो
पीएलजीए ते भर्ती अत्तायो दीदी
माओवादी सदस्य अत्तायो दीदी

मोयुल लोपो लडाई लोपो आधा हिस्सा महिला इंजी
श्रम मुक्ति लेवा महिला मुक्ति हिल्ले इंजी
महिला मुक्ति लडाई ते शामिल अत्तायो
– वर्ग संघर्ष तेज कित्तायो
मालेमा सिद्धांत वेस ते दीदी
क्रांतिकारी हरी ताक्तायो दीदी

सामंतवादी समाज, पितृसत्ता समाज
महिला परवो इंजी चुडला हूडीता

मानय ना कानून लागो इंजोरे
नारु नारु महिला किन कट्ट कित्तायो
– महिला पुरुष – समान इंजी
माक्सवाद वेस ते ताक्तायो दीदी
जानकी दीदी हरि ताक्तायो दीदी

जल, जंगल, जमीन पोरो हक मावा इंजोरे
आदिवासी जनता किन कट्ट कित्तायो
– जाबुर जंगल – मेट्टा गुट्टा ते
लालु पोडदु अत्तायो दीदी
लालु पुंगर अत्तायो दीदी
गढ़चिरोली लडाई पोरो फासीवादी दमन
किराया पुलिस तोरा लगातार हमला
– डिविजन संघर्ष तेज कित्तायो
30 मुठभेडकु ने दुश्मन संगेयो दीदी
धक्की, पक्की जूझेमत्तायो दीदी

ग्रीनहंट हमला ते समाधान दमन ते
हिम्मत संगे मंजी लडेमत्तायो
कोवर्ट लोर कुन इनफारमर लोर कुन
जनता ना मुन्ने तासी सजा हित्तायो
– साहसिक गुरिल्ला – वीरा योद्धा
जनता ना राज्य निल्पी कित्तायो दीदी
जनता ना नेतलत्तायो दीदी

सी-60 कमांडो नइकु-मीवा समाचार पुंजी
सरने घेराव कीसी हमला कीत्तोरे
– दुश्मन तुन प्रतिरोध कीसोरे
नीवा नेतुरु पोंगतायो दीदी
लालु वियुक्का अत्तायो दीदी

नीवा आशय पूरा कीयला-माटु मुन्ने दायकोम
नवजनवादी क्रांति तुन सफल कीयकोम
– लूटी समाज-ध्वस्त कीसोरे
समाजवादी समाज जीडकोम दीदी
कम्युनिस्ट समाज तत्ताकोम दीदी



कामरेड सृजना दीदी ना सुरता ते



- 1) किल-किला पाटा पारोरे निम्मा रामे पिट्टे वेहा
- सोबा-सोबा मंदना जंगल ते रागो बेगा मंताये।
- 2) गढ़चिरोली जिला गोपानार ते आरके पाड़ी लोत्ते
- चैतू, सुक्रिबाई किन जैनी जीवता मैयाड़।
- 3) एलाड़ मुव्वुर लोपा जैनी मल्ले पुंगार लेक्काने
- मुस-मुस कवनादू दीदी बंति पुंगार मोकोम।
- 4) महिला किन आजादी हिल्वा मर्मी आयनायो इंजि
- केएमएस लोपा महिला किन एकता कित्ताये।
- 5) नाटेना पेद्दाल, पेरमाल ना सत्ता ऊंदि मंजि
- जनताना सरकार किन दीदी सर्वाधिकार वेहता।
- 6) जंगल पोरो हक हिल्ले इंजी वेहता रेंजर पुलिस तोर किन
- लालसेना देब्बा ते ओर किन जवाब हित्ताये।
- 7) माओवादी पार्टी किन विद्रोह कित्ता गद्दार लोर किन
- हिम्मत ते कालर तुन पोयसि तुरसि लोन लोसित्ता दीदी
- 8) एरदे कीके लेक्का दीदी जनता लोपा कल्लिय मंजि
- जनयुद्ध ते जनता किन गट्टिंग निल्पी कित्ताद मंताये।
- 9) कम्युनिस्ट मूल्य ते सृजना साधा-सीधा जिंदगी
- सशस्त्र सेना लोपा आदर्श साहसिक कमांडर
- 10) सीनभट्टी जंगल ते सी-60 बल संगे जूझोमासी
- दस्ता किन बचा कीसी दीदी वीरयोद्धा अत्ताये।
- 11) मोयोल ते आधा लेक्का सृजना क्रांति ते आधा हिस्सा
- माओ वेहता माटा किन मरंगवा मन ते निल्पी कित्ताये
- 12) दीदी शहीद अत्ता खबर केंजि दंडकारण्य जनता
- किस पोरो दूपम लेक्का दीदी झंडा तेहतोरे.

(पाटा बाणि: पेनकुना जीवा इद जनता-भावमू वेहटू
- येसुनु नम्मिक्केने परलोका जीवमू मनकू वांता. इंदना इसाई धर्म ता रागम संगे पाराना.)

(आखिरी पेज ते पिस्तदु)

कार्यकर्तालोरा पोरो अत्याचार ओसो हमलांग बेरसी कीयामंतोर. झूठी मुठभेड़ कुना लोपो हौकामंतोर. भाकपा (माओवादी) ता महिला कार्यकर्तालोरा पोरो टारगेट कीसी अविस्कून हौकामंतोर. इद साल ते क्रांतिकारी जननेताल कामरेड सृजना संगे बचूनो महिला कामरेड्स कुन मुठभेड़ ओसो झूठी मुठभेड़कुने हौकतोर. इस्साले दंडकारण्य ते पुलिस कैंपकु ओसो विस्थापन विरोध ते ताकाना जबर्दस्त जनआंदोलन लोपो वेल्लय संख्या ते महिलांग शामिल आयामंता. इद्रम लड़ेमायना महिलांग ना पोरो पश्चिम बस्तर डिविजन, गंगालूर क्षेत्र ते हिंदुत्व फासीवादी मोदी सरकार ओसो भूपेश बघेल ता कांग्रेस सरकार कित्ता लाठी चार्ज ओसो फायरिंग ते सैकड़ों महिलांग

घायल आतांग. बचूनो महिला कार्यकर्तालोरिन गिरफ्तार कीसी जेल ते तासतोर. केएएमएस ता नेताल कामरेड नर्मदा संगे बचूनो कार्यकर्तालोरिन गिरफ्तार कीसी झूठा केसकुने इरकी कीसी जेल ते तासतोर.

लगभग 60 साल ता कामरेड नर्मदा वेल्लय सालकु एवनाल दंडकारण्य ते काम कीसी भाकपा (माओवादी) ओसो केएएमएस ते अस्सल भूमिका एतिसी उत्पीड़ित जनता ना पक्ष ते हिम्मत ओसो दृढ़ता ते नितिसी लूटी शोषक-शासक वर्ग कुना विरोध ते हथियार पोयसी लड़ेमात्ता. 2018 ते तानकु कैंसर बीमारी आत्ता इंजी पता दोरकता. अस्के कामरेड नर्मदा इलाज ता काजे दंडकारण्य तल बाहर हंजी इलाज ताकाना मौका ते पुलिसतोर, तानकु 12 जून, 2019 ते ताना जीवनसाथी कामरेड किरण ना संगे गिरफ्तार कित्तोर. हामुर संगे लड़ेमायना कामरेड नर्मदा कुन शासन-प्रशासन हौकाना क्रूर साजिश ता संगे जेल ते तासतोर. कोरोना ता समय ते कैदीर कुन इचुक शर्तकुना संगे रिहा कीयाना इंजी सुप्रीम कोर्ट हित्ता सुझाव कुन वेने मुला (पक्का) ते तासीस शासन-प्रशासन राजनीतिक बंदीरा जीवा तुन खतरा ते तासा मंता. कैंसर बीमारी ते जूझेमायाना कामरेड नर्मदा कुन जेल पिस्वल, अद वेने कोरोना ना समय ते ओसो वेने घातक आयना लेहका मंता.

कामरेड नर्मदा आयवा क्रांतिकारी पार्टी ओसो केएएमएस ता बचूको कार्यकर्तांग जेलकुने मंतांग. तेना लोपो गढ़चिरोली जिला अहिरी तहसील, सींदेटोला नाटे ना कामरेड सुक्की (रजिता) ओसो कोरची तहसील ता बोटेझरी नाटे ना कामरेड इरोंती गावड़े (सुमन) लगभग 10 सालकु तल जेल

कामरेड नर्मदा सहित सभी राजनीतिक महिला जेल बंदियों की निशर्त रिहाई करो

जेल में बंद दण्डकारण्य ग्रामीण महिलाओं को निशर्त रिहा करो

अंतर्राष्ट्रीय महिला दिवस की 100वीं वर्षगांठ की जय-जयकार
क्रांतिकारी आदिवासी महिला संगठन



ते मंतांग. ओसो इदे जिला ते भामरागढ़ तहसील माडवेल्ली नाटे ना कामरेड सुशीला सडमेक (पार्वती), हत्ता साल तल जेल ते मंता. दक्षिण बस्तर, जगुरगुंडा क्षेत्र तल करंगड़ नाटे ना कामरेड मीना, लगभग दो साल तल जेल ते मंता. कांकेर जिला गुंदूल नाटे ना कामरेड मैनी ओसो लोहारी नाटे ना कामरेड सुनीता हत्ता साल गिरफ्तार आसी जेल ते मंतांग. इविस्कून सबे रकम ता न्यायिक सुविधांग ओसो स्वास्थ्य सुविधांग दोरकवा कीयामंतोर. इद्रम गोली-दवाई, सूजी इलाज लेवा कारण ते इद साल 24 जनवरी ते महाराष्ट्र ते विचाराधीन कैदी मत्ता कंचन नानावरे पोरोय ता वर्राय आदिवासी महिला ना जीवा हत्ता. कंचन देशभक्ति युवा मंच ता सक्रिय कार्यकर्ता मत्ता.

तान 2014 ते माओवादीरा संगे संबंध मंता इंजी आरोप लगे कीसी अरेस्ट कीसीमत्तोर. पुटतागडल गुंडे बीमारी मत्ता कंचन ना जीवा तुन जेल जिंदगी ओसो बीमारी बेरसनल कित्ता. तना बीमारी पक्काय वीडता इंजी अद बचोनो बेरा सेशनस ओसो मुंबई हाईकोर्ट ते जमानत काजे याचिका दायर कीसी मत्ता. मति अदालतकुना अमानवीय ओसो आपराधिक रवैया ता कारण ते 38 साल ता कंचन ना उमर आयवाये हामुर आत्ता. सही वेहाना इतेके अद हामुर आयो. इद न्याय व्यवस्थाये ताना जीवा टेंडता.

कार्यकर्तालोर कुने आयो, संघर्ष हरदे ताकाना सबे इलाकांग लोपो पिस्साना बचूको मामूली महिलांग कुन वेने शासन-प्रशासन गिरफ्तार कीसी जेल ते तासामंतोर. इविस्कूना लोपो इचुक महिलांग वेल्लय सालकु तल सजा अरतावु वेने मंतांग. गढ़चिरोली जिला, भामरागढ़ तहसील ता मल्लमपोडुर नाटे ना महिला चैते पल्लो 2004 ते गिरफ्तार आत्ता. तानकु आजीवन कारावास ता सजा हित्तोर. अद गिरफ्तार आत्तास्के ताना मियाड़ी एक साल ता सुडला केसमुल पिला मत्ता. इंजे अद 17 साल उमर ता मंता. मति इंजे वेने तना यायो ना संगे जेल तेने मंता. दक्षिण बस्तर ता जोन्नागुडेम नाटे ना महिला कलमू लक्के 2011 तल जगदलपुर जेल ते मंता. ओसो इद नडमा इदे नाटेनाये कुंजाम सोमड़ी, पूनेम हिडमे, माड़वी उंगी, माड़वी बामी, सोड़ी मासे, माड़वी मासे, वंजाम ऊरे, गांदार नाटेना कलमू भीमे, मूलेर नाटेना माड़वी देवे, सिसोड़ी नाटेना मडकाम मूके, बोड़को नाटेना कलमू ऊरे, दुरमा नाटेना रव्वा नंदे, रव्वा देवे, पुसुगुड़ा नाटेना कुमारी, कलेपाल ता पायके,

चिकपाल नाटेना मंगली ओसो सतिसा गुंडसे नाटेना सुक्को ओसो बामे बीजापुर ब्लॉक, मुद्दुम नाटेना कलमू पीसो, कलमू संतो, गोरनम नाटेना मोडियम ज्योति ओसो भैरमगढ़ ब्लॉक ता बड़ेतुंगाल नाटेना वेको फूलमती जेल ते मंतांग. इव आयवाये ओसो वेने बच्चूको मुल महिला कामरेड्स ओसो मामूली नाटेना महिलांग वेने बचोनो कटलांग कुने जेल ते पिस्सामंतांग.

उंदी क्रांतिकारी पार्टी ओसो महिला संगठनकुना पोरोने आयो, बच्चूनो जनवादी ओसो प्रगतिशील महिला संगठनकुना पोरो वेने हिंदुत्व फासीवादीरा दमन ताका मंता. संगठनकुना कार्यकर्तालोरा पोरोने आयो, प्रगतिशील विचारतोर, पीडित जनता ना पक्ष ते मंजी लड़ेमायनोर हिंदुत्व कटटरता ता विरोध कीयना

बच्चूनो महिलांग कुन वेने हिंदुत्व ताकतकु तमा टारगेट बने कीयामंतोर. तेना लोपोने 2017 ते प्रगतिशील कन्नड लेखिका ओसो संपादिका गौरी लंकेश किन संघ परिवारतोर हौकतोर. मुन्ने मत्ता महाराष्ट्र सरकार भीमा कोरेगांव मामला ते फंसेकीसी बचोनो मुल जनवादीर ना संगे सुधा भारद्वाज ओसो शोमा सेन कुन गिरफ्तार कीसी जेल ते तासतोर. इद्रमे तेलंगाना ओसो बच्चोको दूसरा-दूसरा राज्यकुना लोपो वेने प्रगतिशील महिला संगठनतांग कार्यकर्तालोर कुन वेने जेल ते तासतोर. इविस्कुना पोरो अर्बन माओइस्ट इंजी, ऊपा-गैर कानूनी गतिविधि निरोधक कानून इद्रम ता कई क्रूर कानून कुना संगे अविस्कुन वेल्लय दियांग तल जेल ते तासतोर.

अस्सल भीमा कोरेगांव ता 200 वीं विजय दिवस ता सुरता ते एल्गार परिषदतोर आयोजित कित्ता कार्यक्रम ताकना मौका ते भगवा आंतकवादी हिंसा भड़का (रच्ची)

8 मार्च, अंतर्राष्ट्रीय महिला दिवस जिंदाबाद!

महिलांग पोरो ताकाना ब्राह्मणीय हिंदुत्व फासीवादी दमन तुन विरोध कीमुटू!

कामरेड नर्मदा संगे सबे महिला कार्यकर्तांग कुन रिहाई कीयाना मांग कुन पोयसी आंदोलन कीमुटू!

जेल ते मत्ता दंडकारण्य ता नाटेना महिलांग ना रिहाई ता काजे आंदोलन कीमुटू!

सुधा भारद्वाज, शोमा सेन आदि प्रगतिशील महिलांग ना रिहाई ता मांग तेहाटू!

सबे राजनीतिक बंदीलोर कुन रिहाई कीयाना मांग तेहाटू!

कित्तोर. मति इद हिंसा ता आरोप देश ता कई प्रगतिशील ओसो जनवादी बुद्धिजीवीर पोरो मेत्तसी ओरकुन बच्चूनो मुल कुन गिरफ्तार कित्तोर. ओरा लोपो सुधा भारद्वाज ओसो शोमासेन वेने मंता. सुधा भारद्वाज उंदी वकील आंदू, वकील मंजी अदू मजदूर ना ओसो आदिवासीरा अधिकार कुना काजे लड़ेमात्ता. शोमासेन वेल्लय समय तल महिला संगठन ते काम कीयामंता. देश ते ताकाना बच्चूनो महिला आंदोलनकुने अद मंता. अविस्कुन गिरफ्तार कीसी सरकारकु तमा दलित विरोधी, आदिवासी विरोधी, मजदूर विरोधी ओसो महिला विरोधी मुकम कुन पोड़गने तोहचियामंता.

इद्रम हिंदुत्व फासीवादी शासन महिलांग पोरो ताकी कीयाना

दमन ता परिप्रेक्ष्य ते 8 मार्च, 2021 ता मौका ते केएएमएस छत्तीसगढ़ ओसो महाराष्ट्र रेंड राज्यकुना लड़ाई कीयाना महिलांग किन आह्वान कीयामंता. कामरेड नर्मदा संगे सुधा भारद्वाज, शोमासेन लेहकातांग सबे महिला नेतालोरिन ओसो कार्यकर्तालोरकिने आयवा सबे राजनीतिक बंदीर कुन तत्काल ओसो बातय शर्त लेवाये रिहा कीयाना इंजी मांग पोयसी आवाज बुलंद कीसोरे आंदोलन कीयाना. अद्रमे ओरा रिहाई ता मांग कुन जोरशोर ते समर्थन हीसोरे संघर्ष निर्माण कीयाना ओसो हर संभव मदद हीयाना इंजी केएएमएस देशमेटा क्रांतिकारीर, प्रगतिशील, ओसो जनवादी संगठन कुन अपील कीसोरे मंता.

कामरेड नर्मदा ओसो केएएमएस कार्यकर्तालोरा, महिला कामरेड्स ना, ग्रामीण महिलांग ना रिहाई ता मांग कुन पोयसी नाटे-नाटे ओसो सोशल मीडिया ते ताकी कीयाना हस्ताक्षर अभियान कुने वेल्लय मुल पेसना.

**क्रांतिकारी आदिवासी महिला संगठन,
दंडकारण्य**

जेल बंदीरा रिहाई काजे हस्ताक्षर अभियान ताकी कीयना मैदे जारी कित्ता पत्र

प्रति: माननीय श्री रामनाथ कोविंद जी, राष्ट्रपति, भारत सरकार,

विषय: कामरेड नर्मदा व अन्य केएएमएस कार्यकर्ताओं, महिला कामरेडों और ग्रामीण महिलाओं की रिहाई की मांग के बाबत!

केंद्र और राज्य सरकारें हमारे संगठन को निशाना बना कर हमारी कार्यकर्ताओं पर अत्याचार व भौतिक हमलें कर रही हैं. झूठी मुठभेड़ों में कईयों की हत्या कर रही हैं. कई महिला कार्यकर्ताओं को गिरफ्तार करके सालों से जेल में सड़ाया जा रहा है. केएएमएस की नेत्री कामरेड नर्मदा सहित कई कार्यकर्ताओं को गिरफ्तार करके झूठे मामलों में फंसा कर जेल में डाल दिया गया.

लगभग 60 वर्षीय कामरेड उष्णगंटी निर्मला कुमारी (नर्मदा), ग्राम - गन्नावरम, कृष्णा जिला, आंध्र प्रदेश को 2018 में कैंसर होने की पुष्टि हुई, तो वे इलाज के लिए दंडकारण्य से बाहर गईं. इलाज के दौरान ही पुलिस ने उन्हें 12 जून, 2019 को उनके जीवनसाथी कामरेड राणी सत्यनारायणा (किरण) के साथ गिरफ्तार किया. मृत्यु से लड़ रही कामरेड नर्मदा को इलाज से वंचित करके उनकी हत्या करने की घृणित व क्रूर षड़यंत्र के साथ शासन-प्रशासन उन्हें जेल में सड़ा रहा है. कोरोना की पृष्ठभूमि में कैदियों को कुछ शर्तों के साथ रिहा करने सुप्रीम कोर्ट द्वारा दिए गए सुझाव को दरकिनार करते हुए शासन-प्रशासन राजनीतिक बंदियों की जानों को खतरे में डाल रहा है. कैंसर से पीड़ित कामरेड नर्मदा के लिए जेल जिंदगी वह भी कोरोना के दौर में और भी घातक हो सकती है.

कामरेड नर्मदा के अलावा क्रांतिकारी पार्टी व केएएमएस की कई कार्यकर्ताएं जेलों में बंद हैं. इनमें गढ़चिरोली जिला, अहिरी तहसील, सींदोला गांव की कामरेड सुक्की (रजिता) और कोरची तहसील के बोटेड्झरी गांव की कामरेड इरोंती गावडे (सुमन) लगभग 10 वर्षों से जेल जिंदगी बिता रही हैं. इसी जिला, भामरागढ़ तहसील माडवेल्ली गांव की कामरेड सुशीला सडमेक (पार्वती) विगत एक वर्ष से जेल में रह रही हैं. दक्षिण बस्तर, जगरगुंडा क्षेत्र, करंगड गांव की कामरेड मीना लगभग दो वर्षों से जेल जिंदगी बिता रही हैं. कांकर जिला, गुंदूल गांव की कामरेड मैनी और लोहारी गांव की कामरेड सुनीता, विगत वर्ष गिरफ्तार होकर जेल में हैं. इन सभी लोगों को सारी न्यायिक सुविधाओं से वंचित किया जा रहा है.

कार्यकर्ताओं को ही नहीं, संघर्षरत इलाकों में निवासरत कई साधारण महिलाओं को भी शासन-प्रशासन ने गिरफ्तार करके जेल में डाल दिया है. इनमें कुछ महिलाएं लंबे समय से सजा काट रही हैं. गढ़चिरोली जिला, भामरागढ़ तहसील के मल्लमपोदुर की ग्रामीण महिला चैते पल्लो 2004 में गिरफ्तार हुई. उन्हें आजीवन कारावास की सजा दी गई. जब वह गिरफ्तार हुई उनकी बेटी एक वर्ष की छोटी बच्ची थी. मां की ममता से वंचित होकर पल-बढ़ कर अब वह 17 वर्ष की हो गई है. लेकिन अभी भी उसकी मां जेल में ही बंद है. दक्षिण बस्तर के जोन्नागुडा गांव की ग्रामीण महिला कल्मु लक्के 2011 से जगदलपुर जेल में है. इसी तरह फिलहाल जोन्नागुडा गांव की ही कुंजाम सोमड़ी, पूनेम हिड़मे, माड़वी उंगी, माड़वी बामी, सोड़ी मासे, माड़वी मासे, वंजम ऊरे, गांदार गांव की कल्मु भीमे, मूलेर गांव की माड़वी देवे, सिसोड़ी गांव की मडकाम मूके, बोडको गांव की कल्मु ऊरे, दुरमा गांव की रखा नंदे, रखा देवे, पुसुगुडा की कुमारी, कलेपाल की पायके, चिकपाल गांव की मंगली और सतिसा, गुंडसे गांव की सुको और बामे जेल में बंद है. इनके अलावा दंडकारण्य की और भी कई महिला कामरेड और साधारण ग्रामीण महिलाएं जेल में हैं.

भारत के राष्ट्रपति होने के नाते हम आशा करते हैं कि संवैधानिक विशेष अधिकारों का इस्तेमाल करके आप इन सभी की रिहाई के लिए व्यवस्था करेंगे.

कोविड संकट ते महिलांग ना कटलांग ओसो बेरसामंता!

महिलांग ओसो पिल्लांग इंजेके एवनल बेव असमानतांग किन सामना कीयमंतायो, अव असमानतांग किन कोविड महामारी ओसो बेरसी कीयामंता. कोविड ता कारण ते बेरोजगारी बेरसामंता. जनता ना आमदनी कम आयामंता. माने ना संगे तुलना कीतेके महिलांग लोप्पा इव बेरोजगारी ता दर 24 फीसदी ज्यादा मंता. स्वास्थ्य क्षेत्र ता संगे-संगे सब्बे क्षेत्र लोप्पा इव असमानतांग बेरसामंता. लोत्ते मंजी काम कीयना परिस्थिति ते इस्कूलकु ओसो शिशु संरक्षण केंद्रकु बंद अत्ता. अदेन काजे महिलांग पोर्रो लोत्ता काम ओसो पिल्ला-पेकोरा पालन-पोषण ता बोझा बेरसता. इस्कूलकु बंद अत्ता कारण ते स्कूलकु विडस्ता लाखों पिल्लांग शायद इंका बेस्के वेने स्कूल दाया परवो आया. यायोस्कु खासकर वेरोने मंदना (लोत्तोर इलवा) यायास्कु इंका ज्यादा कटलांग कुन सामना कीयामंतांग. कोविड

वात्ता पेरके पिल्लांग कुन हुडला उमर तेने मर्मी कीयनादु बेरसता. यौन उत्पीड़न वेने बेरसता. पिल्लांग ओसो महिलांग कुन लापता कीसी वम्मनादु वेने बेरसता. गृहहिंसा वेने बेरसता.

इव आंकड़ा हूडतेके कोविड कारण ते माने ना तुलना ते महिलांग वेल्लय प्रभावित आयमंता इंजी समझेमायमंता. मति कोविड किन सामना कीयना लोप्पा महिलांग ना भागीदारी वेल्लय मंता. खासकर स्वास्थ्य क्षेत्र ते महिलांग ना संख्या वेल्लय मंदना कारण ते कोविड बीमारी पोयत्तोर कुन स्वास्थ्य सेवा हीयना लोप्पा ओसो टीकाकरण कार्यक्रम लोप्पा महिलांग ना भूमिका मुख्यतदु आंदू. इगा उंदी दिलचस्प ता पोल्लो बाता इतेके महिलांग ना नेतृत्व ते ताकना देशकु लोप्पा कोविड संक्रमण ता स्तर कम मंता. जनता कुन स्वास्थ्य सेवांग, आपत्काल सेवांग ओसो समाचार एवसी कीयना लोप्पा महिला नेतृत्व बेसता भूमिका निभा कीयमंता. ★

अंतर्राष्ट्रीय महिला दिवस ता आह्वान!

ब्राह्मणीय हिंदुत्व फासीवादीर महिलांग पोरो कीयाना अत्याचार ओसो हौकना तुन विरोध कीमुटू!

कामरेड नर्मदा संगे सबे राजनीतिक महिला जेलबंदीर कुन निशर्त रिहाई ता मांग कीमुटू!

जीवा ता महिलांग!

मीटू सबेतोर कुन 8 मार्च, अंतर्राष्ट्रीय महिला दिवस ता मौका ते क्रांतिकारी आदिवासी महिला संगठन (केएएमएस) ता क्रांतिकारी अभिवादन ओसो बधाई. मीटू सबेतोर इद विषय पुत्तीरू, 8 मार्च, महिला आंदोलन ता इतिहास लोपो उंदी अस्सल ता दिया

आंदू, कामगार महिलांग तमा जुझारू संघर्ष ता संगे इद दिया तुन ऐतिहासिक बनेकित्तांग.

नेडू पूरा दुनिया 8 मार्च, अंतर्राष्ट्रीय महिला दिवस मानेमासोर मंता. मावा देश लोपो क्रांतिकारी पार्टींग ओसो महिला संगठनकु अंतर्राष्ट्रीय महिला दिवस मानेमासोरे महिला मुक्ति झंडा तुन पोरो तेहची पोयदामंतांग. केएएमएस ता नेतृत्व ते हर साल दंडकारण्य ता संघर्ष हरदे ताकना महिलांग वेने 8 मार्च, अंतर्राष्ट्रीय महिला दिवस क्रांतिकारी जोश-गिरदा ता संगे मानेमासोरे मंतांग. अदेन मैदेने हर साल केएएमएस संगठन महिलांग कुन प्रभावित कीयाना ज्वलंत मुद्दांग कुन तेहचोर मंता. अद्रमे इद साल वेने केएएमएस, महिलांग पोरो ताकाना हिंदुत्व फासीवादी दमन विरोध ते लड़ेमायाना इंजी आह्वान कीया मंता.

ब्राह्मणीय हिंदुत्व फासीवादी ताकतकु देश तुन हिंदु राष्ट्र पंडाना तमा एंजेडा कुन आक्रामक हिसाब ते मुन्ने ओयामंता. एक भारत, श्रेष्ठ भारत ओसो नया भारत इंजी

देश ता विभिन्नता (अनेकता) पोरो हमला कीयामंता. इदे लक्ष्य ते देश ते आदिवासीर, दलितलोर ओसो धार्मिक अल्पसंख्यकतोर, अस्सल हूडतेके मुसलमानलोरा पोरो, महिलांग पोरो तीव्र दमन कुन बेरसी कीयामंतोर. मनु ना विरासत कुन मुन्ने ओयाला ब्राह्मणीय हिंदुत्व ताकतकु महिलांग कुन

दबेकीसी तासना इंजी आल्सामंतोर. सामंतवादी पितृसत्ता कुन पोसे कीयाना इंजी आल्सामंतोर. अदेनकु दूसरा जातिनोर कुन मर्मी आयना महिलांग कुन अत्याचार कीसी हौकामंतोर. अदेन काजेने हिंदुत्व फासीवाद विरोध ते लड़ेमायना क्रांतिकारी, प्रगतिशील, जनवादी महिला संगठनकुन ओसो महिलांग कुन कोंडा पोदवा होंग ते इव हिंदुत्व फासीवादी ताकतकु हूडा मंतोर. ताना काजेने अविस्कन वेल्लय मुल किन तमा टारगेट बना कीया मंतोर. इद्रम ता महिला संगठनकुना कार्यकर्तालोर कुन, नेतालोर कुन ओसो जनवादी प्रगतिशील महिलांग कुन हौकामंतोर. ओरा पोरो हमलांग कीयामंतोर. इद्रम महिलांग कुन गिरफ्तार कीसी जेल ते तासामंतोर.

ओरा पोरो दुष्प्रचार कीयामंतोर.

इद्रमे केंद्र-राज्य सरकारकु तमा रणनीतिक 'समाधान' योजना ता लोपो दंडकारण्य क्रांतिकारी आदिवासी महिला संगठन (केएएमएस) कुन वेने टारगेट कीसी संगठन